

**SIXTH LEGISLATIVE ASSEMBLY OF MIZORAM  
( EIGHTH SESSION )**

**LIST OF BUSINESS**

**FOR NINTH SITTING ON TUESDAY, THE 19<sup>th</sup> JULY, 2011  
( Time 10:30 AM to 1:00 PM and 2:00 PM to 4:00 PM )**

**QUESTIONS**

1. *Questions* entered in separate list to be asked and oral answers given.

**LAYING OF PAPERS**

2. **Pu H. ROHLUNA**, Minister to lay on the Table of the House a statement correcting the reply given on the 15<sup>th</sup> July, 2011 to unstarred question No. 10, ballot No. 13 asked by Pu Nirupam Chakma regarding Ration Card leh Buhfai chungchang.

**FINANCIAL BUSINESS**

**GENERAL DISCUSSION ON THE BUDGET FOR THE YEAR  
2011-2012.**

3. General Discussion on the Budget for the year 2011-2012 to resume (to be concluded).

NGURTHANZUALA  
Secretary

.....

**S P E A K E R** : Tichuan thil tha tih i ning suh ang ; kan inthlahdah loh zawngin a hun takah chuan kan seng dawn si a.

Galatia 6:9

Zawhna leh chhanna hunah kan kal ang a, zawhna No. 91-na Member zahawmtak Pu Hmingdailova Khiangte i lo ko ang.

**Pu HMINGDAILOVA KHIANGTE** : Pu Speaker ka lawm e, Education Minister zahawm tak chhan atan–Thingtlang khuaa Government Primary School leh Middle School-a zirtirtu indaihlo lutuk hi Education Department hian siam fel tumna a nei em? tih ka zawt e.

**S P E A K E R** : Chhhang turin a changtu Minister Pu Lalsawta i lo sawm ang.

**Pu LALSAWTA, MINISTER** : Pu Speaker, Member zahawm tak Pu Hmingdailova Khiangte zawhna chhanna chu “Nei e” tih a ni.

**S P E A K E R** : Zawhbelhna Pu Hmingdailova Khiangte, chumi hnuah Pu Lalthansanga’n chumi hnuah Pu P.P. Thawla chuti chin chu kan la ang a, Pu Thangte-a kan la theilo ang. Le, Pu Hmingdailova.

**Pu HMINGDAILOVA KHIANGTE** : Pu Speaker ka lawm e, Thingtlang ti bik ila, Primary School leh Government Middle School-ah hian Head Teacher awm lohna te an tam hle a, chubakah Primary School-ah hian pahnih leh pathum hi an ni deuh vek a. Ka bialah chuan Lungdai leh Kawnpui an ziaawm a Serkhan nen. A bak zawng hi chu an dinhmun a chhe hle a, entirnan Primary School Khamrangah chuan zirtirtu pakhat a awm a, kan unit hotuten an zu pui thin a ni, chutiang bawkin thlahmasa khan Nisapuihah zirtirtu pahnih an awm a, a head zawk chu transfer a ni a, zirtirtu pakhatin a enkawl a, cook pahnih an awm a, pakhat zawk chu lehkha a thiam deuh hlek a, Head Teacher-in a chhuahsan hma khan a duhthawhnaah a hlawh atangin Cheng 500/- a pek belh a, zirtir hnate pawh a lo thawk ve thin a ni tih kan hria a.

Tin, kum hnih rim a nam hlawm tawh Govt. M.E. School-a Head Master awmlohnate hi a zualpui deuh deuhte han sawi ila, Hortoki-ah chuan Primary School-I-ah zirtirtu pahnih an awm a, School naupang chu 150 vel an ni. Primary School-II-ah pawh zirtirtu pathum an awm a, School naupang chu 130 vel baw an ni. Khatiang kha kan dinhmun anih avangin Pu Speaker bial kan fante hian kan hotute hian namen lovin min nawr a, tour note-te pawh hi kan ziak hnem viau tawh a. Tin, Aizawlah te pawh an mangang hi lo kalin minrawn nawr thin a, tihngaihna a vang viau a, Elementary Education-a Primary leh M.E. School berin zirtirtu an neih si loh chuan thingtlang khaw tam taka education hi a ngaihtuahawm mange aw ka ti deuh a, he thil hi inthlahrung takin kan Education Minister zahawm tak leh a hote hian theihtawpin an bei ang chu tih ringin he zawhna hi ka rawn zawt a.

Ka zawhbelhna chu Headmaster awm lohna, a bik takin Middle School leh Primary School-a school indaihlohna 1/2 chauh an awmna hi engtikah nge min phuhruk sak theih ang? tih hi Pu Speaker, ka zawt e.

**S P E A K E R** : Pu Lalthansanga.

**Pu LALTHANSANGA** : Pu Speaker, ka lawm e. Hei, harsatna hi kan han thlen mawlh mawlh mai a, ka bial hote pawh kha tunhma khan ka sawi a, kan Health Minister zahawmtak bial New Chalrang-ahte pawh khan an zirtirtu ber mit thalo a ni a, pakhat chauh a awm tihte pawh kha kan han thlen tawh a. Chutiang deuh bawh chuan Lungkawlh-ah pawh hian Zirtirtu regular teacher hi kan nei miahlo mai a, contract E.V teacher leh SSA teacher leh Pre-teachers hi kan nei a. Ni e, kan han sawi hian Central norms-ah hian fourteen to one ang hian kan kal e, an ti a, Central Norms hi kan zawm e, hi an ti leh mai bawh thin a. Chutiang norms chu lo zawm pawh nisela, Lungkawlh Primary School-ah hianin School naupang hi 130 vel an awm a, fourteen to one-ah pawh hian lo kal nisela hei aia tam hi chu neih awm tak chu a ni a.

Tin, regular teacher awm lova School an han kal reng reng hi naupang-ah te hian an inthlahdah phah hlein a hriat a, khaw dang dang pawh chutiang chuan harsatna hi a tam em em mai a. High School-ah te pawh hian harsatna hi kan nei nasa a, Headmaster nei mang lova Senior Teacher-in Headmaster charge han lak angte hi a tam hle mai a. Hei, hian School Administration hi a ti thalo a, chutiang chu harsatna kan tawh hi a tam em em mai a. Tin, Primary School Lungkawlh bik phei hi chu Sub-Headquarter MSU phei hi chuan August Ni 1 hma hian minrawn pe ngei turin kan han ngen a ni, kan Sorkar hi tiin, ultimatum ang deuh lek lek chu a ni mai a, nu leh pate ngenna a nat em avangin chumi thlavang hauhna chuan an han ti a ni a. Chu chu August ni 1 hma hian Teacher hi min pek belh thei ang em? Hemi hma-a min pek loh hi chuan pressure group hian pressure an pe na dawn hle mai a, tih kha a ni a. Chutiangte chu a hma thei lama August ni 1 hma-a regular teacher pakhat emaw tal te, Headmaster emaw tal te min han pe turin Pu Speaker, ka'n ngen a ni e.

**S P E A K E R** : Pu P.P. Thawla.

**Pu P.P. THAWLA** : Pu Speaker, ka zawhbelhna chu pakhatna-ah zirtirtu kan laka kan dah tawh si, khawpui lama transfer kan ngah lutuk avang em ni thingtlang lamah School tamtakin zirtirtu neilovin an lo tuar tak? tih kha a ni a. Tin, chubakah zirtirtu kan lakte hian an khaw mi, SSA a ni emaw, RMSA a ni emaw, an khua-a mihring phu ve deuchte an awm chuan khatiang kha la zel ta mai ila. Tichuan, khawpui lama insawnte an tum thuai thuai lo ang a, a tha zawk mai lo ang maw? tih kha ni bawh sela.

A dawt lehah chuan, MNF Sorkar laia Transfer leh Posting Rules siam ang khan tunah hian hman a ni em? Hman ni talo se enge a chhan? tihte. A

dawt lehah chuan, Zirtirtute lak hian a khaw mi ngei lak hi a theih mai lawm ni? tihte. Tin, a dawt lehah Primary leh Middle leh High School. Tin, a dawt lehah Primary, Middle leh High School-ah te hian teachers student ratio hi engzatnge a nih? National Norms siam ang hian sorkar hian a kalpui thei em? Thei lo se enge a chhan? tih ka zawh belh e.

**S P E A K E R** : Awle, zawt duh tam tak in awm ang tih ka ring a, a pawimawh a, mahse, 92 te 93 te 95 te, heng hi heti lam deuh vek hi a ni a, kan kal thei a nih chuan, kan kal thleng a nih chuan RMSA, SSA tihte a pawp puhrukna tura central-in min rawn tumpuinate, 97-na pawh hi a la ni deuh deuh mai kha vek kha a ni a, zirtirtu indaih loh chungchangte kha chu in sawi duh vekin ka ring a bik takin thingtlang lam MLA te chuan, mahse, khami chin kha duh tawk ila, Minister-in han chhang sela.

**Pu LALSAWTA, MINISTER** : Pu Speaker, zawhbelhna a nih rualin kan dinhmun hi sawifiah a ngai ve tho mai a. Zirtirtu neih miah lohnate kan nei a, zirtirtu pakhat chauh neihnate kan nei a, tin, zirtirtu pahnih chauh neihnate kan nei a. Heng hi a School mal te tein kan endik mek a, zirtirtu neih miah lohna chu education volunteer kan tih, ‘Teacher’ pawh kan tih chiah loh, chu chu cheng 2500 hlawh chauh te an ni a, an ni ang hian kan han thuam pur pur a. Tin, zirtirtu pakhat chauh nei hi pakhat kan han dah belh deuh zel bawk a, a theihna chin chinah chuan. Tin, zirtirtu neih miahlohna ang chiah khan pahnih deuh zelin kan han dah a.

Tin, Middle School-a pawl riat a lo awm belh takah hian zirtirtute Graduate-te an lo nih loh pheih chuan pawl riat han zirtir tur hian an thiamnate a sang tawk lo bawk a. Chutichuan, kan member zahawm tak tak tena an bial chhung leh pawn an lo sawi thin hi kan hria a, churang chuan kan ngaipawimawh em em a. Amaheawhchu, an duh ang hi chuan kan ti zung zung thei lo tih House ka hriattir duh a, a chhan chu a harsa khawp mai a.

Tin, Pu Speaker, kan indaihlo hrim hrim a ni. “Khawiah emaw hian an tam hle a, chungte chu sem darh mai ula a ni mai alawm”, an han ti taknain chutiang chu a ni bik lem lo. Aizawlah hian an tam deuh kan ti a, amaherawhchu, hmun dang dangte kan en hian Aizawla rawn awm tam tak hi hrisel lohna avang, han ban rikngawt emaw, han pension ringawt emaw chuan an tan chhungkaw eibel lo ni ve si, a then chu aw nei tawh mang lo, mahse, zirtirtu lo ni a, an thawh ve tawk tawk a, anmahni chhungkua lampanga an lo tangkaipui ve si tih ang chi te, khatiang ang chi kha kan kawl khawm nasa em em a. Tin, an khua Aizawlte a lo ni a, an pension dawn hnaiha Aizawla awm ve ngai ang chi te, a dik takin tar lampang zirtirtu, viak tha tak pawh ni tawh lemlote hi kan kawl tlangpui a. Engpawhnisela, a rationalisation ang chi zawng hi chu theihtawpin tunah hian kan buaipui mek a, transfer hun hi kum pangngai ang. a thawk tuten an peih chhuah hunah hi chuan a zualpui member-ten an sawi thin leh a khaw neitu VC ten an khua an hmangaihna avanga an rawn sawi thin hi chu tihphuisui tumin kan thawk mek a ni.

Tin, People Teacher Ratio kan tih hi kan hresual emaw ni chu aw kan ti ta rum rum a. A chhan chu Pu Lalthansanga sawi ang khan tehfunga siam hi sikul pakhata naupang awm zawng zawng sawm pathuma then tur tih ang a ni a. Sikul thenkhatah chuan sawmthumin a then theih a. Teacher pakhat in mamawh a nih hi tih chuan pawl 4 vel kha thut ho tir a ngai dawn a ni. Chu chu kan kal phung a ni silova. Pawl 4 anih chuan teacher 4 leh Headmaster nen 5 an lo mamawh a, chuvangin People Teacher Ratio hi central-in min tum pui dan zawka kan hriat tak chu, “Class pakhatah hian effective teaching nei turin, an aw hre thei tur leh zirtirtu pawn naupang an hriat chian theih nan naupang 30 hi pel lo rawh se” tih lam a ni zawk ta awm e. Chuvangin kan indaih theih lohna chhan pawh hi tiin ngaihtuahna thar kan nei a ni. Khulam kan zawh pawh hian anni pawhin awmze nei takin min hrih thei lo a ni, naupangte 30-a sem rual theih ngawt a ni lova chuvangin tuna kan harsatna hi chu kan buaipui mek a, ka rin danin August thla chung hi chuan a zualpui chu kan peih ka ring a, chutah chuan kan indaih loh hrim hrim tho avangin Hindi teacher kan lakte pawh Hindi lo Subject dang pawh zirtir turin kan in ti a, Mizote hi zirna hlut tak kan nih avangin a tul chuan Cook-te thleng pawn an lo inzirtir ve a ni. Zirtirtu sual an lo awm palh a nih pawhin tha tak tak an tam khawp mai. Mahni hlawha lo ruai ve ngat ngatte pawh an awm a nih kan hre reng chungin hengte pawh hi kan ti hlei thei lova, kan member zingah te pawh hian thlatina an hlawh lo tum sak ngar ngarte pawh hi an awm a ni. A zawhna chhanna pui ber kha “tumna a nei em”? tih a ni a, a chhanna chu “theih ang tawka siamrem kan tum a, ziritirtu pawh lakbelh theih dan kawngte kan dil chho ve mek zel a ni” tih a ni. Kha kha member zahawmtak Pu Hmingdailova zawhna ang deuh a ni ang a.

Tin, Head chungchang bikah khan, Head pawh kan neih lohna te a tam mai a. Tin, Pu Speaker, head chungchangah hian Middle School ang bikah te phei chuan an senior tawh a. Senior tawh avanga head ni te an lo ni a. Senior tawh nak laia additional facility nei chuang mang lo, hlawh pawh pung chuang mang si lova choka hrang nei tura thingtlang daih maia mi in luaha bul han tan hi an tan hian a hrehawm avang hian, quarters engmah kan nei chuang bawk si lova. Head tura kan han tih tam tak hian an rawn hnial thin a ni, an rawn decline thin a ni. “Head nih ai chuan head lova Aizawla kan awm hian kan chhungkaw tan kan tangkai zawk e” an ti a. Keini tan tihluh ngaihna a awm chuang lova. Heng angah te pawh hian vawiin hi sawina remchang tak a ni a. Middle School Headmaster-te pawh hi an hlawh hmana an hmuh ang chi a “two years increment”-te ang kha han peka anmahni an phur ve lehna tur leh thingtlangah pawh choka hnan han siama indang chhoa an tihur atante pawh hian kan ngaihtuah sak hi chu a la ngai dawnin ka hria a, chu chu ka’n sawi tel duh a. Head chungchanga kan harsatna hi chutiang vang chu a ni tlangpui a.

Tin, member zahawm tak, Pu Lalthansanga zawhna, Lungkawlh chungchangte kha dik tak chuan kan hre hlur mai a, kan hre tawh khawp mai a, hmuntina harsatna hi kan inhre bel tawh khawp mai a, mihring thleng hian, kei phei chu kan inhmu zing tawh a. Mahse, tawngkam tha ringawta intih theih pawh hi a ni seng tawh lova. Kan sum neih leh kan man power neihin a daih miao loh hi chuan. Chuvangin Sub-headquarters MSU te pawh khan min lo hrethiam se, he House meuha han sawi a 1<sup>st</sup> August hma hi chuan kan rawn ti ngei ang tih kha chu sawi chiah ka ngai lova. Nichina kan ngaihtlak tak ang khan August thla chung hi chuan a nawlpui hi chu chinfel hrim hrim kan tum tih hi min lo hriatsak se. Theihtawp kan

chhuah ang a. Tin, hengah hian harsatna nei lo thei lo kan nihna hi tunhma atanga kan lo sawi ve tawh thinte pawh hi a awm a.

Tin, Pu P.P. Thawlla khan khawpui lamah an transfer leh thin a, an rawn zawm chauh a, tih hi pahnih pathum chu a awm ngei a ni, sawlam pang, tlema va hla deuhah sawn, a buaithlak a. Tin, hetih rual hian sawlama awm tur kan va dah tur, a khuain an lo phal tlat loh, zawm an phal miah loh te pawh hi a awm a, hei hi kan kal dan tur a ni angem aw ? Aizawl amiin sawtah Tuipangah te hna zawm turin a va kal ve vang vang a. “Hetah keimahnin candidate kan nei, kan duhzawng an awm, nang ngatinge”? te an lo ti a. Chutichuan zawm te an phal lova, a harsa ve khawp mai a. Heti em em lo deuh hlek hian khua leh veng chungchangah hian rilru tharte pawh hi kan put...

**Pu P.P. THAWLA** : Pu Speaker, khawngaihin. Khatiang khua bikte kha hetah sawi rik maite a rem em? Tin, an lo duh loh tlatna chhan te kha hotuten in dilchhut em? Khaw hmingte pawh in hrilh hriat a va tha ve, Pu Speaker.

**Pu LALSAWTA, MINISTER** : Pu Speaker, a tul chuan ka la sawi ang a. Amaherawhchu, appointment thar a ni a, amah kha a tha lo tih pawh engmah la awm hma a, khatia zawm tir phal loh kha a awm ve a ni. Chu chu a tul chuan ka la rawn sawi leh ang a.

**Pu LALDUHOMA** : Hetiang hi ka bialah pawh kan tawng a, thiam loh ngawt tur a ni lo. Zirtirtu an dil ve a, kum engngemaw zat khawtlangin a lo chhawr tawhte qualified em em ten an dil ve a. VEC ten hmu ngei se an duh a. Bialtu MLA ten kan sawipui bawk a, chuti chungin veng dang daiha mi raipuarte min rawn pe a. Kha kha Sihhmui pain kan duh lova, kan thawn haw a ni. Chu chu sorkar dik loh ni zawkin ka hria.

**Pu LALSAWTA, MINISTER** : Helai hi Pu Speaker, ngaihtuah tham tak a ni a. A khaw neitute chauh hian hmu rawhse han tih ang zawnga inhung bing zel ang hi Mizoram tan hian a tha angem ? rilru zim lutuk ang zawnga kan veng/kan khua tih ang zawngte pawh a awm thei lutuk palh ang tihte pawh a hlauhawm thei a. Engpawh nise, heta ka'n sawi duh chu, dan anga rorel tura helaia awm kan ni a. Chuvangin a dan ang chen ah hi chuan dan kan zawm a ngai a, Constitution te kan nei a. Amaherawhchu tuna kan problem nasa tak mai pawh kan member zahawm tak takte rawn sawi kha a dik thui khawp mai a. Thiam tak kal duh lo ai hi chuan, thawk duh thiamlo deuh pawh hi kan hlawkpui hrim hrim kan rin avangin tunhnua kan kal zelna turah hi chuan a sikul against hian vacancy hi fill up ila, kan thatpui awm mang e.

Mahse dan lamah en ta ilangin, mithiam awm mang lo qualified tang tang angte an awm laia mi thiam takte rin thua an thawk duh lovang tih rikngawt kha keini tan khan hnawlna tling a ni dawn lova, Aizawl ami pawh, Lunglei ami pawh thiam tak, khawiah pawh kal duhte an awm reng lai si a, a engamah hma a Summarily-a lo hnawlna tur kha chu a dan lamte pawh en deuh hlek chu a ngaiin ka ringa. Tin, transfer and posting chungchangah khan hmalak kan nei ve meka, tuna

rationalisation rual hian. A chhan chu nichina kan ngaihthlak tawh ang khan Hindi Teacher te thleng hian subject dangah pawh zirtirtu tangkai tak takte an nih avangin eng tin tin emaw chuan kan inhmang tangkai a. An subject nilo mahse tlawmngai tur ten kan inti a. Kan theih ang tawh hi chuan kan ti a. Tun atanga thla khat emaw thla hnih emaw chhung hi chuan chinfel theih kan inbeisei a ni.

**S P E A K E R** : Awle, khatiang deuh bawh zawhna zel kha ala ni dawn a ni. Vawiin chu kan Education Minister a rim deuh dawn a ni. Zawhna no. 92-na zawt turin Pu B.Lalthlengliana i lo ko ang.

**Pu B. LALTHLENGLIANA** : Pu Speaker, kan Education Minister zahawm tak chhan atan kan starred question no 92 na : Class VIII Middle School a dah anih tak avanga zirtirtu leh class room indaih lo hi sorkar hian engtin nge hma a lak ? tih ka zawt e.

**S P E A K E R** : A chhang turin a changtu Minister Pu Lalsawta i lo ko ang.

**Pu LALSAWTA, MINISTER** : Pu Speaker, kan member zahawm tak, Pu B. Lalthlengliana zawhna Class VIII Middle School-a dah anih tak avanga zirtirtu leh class room indaihlo hi sorkar hian engtingne hma a lak ? tih hi a chhanna chu hetiang hi a ni. : School Education department atangin Class VIII zirtirtu post 140 atan recruitment peihfel tep a ni a. Buaipui mek a ni a. Hei hi Cabinet-in 270 min phalsak atangin a ni a. Tin, SSA atangin zirtirtu 287 pek an ni tawh bawh a. Tin, Class VIII room hi a pindan lampang ve thung, SSA Mission hnuaiah 287 hi sak tawh a ni a, sak mek hi 349 kan nei bawh a ni.

**S P E A K E R** : Zawhbelhna Pu B. Lalthlengliana a ni ang a, a dawtah Pu K.Liantlinga a ni ang a, a dawtah Dr R.Lalthangliana a ni ang.

**Pu B. LALTHLENGLIANA** : Pu Speaker, Minister zahawmtak, Education Minister Department-ah hian consultative committee member zing ami ka ni ve a, education-a zawhna han zawh fo pawh hi a inthlahrun awm ve angreng viauva, amaherawh chu hetiang lam hawi zawng hi committee ka attend ve chhunah hian sawi anih ngai loh avangin ka bang bova, Bial kan kalin harsatna mipuiten min lo hrilh si thin a, chuvang chuan rorelnaah hian ka zawt lo thei lova, Education Minister pawh khan min hrethiam sela ka duh a, chuan cabinet meeting-in Post 270 phal sak an nih lai a, Post 140- chauh recruitment ti a nih hi enge a chhan ? Zirtirtu hi Post 140 lak a nih khan indaih tawh turah in ngai nge ? DP&AR lam hian an lo remti lo em ni ? Post 270 kha lak full law law ava tha ve, thingtlang kilkhawrah zirtirtu indaih loh vangin harsatna namen lo kan tawh si a tih kha ka zawhna nisela.

Tin, SSA atanga Post 287 pek ani tih a rawn chhanna a ni bawh a, khang zawng zawng nen khan lak ni ta vek sela, sikul engzat nge la cover loh ni ang

tih ka zawt duh a, tin chutiang bawk chuan sikul room kha 287 sak zawh tawh a ni a, 349 hi sak mek a ni a, sak loh engzatnge la awm tih ka zawt a. Ka bial chung Khawbung Middle Sikul II a tualzawla a chung silpaulin, a bang hnahchhawl an hman vaivut khu kara naupang ho zirtirna, building kha sak tawh zingah a tel nge sak mekah nge la sak loh hrim hrim zingah tih kha, ka zawt duh a, Fur chhe hnuai vaivut leh thli thaw hnuai naupang khatianga zirtir chu a hrisel lovin naupangten an that loh phang ang tih a hlauhawm a, chuvangin sak zawh thuai ni thei se. Tin, ka bial chungah Middle Sikul tam tak a awm a, chung chu Minister hian min theihngihl lo se tih ka han ngen nawn leh a; Khawbung Middle Sikul bik kha sak zingah a tel em ? tih ka zawt a ni.

**Pu K. LIANTLIANGA** : Pu Speaker, ka lawm e. ka zawh duh chu tuna ka hmaa an sawi ang khan consultative committee member kan ni a, a hrehawm angreng khawp a, amaherawhchu, helai ka'n zawh duh chu, hmanna Consultative Committee kan neih pawh khan, PPP mode chung- chang kha agenda-ah khan kan ngaihtuah a, khatah khan tih loh nise kan ti khan ka hria a, mahse tunlai hian deficit sikul ho leh addhoc grant-in-aid leh lumpsum grant-in-aids zirtirtu ho hi an buai riau mai a, rules thar siam kha kalpui tum a ni awm e an ti a, kha khanin rules dang deficit Rules leh addhoc grant-in-aid leh lumpsum grant Rules ho kha a repeal vek dawn niin an sawi si a, kha kha tih loh tur khan ngaihtuah niin ka hria, zirtirtu tam tak, sang chuang lai an ni ang a. An dinhmun tur hi engtin nge, chiantakin min hrilhfiath thei em ? tih kha ka zawt duh a.

Ka zawhna pahnihna tur hi chu ka inthlahrung angreng khawp mai a, ka bial chung thil a ni a, ka bial chungah sawn ME School a awm a, kha mi building kha nikum budget session khan kan Minister zahawmtak khan a building ni se tha turin assurance kha a pe tawh a, waviin thlengin tih loh a la ni a.

Ka han sawi duh pakhat chu, waviin hian kan officer rualte awm khawm hun lai a ni a, zawhna leh chhanna hun hi. House-a assurance kan Minister-ten an pek tawh hi thla thum chhunga tih hman loh anih chuan ziakin extension an dil tur a ni tih chu Parliamentary Practice-ah a awm a, hei hi tihchian nise a thain ka hria a. Kan officer zahawm tak takte pawhin a in-charge Minister-ten an lo tiam tawh chuan, tha taka tihtlang kha thain ka hria a, chu chuan kan Sorkar chakna tur leh hmasawna turte a hrilin ka hria a ni. Tin, a neitu vek kan ni a kan vaiin, tumah a neitu lo kan awm lova, Sorkar hnathawkten House chhunga thusawite phei hi chu ngaihpawimawh lehzual ni sela. A chhan chu proceeding hi thla 6 hmain a chhuak mang lova, House chhunga thusawi hi, a chhuah hma khan thla 3 alo ral hman tawh thin si a. Khami hnuah khan Department lam atangin Assurance Committee khan a zawt ta chauh si a, an inchhan let tawn meuh kha chuan, a kum a kum a lo liam mai dawn a, khatiang a nih avang khan helai hi chu ngaihpawimawh theih tawh nise a thain ka hria a.

Tin, tukinah pawh khan kan zawt dawn a, Education Department hi zawhna a chhuah tam em avang khan, kan officer-te ho pawh zawh kan tum a, tumah ka phone chhuak thei lo a ni. Engati nge ka hre lova, office hour-ah lo te pawh han biak theih awm tak niin ka ngai deuh a, kan Education officer-te



phone chhuak thei ila chuan zawhna pek kher pawh tulin ka hre lova, amaherawhchu anmahni ka biak pawh theih si loh avangin loh theih lohin, he zawhna hi ka'n zawt a. Hengte hi engangin nge hmalak an nih ? tih kha Pu Speaker ka'n zawt duh a ni e. Ka lawm e.

**Dr. LALTHANGLIANA** : Pu Speaker, ka lawm e. Kan lo lak ve tawh hrepna a ni a, kan Minister pawh a khawngaih thlak awm viauin ka hria a, hah pawh a hahthlak a, a Department chan hi. Ka zawh duh pakhat engemaw lek a awm a. Hei kuminah class VIII kha Middle-ah kan han beh tir ta a, amaherawh chu tuna zawhna chhanna kan han ngaihthlak atanga thil chiang deuh chu, a zirtirtu kha hei July thla tawp lampang a ni tawh a kan la la bawk si lo a. Engtin nge ni inpeih lo em em a school building pawh khatiang anga la sak mek tih vel bawr, kumina kan tan rum rum kha, hei hi a fel lo deuhin ka hria a, kha kha a chhan kha ka zawh duh a ni. Tin, chumi piah lamah chuan zirtirtu khatianga a nih dan tur anga lak lawkna awm si lova, hei July thla tawp kan kal mek tawh a, engtin nge zirtirna kha a kal tak mek dan hi tih kha ka zawt duh a. A chhan chu quality education kan kalpui mek laia zirtirtu an nih dan tur anga kan pe thei silo kha thil serious tak niin ka hria a. Chu chu min chhan theih chuan ka zawt duh a.

Tin, a dang leha ka zawh duh chu, heng sikul-ah hian naupang chhun chaw, mid-day meal hi pek an ni em? Pek lohna sikul lo awm ta se, hre ta ilarawn report ta ila, eng action nge Sorkar hian a lak dawn tih kha ka zawt duh a. Chuan a tawp berah chuan Pu Speaker, nikum bawr vel kha niin ka hria, a hun ka hre ta chiah lova, Primary zirtirtu tam tak khan interview leh written test kha an neiin ka hria a, kha kha tun thleng hian result a la chhuak lo nge ni, kha kha enge a chanchin ta tih ka zawt duh a ni.

**S P E A K E R** : Chhang turin a changtu Minister Pu Lalsawta i lo sawm ang.

**Pu LALSAWTA, MINISTER** : Pu Speaker, Member zahawm tak Pu B. Lalthenglina leh Pu K. Liantlinga kha Consultative Member an nih avang khan inthlahrunna turah ka ngai lova. A chhan chu Consultative Committee-ah hian policy leh programme chungchangte kan sawi avangin a mal neuh neuh harsatna hi kan sawi hman lo thin a, chuvangin, he House Member zahawm tak an nihna angin khang kha chu an privilege a ni a, an ti thei em em turah ka ngai a, inthlahrunna tur awm chiah ka ngai lo a ni.

Tin, Pu Thlenga han zawh belhna engatinge 140 chauh tih kha chu 270 hi Middle School, High School leh Higher Secondary School zirtirtu tan an ni a, 140 hi Middle School chan a ni a, a dang kha High School-te leh Higher Secondary-te chan a ni a, a vaia belhkhawm kha 270 a ni a, kha kha min lo hriatsak selangin, Middle School chauh hi helaiiah hian zawhna a nih avangin Middle School chauh hi 140 a ni tih kha ka han chhanna a ni a. Tin, "Pawl 8 Middle School-a dah thlak hi engatinge inpeih lo taka in tih le, inpeih lohte chuan tih loh mai awm", tih anga han ngaih theih rum ruma han

sawi kha a awm a. Hei hi keimahniin, “ti ang u” kan ti mai a ni lova, ‘Right of Children to Free and Compulsory Act, 2009’ hian ti turin min ti a, a programme-te min monitor reng a, chuang chuan, keini pawh hian notification-te leh dante siam belhin a tul anga amendment-te siam belhin Right of Children to Free and Compulsory Act-in a phut ang hi kan ti a, chumi zingah chuan Pawl 8 Middle School-a dah thlak hi a tel a. Tin, inpeih lo lutuk hi kan ni bik lem lo, kan ti tha ve viau a ni. Chuang chuan, inpeih lo lutuka ti rum rum kha chu kan ni lem lova, tih tul kan ti a, danin tul a ti baw a, chuang chuan, kan ti a. Amaherawhchu, tuna kan han ngaihthlak tak ang khan heng Middle School zirtirtu tura 140-te kan han lak mai theih lohna avangte hian kan mamawh tur angte hi han vuah zung zung tur zirtirtu kan nei taw k lova, chuang chu a ni ve baw a. Tin, 140 hi nei pawh ni ilangin kan duh ang hi chu kan la nei dawn lo hrim hrim a.

Tin, Member zahawmtak Pu Thlenga’n a rawn sawi Khawbung Middle School II chungchang hi kumina sak mek 349 ah hian a tel ka ring a, an la sa hman lo anih ka ring zawk a. A chhan chu a hmaa kan sak tawh ho hi chu an sa tha ve angreng viau a. Amaherawhchu, Pu Speaker, hetiangah instruction chiang tak saptawng pawh duh taw k mai lova zotawng nena kan han tih chung pawh hian kan thu lo dawngsawngtu thenkhat School thenkhatte chuan thu an lo dawngsawng sual thin a. A pawisate a tam deuh hlek hian School pumpui lo thiat a, a thara sa mai tawkte an lo awm palh nual mai a, apawi khawp mai.

**Dr R. LALTHANGLIANA** : Pu Speaker, sak lo ni ta se, a school neituten an sa nge contract in an sa ?

**Pu LALSAWTA, MINISTER** : Pu Speaker, contract-in an sa ang tih emaw, a School neituten an sa ang tih emaw hi kan chhang thei lova. Amaherawhchu a school kha a pawimawh ber a, a satu lam kha a pawimawh berin ka hre lova. Zirtirtute hi contractor-ah kan siam ang tih hlauhna hi kan nei lian khawp mai a. Zirtirtu thenkhat, zirtirna lama tui hman lek lova, Headmaster-te pawh, kha lama buai ta hi kan hre nual a, enquiry lak ngaite. Chuang chuan a tha lai taw k hi hriat thiam a ngai a. Mahse a neitu takin an tih hi chu a la tha zaw ber lawm ni te kan ti a. Chutiangah chuan hemi 349 kan sak mek ni lo, a hmaa kan sak thenkhatah khan, a pawisa tlema a lo tam deuhah khan, an school luah laite a vai vaia lo thiat a, class room pakhat siam belh mai tur si lo thiat vek mai, han sa leh dawna sa zo leh thei lo taw k te hi an lo awm nual mai a, kan sawi chiang taw k lote pawh a ni ang a. Engpawh ni se a hmaa sa tawh ho hi chuan an sa tha viau a. Tunah hian 349 an sak leh hian Sorkar Middle School hi chu kan cover vekin kan hria a. Mahse Lunglei lamah sawn 10 chuang zet mai, sorkar school ni si, kan programme-a tel miah lo hi a lo awm tlat mai a, kan han en hian, engtizia nge niang aw, kan ti a. Tunah hian district tina kan DPC-te kan zawt a. Sorkar school ni lo deuh lo sa mai taw k hi an awm a nih kan ring a. Data Capture Format (DCF) atanga kan en hian, tuna 349 kan tih leh hi chuan kan zo tawh a, zo tawh si kha Lunglei District lama Sorkar School 10 chuang zet lo la awm palh hi, khawi district emaw hi chuan Sorkar School lo hi an lo sak belh ve ngawt aniang tih hi kan ngaihdan deuh a ni a. Hei hi kan en dik mek a ni, Pu Speaker.

Tin, Member zahawmtak Pu K.Liantlinga rawn sawi, PPP mode chungchang kha, hmanah pawh House-ah ka sawi tawh a, PPP mode a nih avang hian private-te hian an tum fai vek ang tih lampang pawh a ni em em bik lova, sorkar nena tanho a khami PPP mode kalpui dan tur a ni ve tho a. Public Private Partnership-a tihah hian ‘public’ a tih hi chu sorkar a ni zawk a, ‘private’ a tih hi chu company emaw, mimal emaw, khawtlang emaw pawh hi ni ang deuhin kan han ngai tel ve a. Chuvangin tuna deficit school kan tih te, adhoc kan tih te, lump-sum-te thleng hian PPP mode chu a nih ve deuh tho hi le. Mipuite tatu tak an lo awm ve a zarah hian School tha ve tak tak kan lo nei thei a ni, tiin ngaihdante kan nei a. Amaherawhchu PPP mode kan han tiha hriat dan tlangpui hi chu Mizo hian kan la zo lo deuha kan hriat avangin Consultative Committee-in hei hi chu i bawhzui tawh lo mai dawn lom ni, min ti a. A ni awm teh tak e a, kan zawh loh na na na chuan, kan ti a. Hetah hian Pu Speaker, han sawi tel ngai chu, hei, mission deficit school kan tihte ho hi Mizoramah hian kan school thate vek an ni a, an zavai hian school thaa kan ngaih an ni a, kan chhuang a, Mizoram timawitu leh kan result tha tak tak min petute an ni a, pawimawh kan ti khawp mai a. Amaherawhchu, kan pawisa dinhmun atang hian an duh ang hi kan pe seng lo a ni. Hei hi thudik a ni mai a, an duh ang tur hi kan pe seng lova. A lehlam atanga kan ngaihtuah erawh chuan Sorkar Sikul zirtirtu ang an nih hi anmahni tan pawh hian a tha ber angem? Inpekna nen an thawh avang hian vawiin hi an thleng a ni zawk lo emaw ni chu aw? tih te hi chu kan ngaihtuahnaah hian a awm ve a ni. Sikul baihvai tak a nih atanga lo ti tang tanga, ‘Kei ka tel loh chuan he sikul hi a chhe vek ang’ tih hlauhna nen an lo tih tang tang hian sikul tha tak hi min neihsak niin kan hria a. Chuvang chuan, an duh ang hi chu tun kan dinhmunah hi chuan kan pawisa hian a daih lova. Tin, kan pawisa daih loh chhan hi he House-ah hian vawi hnih vawi thum kan sawi tawh a. Inthlan dawn kum April leh September-a school 337 dinhmun sanga han hlan kai khan a hautak em em a ni. Hei hi kan la phur ta tang tang a. Tunah hian uluk taka kan han examine-in khangah khan...

**Pu K. LIANTLINGA** : Khatilai tak kha, Mission School han tih lai leh term hmasaa school 337 hlankai chungchangah khan. Mission school ho hi kum 20, 30 lo kal tawh an nih avangin, category hran deuh hlek hian a thlir theih lo maw, Deficit an ni tho si a? tih lai kha ka’n zawhbelh chian duh deuh chu a ni.

**Pu LALSAWTA, MINISTER** : Anni kha chutiang takin khami tum khan an ti chuang lova. Engemaw zat Deficit kha Government-ah an lut a. Engemaw zat Adhoc kan tih ang kha Deficit-ah an lut a. Engemawzat kha khawtlangin anmahni tih tiha an lo tih ve tang tang kha Lumpsum-te kan pe a. Chuti chuan 337 hi a lo piang chhuak ta nawlh a. Chu chu kan la phur ta tang tang a. MNF hunah khan inthlan kum mai a nih tawh avang khan an phur hman vak lo, phurrit kha. Hei hi “MNF-in an tih theih engatinge Congress-in in tih theih loh?” tia min zawh pawh hian ka chhanna chu, “Anni khan a rit an phur hman vak lo, keini hian a rit hi chu kan phur hman a ni” kan ti a, kan chhanna thin a ni a, a rit khawp mai a hei hi. Kum khat chung hian nuai 2000 chuang hengah hian sen a ngai a. Chung avang chuan tanpui phu ngawih ngawih hi kan tanpui hleithei lova, hrehawm kan ti a. Amaherawhchu, pawisa hi chuti ngawtin a awm thut thei bik si lova, hei hi he House pawh hian min hriatpui ka ring a.

**Pu LALDUHOMA** : A chhang chiang tawh lo deuhin ka hria a. Deficit school leh Adhoc leh Lumpsum category pathumte rules pakhat hnuaiia tuna Draft Rules siam ang hian kalpui tum kha drop a ni ta nge kalpui tum zel a la ni tih lai kha Pu K. Liantlinga zawhna kha a ni a. Khami hre chiang duh kha sikul tam tak, khaw tam tak tunah hian an awm a. PPP mode-a kal kha chu a tha em em a. Amaherawhchu, khami an Draft Rules-ah kha chuan Headmaster-in kum khata a hlauh zat pawh ni lo te kha kum khata sikul pumpui pek an tum kha a nih avangin an hlau em em a ni zawk a. Chuvang chuan, hei hi kaltlangpui tum a ni nge drop a ni ta? Consultative thu kha engtinng e a kal tak? tih lai kha min han hrilh chiang viau se ka va duh ve.

**Pu LALSAWTA, MINISTER** : Pu Speaker, khatia an rawn zawhbelhna atang khan a chhan dan tur pawh a hriatthiam a awlsam ve deuh hleka, heng ho hi a dan ang hian sikul tha kan nei thei lo ang tih hi sawrkar ngaihndan a ni. A nihna chhan chu dan ang lovin maimitchhing chungin sikul tha kan neih theih nan kan tang tang tang a, sawrkar hmasa pawh an tang tang tang a. A Dan angah chuan Mission School-ah hian Selection Committee-ah hian Chairman-ah DEO-te an nih a ngaia mahse maimitchhingin Moderator-te kan nih tir a. Transfer chungchangah te pawh Managing Committee-te hi a Danah chuan sikul pakhat zelah independent-a an mahni thliah thliah ding tur an nih laiin Synod sikul engemaw zat awmte pawh inkaihrawlhin inter-transferable-te pawh an nei theia, an neih theihna chhan pawh Danin a huam loh vek a ni a, chung avang chuan hetiang sikul tha kan neih theihna chhan hi kan Dan pawna kan ‘operate’ vang a ni a, chuvangchuan, “A Dan zawk hi i siam tha ang u”, tih pawh hi kan sawi dan a ni a. Mahse tuna kan ngaihthlak tak ang khan hetah hian kut pawh kan thlak hman lo, hma kan han la dawn a, ralkhat atang ten min tawngtai khum a, min han nawrh khum bawh a, chuvang chuan keini tan chuan kal zel pawh hi a tih chiin kan hrelo a, a Dan hi chu kan siam that loh a, Dan anga kan kal chuan kan sikul tha tak tak, Synod school-te, Roman Catholic School-te school tha a nilo ang tih hi kan hlau khawp mai. Selection Committee, zirtirtu thlanna ber leh zirtirtu chungah thu neiturte kha DEO te te sawrkarte an nih khan chuan a tha dawnin kan hrelo a, chuvang chuan, “A Dan zawk hi chu siamthat a ngai mang e”, kan ti a. Tin, he House-ah hian chiang taka sawi pawh a thain ka hria a, kan Minister tirtite khan Baptist lam atangin Pastor zahawm tak pakhat alo kala. “Kan sikul zirtirtu kan neih, Kohhran kan neih kan pekte leh nangnin in pek hi an hlauh a insan hleih a, chuvang chuan a pawisa hian min pe tawp mai ula, keini hian rualkhaiin hnathawh inang te hi chu hlawlh inangte pawhin kan lo siam ve ang chu mawle”, a ti a. Amah mai emaw ka tih laiin Synod lam atangin Pastor pension pakhat alo kal bawh a, chutiang chuan min rawn ti ve leh a. Mizoramah chuan kan kohhran liante an ni a, an thu hi ngaihthlak a pawimawh hle ang kan ti a, kan rilrua a cham reng avangin he Dan hi, keini chuan siamtha ila, a pawisa lam hi tum ila, a thuneihnate a enkawl chungchangah hi chuan kohhran a nih chuan kohhran, khua a nih chuan khua, community empowerment-te pawh hi a tul a ni lawm ni, tih ngaihndan neiin he Dan hi kan han buatsaih chhin a, mahse khati taka dodalte anih avang khan kalpui zel chiah ka ngai lo a, kan Chief Minister hova kan thut hova, an mahnite tela kan tihnaah chuan. “Kan chawlhsan rih pawt ang e”, kan ti a, amaherawhchu kan chawlhsan lai hian Pu Speaker, a then lai ang tal kha chu thuneihna an neih chungchangah te khan chuan a Dan hi chu chingfel leh ila chu kan duh khawp mai a. Chutianga nih loh chuan tunah hian Chairman-a DEO te emaw sawrkar officer dangte emaw an va nih chuan mi zahawm takte emaw an la ni ve thei a, an duh ang zawngte an lo ngaipawimawh lo theilo anga, mahse

kohhranin, kohhran sikul an enkawl anga an enkawl hi a enkawltu an zahawm a, an mitmei ven a na bawk a, sikul tha kan neih chhan hi niin kan hriat bawk avangin a dan hi chu engemawchen hi chu kan siamthat tho tho a ngai dawn a, Dan kan han khawih hlek dawn a, min lo zar buai lutuk lo turte pawh khan ngen te pawh ka duh a ni, waviinah hian.

Tin, Pu Liantlinga sawi pakhat assurance a pe tih chungchang kha keini lamah hian assurance pek ang zawnga min rawn remind hi a awm miah lo a ni maithei a, heti zawng hian kan hre mai lova. Chumi pawh a ngai lova ti mai tur ka ni tho tih pawh ka hria a, mahse kan lo ti lo anih chuan min ngaidam se. Republic Veng ami niin ka hria a, hei hi chu waviina kan sawi vangte pawh hian kan tih tur hi chu tih nghal a ngaiin ka hria.

**Pu LALTHANSANGA** : Pu Speaker Assurance chungchangah khan hei ni e, Assurance Commtee Chairman ka nihna ang pawha sawichhuak awm tak ka ni a. Hemi follow up assurance hi 35 lai a awm a, chumiah chuan kan lo enzui ang, kan lo ngaihtuah ang, hei hi tih mek a ni tih ang zawng zawng kha assurance kha a ni a, hei waviinah kan department hotute awm laia ka sawi duh chu, hei hi a response hi kan hmu lo reng reng a, tin, tam tak kan va pek pawh hi min rawn ti lem lo a ni. Pu Speaker, kan Minister zahawm tak department nilo khan a vai thu reng reng hian, hetilai hi engtin emaw kaldan tha zawk deuh zui hi ava'n tha em, hemi follow-up assurance-te pawh hi department tin hian han enchiang lehin thla thum chungga a chhanna min rawn pek hman loh pawhin Assembly Secretariat-ah extension kha rawn dil thin se tih kha ka sawi tel duh deuh a ni.

**Pu LALSAWTA, MINISTER** : Pu Speaker, tuna mi kha a pawimawh khawp mai a. Hetia mawhphurhna kan han neih ve chinah hian Assurance Committee-in hei hi tih tur a ni e a tih hi department-ah hian pakhatmah kan la hmu lovin ka hria, mahse kan hmuh loh avangin thiam thu sawi theih a ni lova. He House-ah kan tiam anih miau kha chuan mahni mimal pawn hre tur kan ni tho thova, a process leh a procedure kha chu House mawhphurhnaah ngai ta ila, Member zahawmtakte sawi kha a dik khawpin ka hria a. Chuvangin Republic Middle School chungchangah kha chuan tunah hi chuan kan hrechiang ta a, kan tih tur, kan tih theih chi anih kha chuan. Amaherawhchu, khulai khu ka hriatsual loh chuan khawilai emawa pawisa awm remchang dap khawm mai a tih ni deuha hriatna ka nei deuhva, ka hrechiang lova Pu Speaker, khati anih chuan a scheme-in cheng chuti zatte a tih lem loh chuan assurance-a han tih hleihtheih kha a ni lova. Engpawhnise, enfiah tur chuan waviinah hi chuan ka tiam a ngai a ni.

Tin, member zahawm tak Dr. R. Lalthangliana rawn sawiah khan zirtirtu la lak loh chungchang kha a dik a. amaherawhchu hetia implementation of right of children to free and compulsory education act, 2009 kan tih hian Central lam atang khuan a pawisate min rawn tum sak lem lova, keimahni hian kan thiam ang ang hian kan sual ngawt ngawt mai a, kawng hrang hrangin kan theih ang angin khatia pawl riat an han awm belh takah chuan. Pawl riat an awm belh khan pawl kua leh pawl sawm kha zirtirtu chu an lo

buk deuh tura kan ngaih lai hian indaihlo hi an la awm tho bawk a, hetiang thil hi arithmetic-in chawh fel mai theih anih ka rin loh nachhan chu NEHU-ah P.U. a awm laite pawh khan pawl 11 leh 12 kha High School-a an han awm tak khan College kha indaih hle tawh awm an ni a, P.U. Zirtirtu kha an chuang reng reng lova. Vawiinah pawh hian Middle School-a pawl riat a han awm tak hian High School hi indaih viau awma lang hi a indaih phah chuang reng reng lo mai a. Helai hi chu engpawhnise, a hmaa ka chhan tawh khan a keng telin ka hria a. Zirtirtu nei lo na na chuan an neih theihna turin kan buaipui mek tih kha Pu Speaker ka sawi theih a ni a.

Tin, Mid-day Meal chungchangah kha chuan a cover theih chin chu Sorkar Sikul te, SSA tena Sikul an enkawlte ho kha a ni mai a. Chuvangin, private-ah te pek tumin thawkkhat lai kha Central lam Officer-te lo kalin private-ah, tribal area-ah chuan kan pe thei a nia an ti a, phur takin kan puang ngawt a. Mahse, kan zuk zawh leh thin pawh hian beisei aiin an tuan a muang a, Sorkar Sikul a ni emaw, Private Sikul a ni emaw Mid-day meal hi chu pek vek theih kan duh a. Tuna a awm danah erawh hi chuan Mid-day meal hi Sorkar Sikul-ah chauh kan pe a ni.

Tin, VRS Teacher hi VRS tiin an sawi chiah lo nain Primary School, nikum lama Exam tir tawh chungchang kha, hei hi kan buaipui a. Interview te pawh kan han ti dawn a. Amaherawhchu, Sorkar department lam atangin Finance leh DP&AR atangin, “Zirtirtu hi kan ngah viauin kan hre si a, endiktu Study Team insiamin chumi chu lo nghak lawk rawh u” an tih avangin interview tura tun thla kan han buatsaihte pawh kan han chawl lai lawk leh ta hrih a. Chuvangchuan, 193 Primary Teachers kan lak turte kha kan chawl leh lai lawk ta hrih a ni Pu Speaker.

**S P E A K E R** : Chuan minute 4 a la awm a, Zawhna no. 93-na zawt turin Pu T.T. Zothansanga ilo ko ang.

**Pu T.T. ZOTHANSANGA** : Pu Speaker ka lawm e. Ka zawhna Starred Question No. 93-na Hon’ble Minister for School Education Department min chhan atana ka zawhna chu hei hi a ni. Kum 2009-2011 chhung khan SSA/RMSA hnuaiah Zirtirtu leh a dangte hna engzatnge lak a nih? tih a ni.

**S P E A K E R** : A chhang turin a changtu Minister Pu Lalsawta ilo ko ang.

**Pu LALSAWTA, MINISTER** : Pu Speaker, tukin zing chu keima chan a ni vek mai dawn niawm a ni. Member zahawm tak Pu T.T. Zothansanga zawhna - Kum 2009-2011 chhung khan SSA/RMSA hnuaiah Zirtirtu leh a dangte hna engzatnge lak anih? tih chhanna chu hetiang hi a ni. Kum 2009-2011 chhung khan SSA hnuaiah Zirtirtu leh thawktu dang 1974 lak an ni a. RMSA hnuaiah Zirtirtu leh thawktu dang 429 lak an ni. An vaiin 2403 tih kha a ni.

**S P E A K E R** : Zawhbelhna Pu T.T. Zothangsanga, Pu Lalduhoma, an zawt hman em ang chu maw, han zawt zung zung sela.

**Pu T.T. ZOTHANSANGA** : Pu Speaker ka lawm e. Hei Education-ah hian change pawimawh deuh mai kan nei a. Kan term hmasaah kha chuan hna an han la dawn a, Block President hi an bawh ruih ruih mai thin a. Exam kha a awm mang si lova, a tihchi angreng fu mai (a ruling tan khan). Tun tumah erawh hi chuan hei mumal takin an la niin ka hria a. Tun tum RMSA an lak Champhaiah khian an Zirtirtu thlan hote kan en kan en a, anmahni pawh ka zawt a, an Headmaster-te. “Tun tum chu khawi hmunah pawh awm se zirtirtu an thlan tharte hi, mi zahpui awm lo tak tak leh tha tak vek a ni an thlan ni” an ti a. A tha tha kha an la a, tunah hian an lungawi tak zet a ni tih kha ka sawiduh a. Ka zawh duh chu, High School building tuna kan sak mek khi June thla vela zo tur ang tih kha a ni a, hei kan la zo lo a, 2<sup>nd</sup> installment an han pe tan mek a ni a. Engtika zawh theih tur nge ni ang, pawisa a awm em ? tih kha ka zawt duh a. A pahnhnaah chuan Education Department-in hna a lak reng reng hi advertisement tih vek a ni em? Exam conduct vek a ni em ? Personal Interview neih vek a ni em ? tih kha ka zawt duh a ni.

**Pu LALDUHOMA** : Pu Speaker, Chawlhmun High School ah khuan Hindi teacher pakhat kan nei sa a, kan dil ni miah lo in min rawn pek belh a. An lo indaih lo viau anih chuan kan theh chhuak thei a nia tih kha ka zawhbelh hmian ka sawiduh a.

Hei RMSA hi a duh viau leh a mamawh viau kuate an awm a, a lawmawm a. Amaherawh chu a duh lote hi pek luih talh loh theih a ni em? Keini Zotlang High School-ahte khuan kan dil ni lovin min rawn pe a. Kan Headmaster-te, kan IV grade-te zawng zawng kha RMSA hnuaiyah hian accommodate theih an ni lova, hna kha dil pawh an dil ve thei lova. Tin, lo dil pawh nisela anni chu, uluk taka Selection Board-in a lak, increment nei an ni a, RMSA-ah chuan contract basis-in kum tin fixed pay a ni a, an hlawh aain a hniam hrim hrim a, khata thawh kha duh ngaihna a awmlo reng reng a. Chumi a duhlo school-te kha chu min rawn tih luih talh kha a tul lem emaw ni le ? Lumpsum school 83 tunah hlawh pawh la thei lo, kumin chhunga hlawh pawh la la lo reng reng an awm a. Chungte chuan RMSA nihte chu an thlahleh viau dawn lawm ni ? Khatiang khan a mamawh leh a duhte hnenah khan pek nisela. School lo awmsa, changlung tawh sa, zirtirtute pawh hlawh sang zawka lo awm tawh sa banna tur leh a Managing Committee-te pawhin an duh loh barh lui lo hian siamrem dan a awm thei a ngem tih ka zawt a ni.

**S P E A K E R** : Zawhna awmsa tal kha chu Minister in han chhang zo sela. Zawhbelhna lam erawh chu kan la thei tawh lovang.

**Pu LALSAWTA, MINISTER** : Pu Speaker, a zawhna neituin a rawn zawhna June thla chhung hian sak zawh tur tih a ni a. mahse hei an sa zo lo chu a ni a. Engtikah nge an sak zawh theih ang kan High School-te tih kha. High School sak hi kawng hnihin a awm a. Pakhat hi chu a thar diaia sak, 23 kan nei a. Tin, a dang 154 hi a awmsa sak that a ni a, strengthening an ti a. Pawisa tam fu nuai 6000 dawn lai 6000

a pel nghe nghein ka hria a, avai chuan, chutiang chu sen a ni a. Tuna kan sak zawh hleih theih loh chhan hi 2<sup>nd</sup> installment hi a pawisa kan la hmu hlei thei lova, chuang chuan a thawktu te hnenah hian kan la pe thei lova, keimahni lamin a sak zawh hun tur chu chutiang ang ani kan ti chungin a pawisa, a sakna tur ber kan pek leh hleihtheih loh avang hian a tur pawh kan tur na vak thei chuang lova. Tin, Academic session-te nen hian heng thilte hi a in chingchi vet vek a, thil hmanhmawh ngai chi pawh kha alo ni hranpa tawh lova, nakum lamah te luh theihna tura kan buatsaih chuan a tawh hle ang a, engpawh ni selangin, kumthar 2011-2012 a kan sak leh tur 32 te nen a intihbuai loh chuan chuti lutuk chuan hmanhmawh lo ila, a satute lampang a pawisa lamah an mamawhna avangin tur viau mah ilangin keimahni Education Department-a kan kalphungah chuan harsatna min thlen lem lovin kan hria a. Amaherawhchu, sak tawh angreng ni si sak zawh mang loh hi mitam tak an lo tlangnel thin a, hman loh loh ten an lo hmang a, tin, darthlang leh eng eng emaw an lo tihchhiat thin avang hian sak zawh thuaia kawng dang tal pawha luah theih tur hi buatsaih kan tum a ni.

Tin, RMSA leh SSA chu frame work hmang a thawk kan ni a, a frame work hmang hian Executive Committee kan nei a, Chief Secretary hovin. Chuti chuan kan phak ang tawh hi chuan kan ram Sorkar thuvawn 'Rorelna dik chu luipui angin luang sela' tih ang deuh hian tih hi kan han tum ve zel a. Amaherawhchu, a lo dawklak rei tawh a, kum sawmnga, sawmruk chuang alo dawklak tawh avang hianin han tih teh thut hi chu a harsa khawp mai a. Advertisement tal hi chu i ti teh ang u kan han ti a, exam te interview te pawh a theih ang tawh hi chuan i ti ve hram teh ang u kan han ti a, chung karah chuan fel hlel, duh ang tawh tling lo deuh hi chu a awm ve palh tih pawh kan han hria a, a pawh kan ti a. Ennawn ngai, verification ngai te pawh kan han nei hi a pawh kan ti khawp mai a.

Tin, tunhma deuha an tih dan, sorkar hmasa angah kha chuan chutiang ang tehchiam chuan an ti lem lova, amaherawhchu, keiniah chuan theih ang tawkin tih han tum ve phawt ila, kan tlin tawh hi mipui tana hlawk takin kan ti a, kan han ti ve mai chu a ni a. Tin, Pu Speaker, kan Member zahawm tak Pu Lalduma'n a han zawhna chungchang leh Zirtirtu a thehchhuah theih chungchang kha a lawmawm khawp mai a, a chhan chu Hindi teacher chungchang hi sawi deuh te pawh hi a tulin ka hria a, zawhna chhanna hun a ni bawh a. Hetah pawh hian zawhnaah hian a awm thova, chutah chuan 500 kha sorkar hmasa hun khan an la a, inthlan dawn kum khan 687 lak mai theih tur khan a tlingte tarchhuah a ni a, 500 te tan khan sanction hi a awm zui tak loh avangin kan kal zui zel thei ta lova, 687 te tan a an tih pawh kha kan zuk bawhzuina lamah hian sanction vawikhat chu a awm nain a scheme-ah khan chiang deuh maiin an lo ziaa a Upper Primary, Middle School, High School leh Higher Secondary School tan tih kha alo ni a, helamah khan Primary hli mai kha kan lo la si a, chuang chuan min entertain ta lo hrim hrim a, tuna kan han lak thar leh pawh hi Middle School leh High School atan kan la ta hlawm a. Chutah chuan engatinge a hma ami a chawl ta te kha in lak loh an tih pawh hian kan chhanna chu", Anni ho kha kan la lo ngawt a ni lova, Middle School lak tura qualification nei kha chu an dil a, hmute pawh an awm tho a, chu chu han sawifiah nghal a thain ka hria a, Adhoc teacher leh RMSA teacher chungchang hi he House zahawm takah hian sawi a tha khawpin ka hria a. Adhoc teacher ho hi kan ngaihthlak



tak ang khan mumal taka lak an ni a, increment-te an nei a, an hlawh bituk dante pawh Sorkarin dan hmangin a ti chho a, RMSA a lo awm takah hi chuan kan pawisa indaihlo lutuk nen hian RMSA a tullo tawp a School din ang tur ai hi chuan, an mamawh ngawih ngawihnaah hian din ila, insiamrem thei ila chuan, anni lam pawh hian dil ve hram se, an service conditionte chu khatiang kha a ni a, chuti chung chuan dil ve hram se an tlin chuan la zel ilangin, keini tana 337 kan phurh te zing a mi, ko chhawkna kha anih theih takin tiin keimahni tawh tawkah ruahmanna leh hetiang duhthu sam hi kan lo nei ve a. Amaherawhchu an duhloh thu chauh pawh nilovin an duhlo tute Association-te in siam vein an rawn thlen a, an duhlo pawh kha an mahni ngaihtuahna atang chuan a awm tho a, Sorkara sum lam hautak phurtu tan chuan RMSA hi chuan a tlangpui thuin Peon-te thlengin an lo nei ve thei a, nakin lawkah Head Master-te hi kan nei ve thei dawn a, han siamrem hi chu kan duh a, nimahsela Pu Speaker, siamrem hi chu a har khawp mai a. He House-a kan sawi tawh angin kih hnawh mai nilovin a phuna phun hnawh, mi career neiin an lo awm tawh a. Mi engemaw zat an lo awm tawh a, an future-te an ngaihtuah ve a, khang ho kha han senghawi thiam hi a har em em mai a. Kan thiamna pawhin a tlinlo a ni deuh lawm ni chule kan ti rum rum a.

**S P E A K E R** : Zawhna leh chhanna hunah kha chuan duhtawh mai la, i chhanna kha, nakinah demand hunah, wind-up hunah Member-ten an rawn tih kher loh pawhin i wind-up vak dawn nia.

**Pu LALSAWTA, MINISTER** : A zawh vang khan ka chhang mai a nia Pu Speaker. Chung vang chuan hetiang hian chinfel kan tumna hi an la hrethiam chiah lova. Tin, an duhloh zawng tak pawh a ni maithei a ni. Ka lawm e.

**S P E A K E R** : Kan zawhna leh chhanna hun a lo zo leh ta a, vawiinah hian kan Member-te pahnih Pu J.H. Rothuama, Minister Delhi-ah Committee-in a kal a, tin Pu Joseph Lalhimpuia hi Lunglei lama Bank pahnihna HDFC, High Power Chairman anih angin sawm a ni a, vawinah a va hawn sak dawn a ni. Kan member zahawm tak Pu S. Laldingliana pawh hei vawiinah dam takin a hmek kan hmu a, a lawmawm e. Tunah chuan Paper lay-na kan lo nei ang a, Pu H. Rohluna, Minister zahawmtakin July 15, 2011 a Unstarred Question No. 10 ballot No. 13 Pu Nirupam Chakma zawhna, Ration Card leh buhfai chungchang tihdikna House dawhkanah rawn lay sela, i lo ko ang.

**Pu H. ROLHUNA, MINISTER** : Pu Speaker, i remtihna leh House remtihna Pu Nirupam Chakma, Member zahawm tak Unstarred Question No.10-na July ni 15, 2011 a chhanna tihdikna chu House dawhkanah ka rawn lay e.

**S P E A K E R** : A copy kha han sem rawh ule. Budget General Discussion kan lo chhonzawm leh ang a, niminah khan Member 12-in an sawi tawh a, nimin lam kha hun kha kan inpe thawl tha angreng viauin ka hria a, minute 13 vel in han sawi khan hemi a bell pakhat zawk hi ka han tiri a, tichuan minute 15-ah kha chuan hemi electric bell lam zawk hi ka han tiri a,

mahse thenkhat kha chuan in ngaipawimawh a, inthuh nghal deuh chat thei a, a then erawh kha chu in la vanglai chho mek emaw tih tur kha a ni a. Mahse khathi laia inkhap kha a hrehawm a. Demand kan sawi hunah mahni bial lam pawimawh kan tih kha chu kan la sawi ang a, wawiin erawh chu General Discussion hun a ni tih kha hrereng ila. Kan budget hian khawilam nge min hawipui, Mirethei lam changkanna a sawi em, zirna lamah hmasawn turin min hruai em, Sports lamah engemaw kan thalaite hmakhua lam a hawipui, tihte, nikuma kan awmdan angkhan kan la kal bek bek anih hi maw tihte, hetilaiah hi chuan kan hnungtawlh dawn anih hi mawle, kan budget hi le, tihte. Khang kha general discussion-ah hi chuan kan sawiho dan tur niawm tak a nih ka ring a, ngaihnam deuhkhan han sawi leh ila. Tunah chuan Pu Lal Thanzara a phar hmasa a, ilo ko ang.

**Pu LAL THANZARA** : Pu Speaker, kan Finance Minister zahawmtakin budget arawn pharh leh a speech kha budget thatak a nihna rawn sawichhuah leh rawn thlawp a, he House hian kan pawm turin ka'n chhawpchuak ve duh a. Nimin lamah Member zahawmtak takten thil tamtak an sawi tawh a, wawiin-ah hian sawi tur tamtak a awm tawhloin ka hria. Tin, hemifacts and figures lampang phei hi chuan sawi vak pawh ka tumlova. Chutih rualchuan Economic Survey Report 2010-2011-a a landanin Mizoram ngei pawh hian kan economy 9.57% in kum 2010-2011 chhungkhan a thang tur anga chhut a ni a, chu chu India ram pum economy than dan tur 8.56% aia sang zawka a ni, a ropuiin a lawmawm hle a, beiseina sang tak hei hian min siam a, chutih rual chuan Industries leh Agriculture Sector –ah te tanlak leh zual a ngai a ni tih chuheta tang hian a lang thei a, churang tak chuan kan flagship programme NLUP kan ram hruaituten an lo siam hi a tul zia leh thil tih tur ngei a nih zia a tilang chiang hlein ka hria a. Tin, a technical lai thil pakhat chuan helaia kan hmuh ang hian kan State sum economic lama hma kan sawn theihna tur leh uluk zawka a hmanna lam te pawh kalpui a nih theih nan sorkar hian theihtawpin hma a la zel a ni tih he budget-ah hian tarlan a ni a.

Chumi bakah chuan 13<sup>th</sup> Finance Commission-in Department relief 79.51 crore lai min pe thei dawn niin a lang a. Hei hi a lawmawm em em a, chutih rual chuan a State lampangin hemi hmuh theih nana tih tur kan neih a rawn tarlante zingah Fiscal Deficit 3% of GSDP kum 2014, leh 2015 ah kan pawthniam thei tur a ni tih condition a siam laiin, Budget Speech para 37 naahkhan lo lang chu kum 2011-12 atan 2.4% of GSDP ah kan awm reng tawh mai a, hei hi thil ropui tak niin ka hria a. Chumi piah lampangah chuan Pu Speaker, i rawn sawi angkhan, he Budget hian Zokhua kut hnathawktute leh mirethei zawkte dinchhuahna turin hma a la em tih chu chiang takin NLUP hi kan ngaipawimawh dawn, top priority kan pe dawn tihah hian a lang chiang hlein ka hria a. Heta tan hian cheng vaibelchhe 234.84 hman a nih tawh rualin tunkum kal mekah hian chutiang zat baw chu hman tura pawisa dah a nih leh te hi a ropui a, chhungkua 45,139 he NLUP programme hmanga kut hnathawktute tanpui a ni tawh ringawtte hi a ropui em em a ni.

Tin, kan hriat angin heng kut hnathawktute tana pawisa dah a nih bakah kan sorkar hnathawktute hlawh tur vaibelchhe 1447.72 te hi a awm a, tah hianin kan hmuh chian em em chu, heng sorkar hnathawkte hlawh tur leh an senso

bakah kan budget a kan sorkar leh kan Finance Minister-in a rawn ngaihpawimawh chu thingtlang mi retheite din chhuahna kawng zawng a, NLUP Programe hmanga hmalak chhoh a tumna hi a ni a. Chuvang chuan sorkar hnathawk hlawh hi NLUP atan dah aiin a let 6.18-in a tam a, chutih rual chuan thenkhatin NLUP ah hian sorkar hmasawna tur leh thildang pawisa pawhpen a ni ti ten an sawi thin a, mahse, vawiinah hian miretheite chanvo hi tuman thik lovin mizo mipui 60% te chanvo tur a nih avangin sawiselna tur lampang zawng lovin, a sum lo kalna pawh sawisel tur zawng lovin, khawilai atang pawh ni se lawm taka mizo mipui, mirethei, kut hnathawkte kan hmangaih a nih chuan kan pawm mai tur niawm tak a ni.

Tin, hei kan Congress Party-in inthlan dawna a lo intiam tawh angin, sorkarna kan siam chuan thalaite khawvel thar kan siam anga tihte chu budget-ah hian chiang takin rawn tarlan a ni. Rajiv Gandhi Stadium sakna mai bakah Lungleia Pu Thuamluaia khelmual a artificial grass phah lehna tur atan sum vaibelchhe tel an dah leh te hi a lawmawm tak zet zet a ni. Assam Rifle mualah kan sorkar chak tak Chief Minister leh Sports Minister tanlaknain India ramah pawh nei hmasa pawl niin Artificial Grass-te pawh phah a'n ni hi a lawmawm hle a ni. Hengte avang hian thalai infiam mite tan beiseina thar a siam bakah, hma nasa takin kan sawn phah a ni. Vawiinah hian India rama club tha thaah hian kan thalaite hi an feh chhuak mek a, heng ho hian kum khatah vaibelchhe li (4) vel hlawh chhuakin Mizoramah chung pawisa chu an rawn thawn lut a, a lar zualte phei hi chuan kumkhatah 3 lakh vel hlawh chhuakte pawh an awm tawh a ni.

Vawiina khelmual tha siam anih atang hian chhim leh hmar atangin mizo tlangval, nu leh pa thawh chhuah ring ringawtte khan football atangin nasa takin tan lak chhohna tur ruahmanna tha tak a siam niin kan hria a, tun Independence-day football-ah hian Meghalaya mi Lajong Club leh anmahni ram chung club champion-te he inkhelhnaah hian rawn tel ve turin MFA-te hian sawm tumin hma an la mek a. Chutianga kan sawm khawm chu Manipur-te, Assam Regimental Centre-te leh Shillong club lar tak Arhim-te chuan an lo hriain MFA hotute hnenah engatinge min sawm ve loh? te an rawn ti a, chutiang chuan ram dang footballer pawh kan ram hian a hip mek a ni. Arhim Club-te phei hi chuan Senso intum vek pawh an inhuam thu an rawn sawi hial a ni. Sum leh pai harsatna avangin kan duh angin kan sawm ngam rih lo a. Tin, he Lajong Club-te phei hi chu India rama I league khel thei team 14 zinga North-east atanga khel thei awm chhun an ni a. Chuta player tam zawk chu kan mizo tlangvalte an ni nghe nghe a ni. Tichuan nimin Telegraph chanchinbuah khan Lajong Club Manager chuan intithei takin, ti mai ang, Aizawlah Artificial grass-ah kan team-te Independence Day foot ball inkhel tura min sawm angin kan kal dawn a ni, ti ten chanchinbuah te a sawi nghe nghe a ni. Chutiang tak chu vawiinah he sorkar hmalakna, thalaite khawvel thara siamnaah hian keimahni mizo tlangvalte mai piah lamah India ram hmun hrang hrangah infiamna ngaina mi te, infiam thinte nasa takin kan ram lam hawiin an ngaihtuahnate a pawt peng a. Chu chuan kan ram thalaite tan hmasawna ropui tak a rawn thlen dawn a ni. Vawiinah hian chanchinbuah te kan hriat angin India ram aiawh turin mizo tlangval pathum ten football an khel mek a. Nimin piah lama an khelhnaah phei chuan kan mizo tlangval pathumte hian an khel vek a ni.

Tin, chutih lai chuan Indian Junior Team-te chu China ramah tunah hian an khel mek a. Chutah chuan Ramhlun South unau Malsawmfela leh Lalnunmawia te pawh an tel a. Tin, kan sawi tak ang khan Lunglei lamah Artificial grass kan phah a nih chuan Saiha lam atanga kan player lar, Beikhokhai te leh mi dang dang ten sawlai hmun saw an lo hmang tangkaiin kan thalai lo kal chho zel tur ten nasa takin he kan grass phah thar tur hi an chhawr tangkai dawn a ni tih a chiang em em a. Chuvang chuan vawiinah helaia kan Finance minister zahawm takin thalaite tana hmalakna tur a rawn tarlang te hi a ropui tak zet zet a.

Hmanah Pu Rajiv-a nge ni Pi Sonia lokalin kan thalaiten World class Stadium min pe la, tichuan World class player kan pe ang che an ti a ni. Chutiang chuan vawiinah kan sorkar chak takin Rajiv Gandhi Stadium-te World class Stadium puitling angin ruahmanna an chhawp chho mek a. Tunah hian a hnathawh tur tam zawk chu an thawk zo tan mek a. Chutiang zelin Lammualah kan sawi tak ang khan Artificial grass phah an ni ringawt te hian nasa takin thalaite thinlung infiamna lamah a chawk tho a ni. Sorkar hmasa khan Inthlan dawn tepah thalaite tana hman tangkai turin Assam Rifle Ground a chei dawn emaw kan tih laiin AR Ground-a inkhel entute awmna tur zawk, Gallery lampang sak tumin ropui takin a lungphumte an phum a nih kha. Khatiang khan lo tipuitling ta nise vawiinah kan thalaiten an chhawr vakin a rinawm loh. Chutih laiin vawiinah kan Chief Minister-te leh kan Sport minister-te hmalakna AR Ground-ah Artificial grass phah a lo ni te hi a lawmawm tak zet zet a. Chung chu duhtawk mai lovin vawiinah kan Finance Minister zahawmtakin a Budget-ah helam kawnga hmalak zelna tur chianguang taka a rawn tarlang hi a lawmawm ka ti a. Chuvang chuan vawiinah i vei lama thute pawh khan he Budget hi a tha ti a, min lawmpuia min pass-pui turin ka sawm a ni. Pu Speaker, ka lawm e.

**S P E A K E R** : Tunah hian sawi leh turin Pu. R. Lalrinawma a ni a, a dawtah chuan Pu S. Laldingliana a ni a, a dawt lehah Pu Lalthansanga a ni ang. Tunah Pu R.Lalrinawma i lo ko ang.

**Pu R. LALRINAWMA** : Pu Speaker, ka lawm e. Finance Minister-in regular budget 2011-2012 atana kan sum hman tur an pharha, member a hma lamah 13 in an sawi tawh a, a fakna lam a ni deuh veka, i vei lama miten an han sawi pawh duhtawhna leh engemawte a ni a, sawiselna a awm lova a lawmawm ka ti a. Kei pawhin a lawmawm lam han tarlan duh ka nei ve a. Hei kum kalta chhunga kan sorkar thil tih langsar tak, kan Finance Minister zahawmtak budget speech-a lo lang kha. Kha kha sorkar hnathawk-te hlawh 6<sup>th</sup> Pay Commission tihpuitlin alo ni ta hi hei hi sawi hmaih chi niin ka hre lova.

Pu Speaker, kan hriat theuh angin Mizoramah Industry lian te, Factory liante din a remchang lova, a chhan chu a raw material, a hmanruate leh a labour, a thawktu tur hlawhfate ramdang aiin kan harsa a. State dangah te chuan labour-te a awlsam a, tin, raw material-te pawh a awlsam a. Chuvang chuan helaiah lo din ve ngawt ila, ram dang siam chhuah, state dang siamchhuahte a man lamah kan phak dawn silova, kan tihto a ngai dawn si a. Chuvang chuan sorkar hnathawkte hi kan Industry pui ber Zoram- ah chuan a ni a. Chuvang chuan sorkar hnathawkte leh an chhungte pawhin dingdihlipa an lo thlir, he 6<sup>th</sup> Pay Commission recommendation hi he sorkar chak takin an tipuitling ta hi a lawmawm em em a. Sorkar hnathawkte

hlawh alo pung a, tin, chu chauh nilovin pension thlengin alo punga, khang kha thil lawmawm tak a ni a. A lawmawm lehzual chu Pu Speaker, khatianga hlawh lo punga sum tam tak he sorkarin a seng chung a sorkar hnathawkte leh pension-ten a hun taka hlawhte an la la thei zel hi a lawmawm em em a ni. Tin, sorkar hnathawk hlawh khatianga pek a nih a, sum tamtak sorkarin a sen belh chung pawha revenue surplus 16.63 crore hetiang lai mai revenue surplus neih theih a ni te hi thil chhinchhiah tlak tak niin ka hria a. Tin, sum hmuhchhuah beisei estimated revenue receipt tih hi 2010-2011 chhunga kan khumnate pawh hi sawilan ngei ngei ngaiin ka hria a. Cheng 3253.87 crore kha beisei anih laiin kan hmuh taka chu 3716.32 crore lai alo tlingkhawm thei a, hengte hi sawrkarin financial management thiamtaka a kal puite leh thahnemngai taka hna a thawhna a ni tih a lang a, heng te hi a lawmawm em em a.

Tin, kan Finance Minister speech-a thil langsar berte zinga ka hriat pakhat chu para 21-naah khan a rawn awm a, hetah hian administrative approval leh expenditure sanction awlsam zawka kalpui tumna a lo lang ta hi a lawmawm ka ti em em mai a, Pu Speaker i phalnain ka'n chhiar nghe nghe teh ang : 'However utmost effort have been undertaken to ensure timely quality utilization of public fund by way of simplifying the procedure of obtaining administrative approval and expenditure sanction', a ti a, hemi ringawt pawh hi he sawrkar kal chho turah hian changed a thleng niin ka hria a, hun hmasa lamah te, sawrkar hmasa lam atang tawhin harsatna kan tawh tam tak hi administrative approval-te, expenditure sanction muang lutukte, dawhkan kal tlang ngai tam lutukte sawilan a ni tawh thin a, vawiina kan Finance Minister speech-a hetiang a tihawlsam zawkna tur, awlsam zawka kalpuina tur a lo awm ta hian rah tha a chhuah ngei dawnin ka hria a, kuthnathawk mite tan leh lonei mite leh industry lama eizawngtute, tin, department hrang hrang, department zawng zawng hmalaknaah awlsam phahna a awm dawn a, seasonal work, hnathawh hun bi awm ang chi ah te, entirnan thil chi kan tihte khang ang zawng zawng agriculture lamah thlai chi, buh chi, buh leh bal khatiang zawng zawng a hunah an chin theih phah ang a, a huntaka sanction-te hmuh anih chuan.

Tin, hei vawiina kan harsatna tam tak, kawng chungchangah te pawh black topping kan tihte pawh hunbi nei a ni a, thal laia tih ngai a ni a, khang ang kha sanction-te, approval-te a hun taka awlsam zawka tih anih chhoh tawh chuan sum awm ang ang kha tangkai zawk leh tha zawka hman a ni thei dawn a. Chu chu kan ramah change ropui tak thlen tu tur ni dawnin ka hria a, a lawmawm ka ti hle mai a.

Tin, Pu Speaker, chhiah tihpun rawtna alo lang hi alawmawm ka ti a, huaisen thlak ka ti a, sorkarin mipuite tan hna a thawhna turin sum a mamawha, mipuite tan a ni a, chu chu kan lo thawh khawm ve tur, chhiah kan pek khawm kha sawrkarin huaisen taka kan mamawh ang a tihpun ngai ti a a rawn tarlan hi a lawmawm hlein ka hre bawk a ni. Tin, thil lawmawm leh em em chu Fiscal Responsibility and Budget Management Act, 2006 leh a hnua amendment ngai ang ang amend-te zawm zel a hemi chhunga financial management hi kalpui tur anih thu lo langte hi a lawmawm ka ti a, tin priority sector-ah a hma lamah an sawilang nual tawh a, kan flagship programme NLUP top priority ala ni zel te hei hi Pu Speaker, a lawmawm ber em tih theih hial a ni a. Mi harsa zawkte, kut hnathawktute tan Budget- ah sum alo awm ta a. Pu Speaker, i vei lam amite zingah kan Opposition Leader zahawm tak Pu Lalduhoma leh a party-te hian kut hnathawktute hi an ngaipawimawh khawp mai a, kut hnathawktute tana Budget-ah sum a lang thin lo

te an vei thin a, vawiinah chuan Budget-ah hei cheng tam tak mai 'DAH' alo ni ta hi vawiinah hian a lawmawm a. Vawiinah tha taka kan intawiawma kan thawk ho ang hian, thawk ho awm reng pawh kan ni a, kut hnathawktute harsa leh nasa taka thawktu zawk hian an chanvo hi a awm thin lo a, chu chu ka vei em em thin a ni. Chuvangin vawiinah Budget-ah an chanvo tur dah alo nita hi a lawmawm hlein ka hria a.

Improvement of Sport Infrastructure tihte pawh alo awm a, ka hmaah pawh an sawilang tawh a. Sorkarin hma alak tawhnate leh a hmalak turte hemi ruala Pu Speaker, ka'n sawilan ve duh chu nimin maiah chanchinbu lamah te kan lo hmu a, nakum kum tirah North-East Games kan thleng dawn ni awm tak a ni a, chungah te pawh chuan hei vawiina kan Budget-a Sport Department lamin an sum neih te pawh hi a duh khawp awm loh maithei a, chungte pawh chu a pek belh theih chuan khatianga North-East Sport kan thleng a nih chuan hemi khawpui laili chauh hian min dawl zo dawn lova, khawpui chhehvelah i hriat angin sawng Zemabawk field-te pawh saw va hman tangkai a ni thin a, sawngte pawh saw han chei that a, tin Zemabawk Mitlamual an tihte pawh saw a awm a, an Village Council-ten an NREGS hmangin field engemaw chen an lo lai ve a, sawngte pawh saw han chhonzawm sak a, field puitling tha tak awm theihna tur a ni a, chutiang ang chuan. Tin, Tuirial Airfield khu Pu Speaker, airfield atan kan hmang tawh lova, Sport Department kuta awm tawh niin ka hria a, khu khu chei lohina awm a, hei Bike racing nan an zuk hmang thin a, khungte pawh khu chei that a, tin a hmuna boruakte khu a lo lum ve deuh a, kan sportsmen-te hengah practice an han nei a, Phaiiah an han kal leh a, boruak inthlak an zo leh lo a, chuvang chuan khung hmun lumte khu training-na tha deuh mai a ni a, khungte pawh khu a panna kawng, National Highway atanga a panna kawngte khu a chhe em em mai a, khungte khu chei that ni ta se, North-East Games kan thlenna atan chuan tangkai tak tur ni dawnin ka hria a. Tin, Sihphirah pawh Sihphir vengtharah khian Sport Council-in field an siam a, khingte pawh khi tihphuisui ni sela darkar chanve vel lekah heng atang pawhin a thlen theih tawh a, khawpui chung tak tak a traffic tawt lutuk han tlan san nante pawh hian a chhehvelah te pawh hian tan kan lak a tul hle mai a, chungte chu ka sawilang pah duh bawk a.

Tin, a pawimawh berah chuan Budget tha tak a ni, sumte pawh a pung a ni kan tih rual hian a sum awm ang ang tha taka kan hman a, daihzai taka kan hman hi a tul berin ka hria a. Department ten Project Developmental Work an han thawhte hian Pu Speaker, Administrative Cost tihte hi a developmental works lam ai mah hian an ngaipawimawh em ni tihte hi thil awm thei a ni a. Nichin lawka kan sawi ang khan hlawh sang tak an la tawh a, administrative work-te kha chu thahnemngai taka lo thawk a, sum hranpa awm lo pawha lo thawh kha an tih turah te pawh an ngaih hi a tha hlein ka hria a. Tin, work programme tihte, performance budget tihte tunhmain la awm ngai lo, he Ministry hnuaiiah Budget pharh a piangin a awm chho ta a. Performance Budget-te kan hmu thei ta a, Department zawng zawngin la ti lo deuh mahsela duhtusamin, amaherawh chu an awm chho tawh hrim hrimte. Tin work programme an awmte hi a lawmawm em em a. He work programme an awm a ka zuk en pakhat lek han sawi chhuah ka duh chu, Public Work Department-in an tih turah khan Construction of Boundary Pillar at Zuangtui tih kha a awm a, hei hi a pawimawh hle mai a. Department hian hmun hrang

hrangah ram kan nei a, tunhmain kan ram neihte humhalh hi kan ti na lova, tun hnaiah hian ram humhalh nachangte kan hre ta a, boundary hung nachangte kan hre ta a, tunhmaa kan humhalh loh avangin mi an lo awm a, kan ngaimawh silova, tichuan, an lo awm laklawh a engemawzat tunah Zuangtui ngeiah pawh chuan Public Work Department Mechanical thlang lamah sawn, anni a awm ho saw chuan Zuangtui Village Council Congress Sorkar hmasa lamah khan LAD-in inhmun neilote tana ram a lei a ni an ti a. Tichuan, Public Works Department-in tunhnaiah hei hi kan ram a ni an rawn ti thar veleh a, mi tam tak rei tak an lo cheng tawh si a, chung chu buaina a lo awm ta a. Chutah chuan Pu Speaker, an awm tirha kan ngaimawh lo anih a, an lo awm tawh anih chuan Sorkar ramah hian mi awm turin kan encourage a hlauhawm rual rualin tuna kan humhalh hmaa a tirah kan ngaimawh lova an lo awm laklawh a nih chuan tihbuai loh hi a thain ka hria a, thin thia an mut a, thlamuanga an awm hi a tul a, khuavang ramri then a awm a, chumi thlang lamte tunah an han hauhte hi mipui an tithlamuang lova. Chuvang chuan, a tirah an lo humhalh tawh lova mi an lo awm tawh a, chuvang chuan, Sorkar pawh, Department pawh, mipui tana awm a ni a, mipui tana thawk tur a ni a, mipui harsatna siam zawnga awm hi chu a tha lovin ka hria a, chungte chu ka sawilang duh a. Budget-ah lawmna tur hlir a ni, sawisel tur a awm lo, a lawmawm ka ti a, ka support a ni e. Ka lawm e.

**S P E A K E R** : Tunah Pu S. Laldingliana. Nimin lamah in sawi duh mang silova in phar leh sup sup si a, min ban tlai tir in tum emaw ni.

**Pu S. LALDINGLIANA** : Pu Speaker, ka lawm e. Kan budget hi ka phak ang tawkin ka zir ve a, tuna ka hmaa Member zahawmtakin a sawi ang khan lawmna tur tam tak ka hmu a. Tin, chumi rual chuan mipui nawlpui angte, sorkar hnathawk angte leh kut hnathawktu kan nihna anga kan tih ve tur hrang hrang kan mawhpurhnate pawh awmin ka hria a. Point hnih khat lek han tarlan ka duh chu Pu Speaker, pakhatnaah chuan, kan sum harsatna hre reng chung a huaisen tak mai a, kan Sorkar hnathawkte hmakhaw ngaia hlawh thar Sorkarin a pe thei ta hi a lawmawm ka ti a.

Tin, chu chauh chu ni lovin Contract Employees kan tihte hlawh thar siamsak an han ni a, tin, chubakah Muster Roll hna hniam zawk thawktute pawhin a minimum wages rate tharte an han hmang chho zel te han en hian a lawmawm a, hei hian kan ram economy hi a tha zawngin nasa takin a nghawng chho mek a ni tih kha ka sawi duh a. Tin, sorkar hnathawk ve lem lo mipui nawlpui te, sumdawngte leh motor-a eizawngte tan pawh hei hian malsawmna nasa tak a thlen chho a ni tih kha a hmasaah chuan ka tarlang duh phawt a.

Tin, Pu Speaker, a pahnihaah chuan he budget hi kut hnathawktute sorkarin a ngaihpawimawh zia tarlangtu budget a ni tih kha ka sawilang leh duh bawka. Hei, kan Chief Minister zahawmtak hmalakna avangin kan plan fund kan tih thin Annual Plan approve outlay pawh crore 1700 lai mai an ni chhova, tin, chumai piahlamah kan Flag ship programme kan sawi fo thin NLUP,

mi harsa leh mi retheite kan khaichhuahna tura kan programme pawimawh ber mai atana crore 234 zet mai dah a'n ni chho leh ta te hi a lawmawm tak takin ka hria a.

NLUP chungchang thuah hian Pu Speaker, tlem ka han sawi zau duh chu, hei campaign lai khan kan sawi thin a, keini pheii chuan engtin nge pawisa hi a lo kal dawn a, engtin nge kan hmuh dawn tih pawh kha kan ngaihtuah pha chiah lova. Mahse, a policy han en hian a tha si a. Thingtlang bialtu ka ni a, thingtlang hmun hrang hrang tlawh kual thin ka ni a. Thingtlanga mi harsa leh retheite, dinhmun tleu laklawh tawhte tana dinchhuah leh harsat zia a tak taka hmutu ka ni a. Ka bial chhungah te pheii chuan khaw thenkhatah chuan tam hunlaih te khan ramhnuaih km 5, km 6 velah hruizik khehin, hruizik khawrhin zan hnih zan thum an riak a. Tichuan, an lo haw a, an hruizik khehsa chu Lunglei khaw panin chhipin an phur leh a. Khatiang khan karkhat tla buhfai kha an han thawk chhuak hram a. Chutiang chuan harsa takin chhungkua an chawm a. An dinkhawchhuah chhoh theihna tur atan khan hmanrua ang chi kha a awm lo reng reng a ni. Chutiang ang dinhmuna dingte tana lei rem an rah leh theihna tur atana sorkarin NLUP a duangchhuak hi chu Pu Speaker, hei aia lawmawm hi chu awm chuangin ka hre lova. Hun hmasa lamah khan Member zahawmtak takte hnen atang khan kan ngaithla tawhin ka hria a. India ram hmun zau zawkte hi han thlir ila, farmers-te, kuthnathawktute'n harsatna an tawh nasat zia Chiang takin kan hria a. Anmahniin bul tanna sum lu an neih si loh avangin money lenders atang tein pawisa an tham a, an puk a. An rulh leh theih loh avangin a tawpah chuan kawng dang awm ta lovin anmahni leh anmahni te pawh an intihlum thin a ni tihte pawh kha Pu Speaker, kan ngaithla tawh a nih kha. Khatiang ang kha India ram hmun zau zawka an tawh laiin keini ramah chuan kuthnathawktute, kan population atanga chhiara zaa 60 vel zet mai te dinhmun tha zawka an din leh theihna tur atana hetiang anga sorkarin sum heti zat Budget-a a'n dah thei hi chu a lawmawm thlawtin ka hria a. Member zahawmtakte khan an rawn sawilang tawh a, kan ZNP unaute hian an sawi thin a, "Budget-ah thlai thar leina turin sum kan dah dawn a ni" an ti thin a. Wawiiinah chuan Pu Speaker, thlai thar leina tur mai a ni tawh lova, thlai an thar theihna tur atan, bul an tan theihna tur atan hian sorkar hian a tak takin sum hi a dahsak tawh a ni. Chuvangin, kan ZNP unaute pawh hetiang anga lungruak taka kan pen tlang mai hi ni tawh lo hian an tan hian tih leh tur an nei tawh lo reng reng a. Congress an rawn zawm mai hi Pu Speaker, an tih tur awmchhun ni tawhin ka hria a ni.

Tin, a dang leha chuan High Power Committee chungchang thute Pu Speaker, Budget-ah hian tarlan a ni a. Kan hriat angin nikumah khan crore 6 dah a ni a, kuminah hian crore 1 belh a ni a, crore 7 a lo awm ta a. Hemi chungchang thu hi sawi ka duh a ni, a lawmawm ka ti a. Kan hriat angin tunhma khan district dangte a pian hmam Aizawl, Lunglei, Chhimtuipui tih kha a ni thin a. Chhimtuipui lamah chuan kan unauten Autonomous District Council an neih avangin a hranpaa inhungna, a hranpaa development han thawh theihna turin sum an nei a ni. Khatiang a nih avang khan Lunglei District-a mipuite hian hmasawna hian a thlawh khum deuh ni hian inhriatna an nei thin a ni. Pu Speaker, nangmah ngei pawh Lunglei origin i ni a, i hriat chian ve kha. Chuvangin, khatiang ang lungawi lohna lo awm thin kha he sorkar hian a hriat chian avangin sorkar hun hmasa atang khan High Power Committee Lunglei District hi a'n dah ta a. Tunah pheii chuan hnathawk theiin sum leh pai nen a'n thum chho ta a. Hei hi thil lawmawm tak a ni a. Kum hmasaa High Power Committee sum atanga Lunglei chhunga hmasawna hna thawh zozai te saw wawiiinah hian tarlang dawn ila Pu Speaker, nileng pawhin sawi dawn ila kan sawi zo hmanin ka ring lo.



Chuvangin, tawi tea ka'n sawi duh chu Lunglei District mipuite hi he High Power Committee kaltlanga sum an dawn leh hna an thawh atang hian an lawm em em a, vui hmui an pu tawh lova, an lung a awi a ni tih hi vawiinah hian ka han tarlang duh a ni. Pu Speaker, Lunglei East bialtu zahawm tak, Pu Joseph Lalhimpuia chu tulna avangin Lunglei lamah a thang mek a, ani phei chu awm se lawmthu sawi tur tam tak a neih ka ring a, a aiawh paw'n lawmthu ka'n sawi nise a tha awm e.

Tin, hei Sports lampang hi kan han thlir a. Kan campaign laia kan sorkarin, kan thalaite tan khawvel thar kan siam dawn a ni, kan tih kha a tak takin a lang chho mek a. Rajiv Gandhi Sports Stadium kan hria a, a hna pawh engemaw zat zawh chhoh mek a ni a. Tunah budget-ah crore 15 zet dah chhoh leh a ni ta hi Pu Speaker, a va lawmawm tehlu em ! Nikumah khan All India Sports Minister Conference-ah kan Minister zahawm tak remchan loh avangin ka zuk tel ve a, chumi tuma North Eastern-a kan tribal puite an han sawi nak nak atanga Mizoram han thlir phei chuan Pu Speaker, thu sawi chu nuam ve deuh asin. Sports-ah chuan hma kan lo sawn ve tawh khawp mai a. He kan sorkarin thalaite tana hma a lakna hi a ropui a, sawi tham a tling tak tak tawh a ni. Pu Speaker, Rajiv Gandhi Sports Stadium chauh a ni lo, chhim lamte saw han thlir ta ila, Zobawk bula Sports Academy hna te pawh tan a ni mai dawn a. Kolasib lamah te pawh Regional Training Centre-te kan han nei a. Helaiiah Pitarte tlang kan ti a, Champhai lamah Indoor Stadium Multipurpose hawn mai theih a ni dawn baw a, sawi tur tam tak a awm a ni. Chumi mil chiah mai chuan Catch Them Young policy kan han kalpui a. Chutah chuan naupang kum 12 hnuailamin sports field-a an duh an han thlan tir a, zirtirna awmze nei systematic training an han pe a. Chutianga an han zir chho mekte han hmuh phei chuan, Pu Speaker, a lawmawm tak tak a. Nakinah an han thang lian ang a, kan ram hi khawvelah an pho chhuak dawn a ni tih hi a chiangin kan hria. Chuvangin kan thalaite tan a kan sorkarin hma a lakna budget-a a rawn tarlan leh tarlan lohte pawh hi a lawmawm tak zet zet in ka hria, Pu Speaker.

Tin, mipuiten awlsam zawka chhiah kan pek theihna tur atana Management Information System changtlung tak mai ruahman an ni chho mekte hi a va han lawmawm tak em! Chhiah chungchang thua hian sawi belh duh deuh hlek ka neih chu, Mizote tluka sorkara innghat leh beiseina nei tam, mahsela sorkar tichak tur zawnga chhiah pek kawnga ngawng si hnam dang hi an awm ve angem aw, ka ti thin a ni. Buhfai harsatna kan tawh hlek a sorkar kan puhmawh nghal a, natural calamity avangin engah harsatna lo awm hlek se sorkar kan puh leh nghal a, kawng lo chhia se sorkar kan puh a, chutianga chuan engkimah hian Pu Speaker, sorkarah hian kan innghat hlawm tawp mai a ni.

Mahse, chutianga a nih lai si chuan buhfai chungchangah hian, kum khata kan ei tur chu sawi loh thla 2 kan ei tur pawh hi kan thar chhuak lo chu a ni lawi si a. Chuti chung chuan sorkarin economic cost-in buhfai man to tak takin a lei a, chu chu heavy subsidise-in mipuia a pechhuak leh a Hemi pawh hi ngun taka kan chhut chuan sorkar hian buhfai man a thla khata a senso vaibelchhe sawm chuang hi sorkarin a hloh char char a ni. Chutianga dinhmunah chuan kan ram hi kan ding mek a ni. Chutianga a nih avang chuan Pu Speaker, theih phei se chuan a hminga keini ram hruaitute leh sorkar officer lian deuh phei hi chuan Sorkarin buhfai a leina economic cost (no lost no gain) a kan lei ve te pawh hi a hun ve tawh lo maw ka ti a ni. Resource mobilization chungchangah lah kan hniam em em a, kan plan fund ni se a pung tlem kan ti a, Pu Speaker, i veilama mite phei kha chuan nasa takin an sawi a nih

kha. Kan plan fund pawh hi lo pung thur thur pawh nise a do letna tur kan neih si loh chuan tihngaihna a awm chuang lo. Chuvangin resource mobilization-a kan dinhmun leh kan ram sum leh pai dinhmun chhiat zia en te phei hi chuan, ka sawi tur a ni em ka hre lova, MLTP Act kan tihte pawh hi ennawn a hun tawh mai lo maw, Pu Speaker. Hetatanga revenue lo lut turte pawh hi thil tangkai takah kan ram tan hian a hman theih mai lo maw tih ka rilruah a awm tawh a ni. Chuti chu a nih avangin, sorkar hi engkimah kan ngheng chho zel dawn a nih chuan, ngheng lo thei lo kan nihna chin pawh a awm, police State kan ni tawh lova modern welfare state kan ni a, mipuite welfare chu sawrkarin a tih tur chu a ni chiah mai, mahse chuti chung chuan mipuiin sawrkarah ringawt hian kan beisei a nih si chuan sorkar hi thil ti theia an equipped, kan thuam si loh chuan, tax pekna lamah kan ngawng tlat bawk si a, hei hi chu kan harh chhuah a hun tawh si a, sawrkar hi thil ti theiin siam ila, equipped tha ila, sum leh pai pe ta ila tax hmangin, chuan sawrkar hi thil ti theiin siam ila, chuta tang chuan sawrkarin kan mamawh hi min tih sak thei ang tih hi ka beisei dan a ni.

Tin, he Budget atan hian sawrkar hian Financial Management-a hmasawna atana tan a lak nasat zia hi a rawn lang a, 13<sup>th</sup> Finance Commission rawtna angin State tin sum lakluhte a pun theih nan kawng hrang hrangin tunah hian hmalak chhoh mek a ni a, stamp duty kan tih te, chhiah awm sa rate hrang hrang ennawn tihsan chungchang thuahte hmalak chhoh mek a ni. Hetiang anih avang hian chhiah atanga pawisa hmuh kan beisei pawh 2010–2011 revised estimate aiin 2011–2012 budget estimate-ah chuan crore 49 zet maiin a rawn sang dawn ta a ni. Kum kaltaah khan Revenue surplus estimate kha crore 341.63 a ni a, mahse kan hriat theuh angin Pu Speaker, sawrkar hnathawkte hlauh pek an ni a, arrear nen pek an ni. A senso a tam tehreng nen heti chung a revised estimate-a Revenue surplus crore 16.62 lo lang thei ta cheu mai han hmuh phei hi chuan a thawktute leh kan Finance Minister hi Pu Speaker, fak loh rual niin ka hrelo a ni. Kumina kan beisei zah phei hi chu hei crore 322.3 lai a ni lehng hala heng han en a, han zir vang vang hian kan Budget hian tum a nei a ni, target a nei a ni tih hi a chiang hlein ka hria.

A tawp nana Pu Speaker ka sawi duh chu, heng Budget hi Mizoram chhunga mipui huap vek a nih avangin pakhatna atan chuan he budget hi sawrkar hnathawkte tan Budget lawmawm a ni ka ti duh a ni. Tin, a pahnihnaah chuan kut hnathawktute tan chanchin lawmawm, an mahni khai chhuahna tur atana sum awmna budget a ni. Tin, a dang lehah chuan mipui tan pawh a tangkai a, hmasawna nasa taka min thlen tu tur Budget a ni tih kha ka'n tarlang duh bawk a. Tin a tawpna ber atan chuan sawrkar hnathawk leh mipuite pawhin he Budget-ah hian contribution kan neih ve theihna tur a awm bawk a. He Budget hi fel tak leh dik tak leh rinawm taka hman a nih chuan Pu Speaker, hei hian nasa takin kan ramah hmasawna a thlen ang tih ka rindan leh ka beisei dan a ni tia sawiin he Budget hi ka support a ni. Ka lawm e.

**S P E A K E R** : Tunah chuan Pu Lalthansanga koh hun a ni na a, ding lama mi Pu K.S Thanga kan ko anga, chumi hnuah Pu Lalthansanga ka ko ang, Pu K.S Thanga.

**Pu K.S. THANGA** : Pu Speaker, ka lawm e. Ka sawi tur hi atam ang reng viau maia minute 15 chhungin ka sawi zo hman lo ang tih ka hlau hle a, khi sanna khi min lo pawhtawi sak lo phawt maila tih kha ka ngen duh a. Pu Speaker, a

hmasa berin ka point a ka luh hmian hemi kan Budget Session chungchang hi han tihrik ve hlek ka duh a, hei session kan nei a Budget session a ni a, a pawimawh dan hi kan hre tho nachung hian kan hre tawh lo em aw, tih hi ka ngaihtuah a, kan official gallery hi a bik takin ka'n sawi duh chu, ram nghawng, ram thil tak tak leh kan sum leh pai thilte kan sawi a, chutah chuanin hetah kan official gallery-ah hian Department Head-te duh angin an attend thalo deuh thinin ka hria a. A chhan chu MLA, member zahawm tak tak ten helai atan hian an ngaihtuahnate sengin an rawn inbuatsaih a, kha kha anmahni kha a concern thin avangin, Department officer-te hi tel tha zawk deuh sela tih hi ka rilruah a awm deuh deuh a. Naktuk atangin Demand kan sawi dawn a, hetah phei hi chuan Department Head mai nilo Secretary, a concern department-te tel zel sela, kha kha a changtu Minister-te pawh hian ngaipawimawh sela a tha awm mange ka ti a. A chhan chu hei engemaw thil kan han sawi a, tunah pawh kan budget-ah hian, tuna kan discussion mekah pawh hian pawisa awm sa hman dan kan rel a ni ringawt lova, a awm dan tur ngaihtuahte a tel a ni. A awm dan turte kan ngaihtuah leh kan sawiho zingah hian a tel avangin a mawhphurtu te khan an lo ngaih serious siloh chuanin harsatna min siam thei a. Wawiina kan budget kan pass tur ngeite pawh hi kan State-in kan tih ve tur lam kha a mawhphurtu kha Head of Department-te an lo nih thin avangin heng hi attend tha deuh sela a tha mange tih kha thahnemngaih thuah ka sawi a. Chu chu a bik takin naktuk atang chuan mahni department chanah khan Minister-te pawh an Secretary-te leh Head of Department-te awm kim tir sela chu chuan Member-te inbuatsaihna pawh a tihlawhtling ang tih kha ka thahnemngaihna ka'n sawi ve duh a ni.

Pu Speaker, a hmasa berah chuan kan budget kan han sawi mek laiah hian lawmawm ka tih em em mai thil pakhat Finance Minister hlui, kan House Leader-in Finance a chan chhunga kan hmasawna hi Finance Minister thar kan nei tawh chung hian sawi ka duh a. Tun kan financial year-ah te pawh khan budget-a lapse kan nei tawh lo mai pawh nilovin Treasury-ah khan nidanga zan khaw taireka tlaivar dawn dawna Treasury-a bill buaipui ang kha awm lovin office working hours a zawh rual rualin hna kha zawh vek a ni a, chu chuan kan Chief Minister-in hemi kan finance management lama tan a lakna awmzia kha tuntumah pawh khan tun kan financial year-ah ngei pawh khan kan hmu a. Chuvang chuan kan Chief Minister-in kan ram thahnemngai taka a lo siam chhoh hi wawinah pawh Finance Minister thar pawhin a rawn zawh dawn a ni a, chutiang chuan kan Chief Minister chungah pawh hian lawmthu sawi kan bain ka hria a ni.

Tunah hian kan budget hi opening balance-ah hian nuai 18099 in kan tan dawn a ni a, chutihlai chuan tuna kan budget surplus tur hi a tha hle mai a, nuai 15024 lain kan surplus dawn a, chuvang chuan kan closing balance hi a tlahniam ta viau a, engpawhnisela hetah hian kan la deficit tho nachungin crore 30.75 chauh a ni. Helaiia kan han kal that theih nachhan hi Fiscal Management, nichina kan sawi ang tho, kan Finance Minister leh kan Chief Minister zahawm tak tena an lo enkawl thatna, kan ram sum fiscal responsibility leh budget management- ah te tan an lo lak nasat avangin 13<sup>th</sup> Finance Commission duhsaknate kan dawng a, chuvang chuan revenue surplus pawh crore 322 tunah hian nei tura chhut kan lo ni ta a ni. Kha kha a ropui hle a ni. Tichuan hei, leibate pawh kan sawi thin a, kan leibatna hi hei tuna ni 31.3.2010 ah khan crore 3163.95 a ni a. GSDP atang chuan crore 5497.93 a

ni a. Tichuan, a percent-a lak chuan a inthlauhna kha 57.54 a ni a. Tin, 2010-2011 ah 3410.11 atangin GSDP hi 6297.10 lo niin 57 atang khan 54.16% ah a han tlahniam thla leh a.

Tun kan budget 2011-2012 ah hian crore 358.72 atangin GSDP alo sang chho zel a, 7216.75 crore a lo tlin tawh avangin tuna GSDP atanga chhutin fiscal deficit hi a tlakhniamna chu 49.62% a lo ni ta hial a. Tuna kan kal danah chuan GSDP thanna aiin Fiscal deficit punna a tlem tial tial a, hma kan sawn hle a ni tih chu chuan a tilang a. Vawiinah reiloteah kan sum leh pai ba pawh hi hetiang a kan kal chuan zero budget-ah kan tan thei dawn ni te pawhin a lang a. Chu chu vawiina kan ram hruaitute Finance lamin thahnemngai taka an manage thatna te, tin, pawisa a hmanna tura hman te, a hmuhna tur lama tan an lakna te, a venna tura venhimna te a ni a. Tichuan, tunah pawh hian kan Finance Minister-in a tunah hian a rawn lang thei ta a. Chu chu thil ropui tak a ni tih kha ka'n sawi ve lawk duh a ni.

Tichuan Pu Speaker, nichina ka hmaa mite leh nimin lama mite Member zahawm tak tak tena an sawi tawh ang khan vawiina kan tihrik langsar duh em em chu tuna kan Annual Budget kan sawi mek hi Mizoram-ah chuan mipuite budget a ni a tih loh theih loh a ni. Hei a bik takin kan mipui 60%/70% dawn mipui tan hian hei leh chen a lo kal tawh a. Budget-ah hian entirnan MIP tihah te khan kum khatah crore 20 te dah ve thin a ni a. Chu chu ram pumpui mipui 70% chan atan chuan a tlem em em a ni. Mahsela, tun Sorkar a lo din hian a ngaihtuahna a rawn thlak a. Hmasawn tir tum politics-a rawng a lo bawl sak thin kha, kha kha ram mipui kuthnathawktu- te an ni tih kha, politics-a hetia tlin tum leh election-a chak tuma auna ringawt nilovin a takin a rawn tilang nghal a. Tahchuan budget hmasa ber a rawn pharhah pawh crore 100 kha mipuite tan a lo awm a. Tichuan, nikumah crore 234 a rawn lang a. Hei tunah pawh a ngai crore 234 a rawn lang leh a. Nikumah khan chungkaw 45000 in chumi atang chuan NLUP bultanna tur kha hma an la a. Tunah hian 234 hian chungkaw 45,000 vel bakah a hmasaa mite tikhan a veng chho zel dawn a ni. Chutiang chuan vawiinah hian kan hmalama sorkar lokal tawh, a ngaihna hria inti ve tak, mahse hriat loh vang nge budget-ahte crore 20 te chu an lo dah ve ngei a. Mahse kha kha ram mipuite tan chuan awmzia a neilo a ni.

Tunah an hruaitu, hotu, Chief Minister hluite meuh pawh nimahsela budget kal hmang hre tura ngaih a ni, Finance Minister pawh lo ni thinte an ni a. Chutichung chuan khang ang mipuite tana budget awm kha, hei hi thil danglam a awmlo, bangthlang sat thla a bangchhaka bel ang a ni tih angte khawilayah emaw mipuite zirtir nan te an han hmang a. Mahse hei hi bangthlang sat thla a bangchhak a bel mai mai theih khawp a awl anih chuan engati nge zaa 70 mipui rawng a bawlsak te tan khan kha leh chen kum 10 chung sorkar kal taah te khan an lo tih ve mai loh tih hi zawhna lian tak a ni a. Hmangaih tak angin mipuite hnenah an inzirtir ang a, mahse hmangaihna der a nihna chu budget-ah alo lang thin zawk a ni tih kha ngaihtuah tham tak a tling a ni. Chuvang chuan vawiina kan budget-ah chuan a tak ram alo lang ta a. Hmanniah chanchinbu pakhatatunlaia Editor hmingtha ve taka ka ngaih thin politician-a inlet ta mai khan nghakuai ang deuh khan a han ziak a. Nghakuai a chiah a, tawh tarh a NLUP hi mipuite tana chhiatna thlentun ang hiala a han ziate pawh kha kan chhiar a, paw ka ti hle a. Thil hi Rotekawla sepa anga thlirna tlang dang atanga a kawh zawng thlir hrim hrim hi chuan vanramte pawh hi a

chhe zawnga an sawi hi chuan engmah a ni chuang lovang a. Mahse Pathian thu kha a dinnaah a ding a, tah khan a ringtute chuan malsawmna kha an hmu mai a ni. Chutiang deuh chuan he NLUP pawh hi vawiinah hian mi sing tam takin malsawmna an dawnpui mek a. An eizawna kawngah ngial nghehna, an dinchhuahpui mek dawn a ni tih hi a takin vawiinah hian a lang mek a. Tuna budget lo awm leh pawh hian a takin chu chu a rawn tilang chho zel a, eizawna ngel ngeth din turin.

Tin, hetilaia kan hotuten an sawifo thin mi zawng zawng hi mi hausa leh millionaire, sum leh pai nei, hausa nuam tawn taw turin siam an tum lova. Amaherawhchu, vawiina rethei lutuk a, kum khata cheng singhni, singthum emaw pawh haichhuak pha lo atang hian, he programme-in a tum anga a hlawhtlin hi chuan kum khata cheng nuai chunglam la in, India rama per-capita-ah pawh leh a State GSDP ang pawha Mizoram chu sang thei hle turin India ram atanga tehna atangin, chutiang chuan ruahmanna a siam a ni. Vawiinah hian chumi kawng chu mumal takin zawh a ni a. Tin, he thil hi India rama economic thiam, kan economist, khawvelah pawh kan chhuanvawr, tuna kan Prime Minister ni mek Dr. Manmohan Singh te, Montek Singh Ahluwalia, Planning Vice Chairman, khawvela economist tha tawpkhawk leh thiam tawpkhawka ngaihte ruahmanpuina leh enpuina tih a ni a. Vawiinah hian a kawi zawnga thlir tlat hi chuan Pathian thu aw hian a kawi zawngin an thlir angem aw tih hi ngaihtuahnaah pawh ka nei fo a ni. Chuvang chuan vawiinah he NLUP hian he ram mipui retheihna hi chhanchhuahna kawng a sial a, mahni eizawna te, mahni a lei rem rap thei tawh lo, dinhmun tleu a an awmna atangin chhanchhuak turin he programme-ah hian a tel a. Chuvang chuan he kan Budget hi mipuite budget, Mizoram mipuite ta a ni. Chutiang ang chu Mizoramah hian kan la neih ngai loh avangin heng kan Budget Session hi Mizoram mipui, kut hnathawktute tan a bik takin a hlu em em a ni tih hi Pu Speaker, ka'n sawi ve duh a ni. Zaa sawmsarih ten tunah hian malsawmna an dawng a, itsika kan dinhmun angah hian an rawn ding ve ang tih hlauva lo huphurh hi chu mipuitling leh ram hmangaitute tih atan hi chuan a mawilo hle a ni tih hi vawiinah hian ka'n sawi duh a ni.

Tin, Pu Speaker, Sports chungchang, thalaite khawvel hi tlem han sawirik ve ka duh a. Tunhma chuan Mizoramah thalaite infiamna lamah nasa takin tan an la a, an ti ve thin na a, amaherawhchu, a hawiher leh a kalphungte ala fel loh leh sorkar berin a ngaihtuahna chianguang leh ruahmanna mumal a neih loh avangin thil tak tak thlen a har viau a ni. Amaherawhchu, tunah hian kan ram thalaite hian potential an nei a, export tham an awm a, kan talent hi invest tham a ni. Chu chu kan hotute hian hriain sports lamah tan an lo la a, kan thalaite hian nasa takin phurna an nei a, discipline tin maiah hian India ramah tunah hian kan kang chho duak duak a ni. Hmani lawk pawh khan Football Club Aizawlah 1984 vela an din tawh kha kum sawmpathum vel a thih tawh hnuah he sorkar ngaihtuahna thar an han hmuh hian mi thahnemngaiten an han tinung chho leh a. Chutiang ang chuan infiamna lamah te pawh hian kan thalai hmannah football player pakhat, kan Mizo thalai ngei chuan cheng nuai za leh sawmthumin contract-te an sign ve tawh a ni. Chutiang ang chuan discipline dangah te pawh eizawna a awm chho dawn chauh a ni a Pu Speaker, kan thalaite pawh hian an tuihalna reh turin chhantu an hmu chho mek a ni (Speaker : duhtawh tum tawh rawh aw) Chuvang chuan chutiang chu anih avangin vawiinah hian heng kan Budget atang hian kan thalaite pawh hian an lo thlir ve ran a, tute nge ni ram leh mipuite tana

ngaihtuahna hmang tih chu kan Budget atangte hian an lo inzir ve a, an lo inbuatsaih a, chutiang ang chuan vawiinah hetiang Budget tha tak mai alo kal hian kan thalaite pawh hi a tiphur a ni tih ka sawi duh a Pu Speaker, chuvang chuan he Budget hi a lawmawm ka ti a, ka'n support ve a ni e. Ka lawm e.

**S P E A K E R** : Tunah Pu Lalthansanga ilo ko ang.

**Pu LALTHANSANGA** : Pu Speaker, ka lawm e. Hei vawiinah kan Budget General Discussion-a sawi theia ka awm avangin Pathian hnenah pawh lawmthu ka'n sawi tel duh a.

Hei kan Budget hi han en ila a tha lampang atang hian han ti ila, priority sector-ah hian MLA Fund-ah hian a ngai ala ni a, mahse a lawmawm e, nuai sawmhnih panga kan la nei a, tichuanin ₹ 1700 crore kan han nei a, chubakah chuan Additional Central Assistant atangte, AIDP atangte leh a hrang hrang atangte hian kan han nei deuh bawka, ka enthiamlo deuh nge mahni Receipt Budget atangte hian kan Finance Minister zahawm tak khan min larawn hrilhfiyah sak sela. Helai figure hi Central Government han tihah hian Non Plan atang hian ₹ 9,25,00,000 leh tihvel kha a ni a, mahse heti laia kan en hian heta anrawn tih lehna ah hian ka enkawp thiamlo deuh hlek a, kan plan hi ₹ 1,70,00,000 chuang hret anih hmel a, 1700-in an han dah bawk niin ka hre deuh a. Non Plan atanga kan hmuh Central Grant-in-aid from Central Government tih atanga kan hmuh hi, hetilai devolutions of Central Tax and duties tihte nen hian a inkawp taami awka ti deuh hlek a. Pu Speaker, MLA te hian Budget hi training hi kan nei tam lo em em mai a, chawhma nge min training a, thiam vek turah hian min dah mai a, Department ho, kan Officer ho lah hi han zawt ila, min hrilh chian viau hi an hlau deuh nge kan han zawh pawh hian min hrilh dan hi an tlanche riau zel mai a, chu chu a nia an ti a, kan hriat duh tak tak lai pawh hi kan hre thei manglo tlat mai a, keini ang tan phei hi chuan a buai thlak em em mai a. Budget bik training te pawh hi min pe thei sela, kan plan-te pawh hi grass root deuh atangin kan hre thei awm mang e han tih te hi rilruah hian a awm deuh hlek a. Lunglei High Power-ah chuan crore 6 kha crore 7-ah a chho a, dang dangah pawh arawn chho hret hret a. Lunglei-Thenzawl Road tihte pawh hi KM.71 a an tlem ta te pawh hi anrawn dah a, chubakah chuan Sport infrastructure atan hian.

Tin, he kan budget hi a lungchhiat thlak ka'n tihna lai em em pakhat chu Agriculture-ah hian kan declain ta hi. Mizoram mipui hi Agriculture-ah hian zaa 60/70 dawn hi kan inngat deuh a ni a, hemi kan agriculture bera hma kan sawn si loh chuan Industry Sector-ah han ti ila, kan hmasawna kha a kal deuh dat a nia. Industry Sector-a kal hi kan tlem angreng si a, population atanga chhut hi chuan. Chuvang chuan kan budget hi lungchhiat thlak lam deuh a kawka em aw tih hi kan ngaihtuah deuh a. Chu chu engtinnghe hetilaiah hian make-up hi an tum dan tih lai hi ka'n hre duh deuh hlek a. Hei, kan Finance Minister hi Agriculture Minister a ni bawka, Agriculture Department pawh hian an ear-mark hi an phak loh dan hi kuminah te hian a raphlak khawp a, ka bialah khian harsatna deuh te an han nei a, chumia lei han siamthat a, kawng han siamthatna atan ka tih pawh hian 2010-2011 ah khan fund an neih loh thu min hrilh a. Kuminah hian an ear-mark hi nuai singkhat sangli zasarih chuang anih lai hian an normal plan hi chu cheng 432.38 emaw

vel a ni. Chuvang chuan, Agriculture lampangte hi chu kan ngaihthah mange aw tihte hi ka rilru-ah hian a awm deuh hlek thin a.

Hei, kan flagship programme berte hi han thlir ta ila, kan flagship programme NLUP te hi kan han sawi uar viau mai a, a that rual hian, nikum 2010-2011 a hemi ka zawhna-ah hian a lo kal a, work component ka ti a, infrastructure component a ni zawk a, tiin min rawn chhang a. Chuta ₹ 20,00,00,000 an han dah a, an han hmanna angte kha han en chian chuan a mak angreng khawp mai a, an han hmanna kha misappropriate-te chu a ni em lo ang a, a theih chu a niang a, tiin ngaihtuahnae chu ka'n nei deuh a. NREGS atan khan ₹ 9,00,00,000 chuang an han dah phawt a, chutah chuan RKVY atan khan matching share a nih chu. Chutah chuan RKVY atang khan vaibelchhe khat leh tih an dah a, ₹ 10,00,00,000 chuang kha khalaiah khan a kal ta a, NLUP hemi infrastructure component-te hi ni e, hei, kan bialah te harsatna kan han tawh khan kan Minister zahawmtak hi ka'n ngen a, a harsat zia leh pawisa awmlah zia kha min han hrilh rualin khatilai matching share-ah te a lo kal vak thei si anih chuan vawiinah meialh en mai turte pawh hi khati zawnga her dante kha a awm ang em aw tih kha min ngaihtuah chhuah tir a. Tin, chubakah chuan Mizoram puma hetiang harsatna han nei tante pawh hian helai hi a pawhfan theih deuh emaw, kha kha nakinah chuan an hmuh hnuah khan an hmanna tur kha an allocate leh dawn emaw ni aw tihte kha rilru-ah he NLUP bikah te hian ngaihtuahna min rawn pe a. Hei, vawiinah pawh hian cheng ₹ 2,34,00,00,000 vel kan han nei leh ta a. Hetiang ang an hmanna tur leh an han tihna tur pawh hi hetilaiah hian an han tilang a, hemi an han tihlan dan pawh hi eng ang tak hi nge tih hi chiang deuh hleka han inhrilh hi a tha mang e aw ka ti a. Chumi trade-ah chumi zat chu a niang a, chutiang zat chu aniang, chutiang chu kan hmang tawh han tih angte hi awm thei sela. Tuna NLUP pawisa nikum 2010-2011 pawh kha engtinge kan hman tih pawh hi Member tan chuan hriat hi a chakawm viau a. Khatilai infrastructure component-te leh a dang component hrang hrang han awmah te leh beneficiaries atana an han pekah te pawh khan.

**Pu NIRUPAM CHAKMA :** Pu Speaker, nichina Member zahawmtakin a sawi NLUP chungchang kha Unstarred Question-ah a awm vek tawh a, a chhiar peih lo a nih kha.

**Pu LALTHANSANGA :** Unstarred Question kha ka zawh a ni a, chuvang chuan ka rawn ti a. A chhan chu, chumi trade-ah chuan chuti zat pek a ni a, tikhan kha trade kha engzatnge beneficiaries engzatnge pek tihte kha khatiang ang zawng zawnga an hman kha, chuti zat chu hman a ni a, tih kha nita se, he kan budget speech-ah hian Pu Speaker, a thlirtu mipui tan pawh hian a bengvar thlak ang a. Tunah hi chuan dik tak chuan NLUP kan kalpui dan hi ngaihtuah chiang ta ila, kan ramah hian dik tak chuan intihbingna, a hmulo ho tan chuan vawiinah hian a lungchhiat thlak a ni. A hmu hi ti ta ila khawkhatah hian chutiang zat vel chu an ni e tih tur hian a awm deuh vek a ni. Chuvang chuan khati zat atanga zuk chhut khan vawiinah hian kan ramah hian integrity hi a kaw k lo em ? Hei hi integrity atana NLUP lo kal a nihna pawh hi, vawiinah hian integrity hi a kaw lem tlat lo a ni, a tak taka zuk ngaihtuah chuan. Kha, nichin pawh khan hetah kan Member zahawmtakte kha in la sawm ta nghe nghe a ni a, chuvangin

hetiang angte hi ka sawi ang thin khan duh leh ruling party chuan 70% chu chang rawh se, a bak 30% hi chu a phu leh a awm te hi pek ni rawh se, tih ang kha kei wawiinah hian ka la rawt a. Chuvangin kan Budget tharte pawh hi changtu thar Minister zahawm tak mai kan han neihah hian kan budget pawh hi a danglamna teh vak hi ka hmu lova, chuti a hnekin Buhfaiah te, Electric-ah te hian kan budget hi a kal ral nasa a ni tih hi ka han sawi rual hian NLUP aia kal ral nasa hi a awm dawn emawni chu aw ka ti. ₹2,34,00,00,000 a kal ral a, wawiinah buhfaiah te hian ₹ 2,00,00,000-ah ₹ 2000 emaw te a kal ral a, tichuan electric-ah hian cheng nuai sangnga emaw vel a kal a ni. Chuvang chuan kha kan harsatna avang khan Tax-te hi kan la nasa dawn ta hle a ni a, wawiinah pawh hian tax hi kan revise chho tlut tlut mai a ni a. Resort mobilisation kan tihnaah te pawh hian wavi engemaw zah chu kan han revised tawh a ni a, tax-te pawh hi. Hmanniah Petrol man lak in tum a, in la tam dawn lutuk e, kan ti a, in han tihniam a, kan fin in chelh lo a ni an ti a, an thiam angreng hle a, mahse, mipui rilruah hian a dam chuang lo. A chhan chu NLUP ah hian Central atanga Grant-in-aid special package a nih loh avanga hei hi kan ti a ni ti ta ula chuan, mipui hian an pawm hi ka ring zawk tlat che u. Ni si lova, khati zawnga in han kal si kha chuan an pawm lo deuh che u niin ka hria a. Hei ka zawhna pakhatat pheichuan resort mobilization atan hian Taxation Department hi in han telh ta a ni. ADP loan han rulh lehna atan pawh hian, hemi han en hian hetah hian hetia Taxation Department an telh hian an ni hian chhiah hi heti zat hi la ila, heti zat hian Central-in min tuk zatte pawh kan tlin ve lawmni ti zawngte pawhin a lang a.

Tichuan, Pu Speaker, hetiang hi ka tum kha ka chiang lutuk a, chuvangin Tax kan han lakna turah te pawh hian, enge ka zawhna pakhatat chuan Taxation Department income tax office hi Mizoramah hian dah tumna a awm em? tihah khan Taxation Department kha kan lo address sual palh a, a hei, kan department a ni lova tiin min rawn pelet tawp mai a ni. Assembly Secretariat-ah hian rawn address ta se, hei keimahni a ni lova tiin, hei hi Department hran a ni a, kan concern a ni love, tiin emaw rawn ti ta zawk se chu tha tur a ni a. An department nih loh thu khan min rawn chhang ringawt mai a. Parliament practice pawh hi a ni chiah em aw? ka ti a. Hmana Orientation Training-a kan zuk kal tum khan khati zawng khan khutilaia mite kha chuan min han hrilh ve bawka ni a. Chuvang chuan khalaiyah khan ka'n tih nachhan pawh kha, hetiang Resort Mobilisation kan ti rau rau anih si chuan Income Tax Office-te hi Mizoramah te hian awm ta sela, tichuan Income Tax hi kan pe vek ang a, chubakah chuan Contractor hemi some of the sold nilemlo, heram leilung fa ni lo zawng zawng hi chuan a contract bill lak zawng zawng atang khan 2% emaw hi a la dawn ta a ni. Chumi zawng zawng a lakte nen chuan kha kha Public Account-a a luh leh khan wawiinah hian kan chhiah hmuh tur hi nasa takin a tipung thei dawn a, chutiang angte chuan kan ngaihtuahna kal sela, ni lova keimahni chhunga kan tih chuan tax pe tlem hnam kan ni a, tax pekte hi kan hreh a ni tih lampang te kha kan ngaihtuah nasa a, chumi piaah lamah chuan keimahni chhung atangte hian lak tam chu nise chu mipuite tan pawh hian rilru a dam zawkin ka ring.

Sport, ni e a lawmawm a, thalai tan pawh, mahse Rajiv Gandhi Stadium kan tih hi sorkar hmasa khan cheng vaibelcchhe 25 lai a hmu a, bul a tana, a zo dawn tih a hriat a ni, mahse wawiinah chuan kan plan fund atanga a kal leh ta daih mai te, thingtlang lampang harsa zawkte pawh kan pek theih loh lai a heti lampanga an kal ta daih mai hi ka rilruah an awm leh deuh a,



wawiinah hian central lampangah hian tun kan sorkar chak tak hian sum hi a hailut chak tawk lo a maw ni le. Hetiang angte chu Pi Sonia meuhin a rawn hawng a, keipawhin ka zu chek ve deuh tan tan a, kan lawm khawp a. Khuti lai pawisa kan hmuhna tur atana central-ah pawh zuk dil belh zel tura kal kha plan fund atangin a kal ta daih mai a ni, khulam atanga hmuh chu ni pheise chuan beng thleng thlenga bawp khaina tur kha a ni a. Mahse Plan fund atanga a kal leh zel si chuan kan mipuite harsatna wawiina, Aizawl khawpui chhung leh inkalpawhna zawng zawngte leh kawng chhe lutukte tan hian pawisa a awm mang lo kan ti a, session dawn hi ni reng mai sela aw mipuiin an ti a ni. Chuvangin khatiang ang zawnga mipuite thatna, motor nei tana harsatna, khawtlang anga hnatlan an ti mup mup mai te hi a lungchhiat thlak hle mai a, kan sorkar hi tun ai hian tan lain central-ah te pawh khuan na zawkin nawr sela ka ti a, kan Finance Minister pawh hian nasa takin a nawr theih ka ring a. Kan mamawhna hi a sang si a, tun anga kan kal reng chuan kan chheh vel amite pawh hian min hlau tawh lo anih hi, kan hnam a him tawh lo a ni. Kan ram chhungah thihnte hi a tam ta em em mai wawiinah hian phai ramah pawh an inthat thin kan tih rual hian kan ramah pawh hian inawkhlum, tualthihna tam ziate hi. Hei hi kan Budget kalphung dik loh vang hi em ni ang? ti zawng hian sawi ve ta ila chuan thui tak hi a sawi theihin ka ring. A chhan chu ngatinge tih chuan wawiinah hian kan Budget chang ve hi mi tlemte hnenah chauh a lut a ni. Chutiang chuan Pu Speaker, kan Budget kalphung hi tun aia tha hian improvement hi awm se tih hi ka'n sawi duh a.

Hei, Revenue-ah Surplus te pawh kan han nei chho zel a. Kan leiba te pawh hi tlema a'n tlem chho zelte pawh hi kan sorkar hmalakna hi lehlamah chuan thatna tam tak a awm a, lehlamah chuan duhthawhna tam tak a awm bawk a ni tih kha ka'n sawi duh a. Engpawh ni sela, a ngai a ni a, a tha thawkhat alawm. A hma pawhin hetiang tho hi tha kan lo ti tawh bawk a, ka ti a, a tha a ni mai ang chu tih kha Pu Speaker, ka'n sawi a ni e. Hun min pek belh avangin ka lawm e.

**S P E A K E R** : Awle, Pu Hmingdailova'n a phar a, Pu Lalrobiaka'n a phar bawk a. Tin, la phar chiah lo Dr. R.Lalthangliana leh Pu Lalduhoma kha la sawi leh ngei tura rin an ni a. Pu Selthuama kha tunah khan a phara. Chutiang chuan Dar 4 ah chuan zawh hman ngei chu kan tum tho dawn nia. Tunah kan chawhma hun chu a lo tawp ta rih e. Chawl hrih ang. Dar 2 ah kan chhonzawm leh dawn nia.

**2:00 P.M.**

**S P E A K E R** : chawhma lam khan mi 5 in an sawi a, lo book lawk kha Pu Hmingdailova Khiangte leh Pu Lalrobiaka leh Pu R.Selthuama te an ni a. Minute 15 kha hman zawh kher tur pawh a ni chuang lova, minute 5 chhung lek pawha ngaihnaawm deuha sawi theih kha a ropui zawk a ni tih hria ila. Tunah Pu Hmingdailova Khiangte lo ko ang.

**Pu HMINGDAILOVA KHIANGTE** : Pu Speaker, kumin General Budget Discussion sawi theia ka awm avangin Pathian hnenah leh i hnenah lawmthu ka sawi e. Kumin kan Budget, kan Minister zahawm takin a rawn buatsaih hi han thlir thuak

thuak pawn a lungawi thlak hle a. Ngun deuha han thlirin Mizoram hi ram haus a lo, mahni thawhchhuah atanga Budget la siam thei lo kan nihna atanga kan Finance Minister-in sum hmuh theihna tur zawng zawng a'n dap khawm a, arawn siam chhuak hi 'bold and progressive budget' ah ka'n puh deuh a ni, Pu Speaker. Tin, he budget hi hetiang zawngte pawh hian thlir theihin ka hria a, 'retheite thleng phak budget' tite pawhin kan vuah thei awm e. Tin, sum hmuhna tur a dap khawm zingah Industries Department a tel kha lawmawm ka ti a. Industries Department han tih chuan public sector unit-a tute emaw hi chuan profit earning an siam a ni tih a hriat a, a lawmawm hle a. Tin, la siam lote pawhin tan an la ang tih ka ring a ni. Tichuan Annual Plan chu crore 1700 a lo chhuak ta a, kum hmasa lamte ai pawn a pung a ni tih kan hre thei ang. Tin, Pu Speaker, he budget hi intodelhna lam hawi a nih rualin mi retheite tanpuina lam hawi a ni bawk tih a lang chiang a. Tin, hun lo kal zela kan intodelhna lo kal zel tur ngaihtuahin department eng eng emaw atangin chhiah tihpun leh a thar lak turte a lo lang a. Kan sawi teuh tawh a, Mizo ho hi sorkar tan enge ka tih ve theih ang, tih lam ni lovin, sorkar atanga hmuh tur ringawt ngaihtuah ni hian kan lang a. Sap ramah te chuan mihringin harsatna an neih a, sorkarah chhiah an chhun theih loh chhung hian an zak ngawih ngawih a, hreawm an ti hle a ni. An dinhmunte a lo changkang a, a nuam em em a ni tih hi keini Mizote hian ngun taka kan ngaihtuaha an hnen atang hian kan zir teuh tawh bawk a, zir tur kan la nei fovin ka hria a, Pu Speaker. Tin, khang chhiahte kha a tihpunna lamte leh a tharte a awm hlawm a. Ka'n sawi zawi zawi anga. Sales tax leh Vat-te leh Professional tax-te tihpun a ni a. Tin, non revenue lam te, Water chargers lam te, Petroleum, Licence fee te, tin, vehicle tax kan hriat tawh ang khan 1997 ami kha la revise miah loh a ni a, enawn mek a ni tih pawh kan hria a.

Tin, Forest royalty-te pawh tin, chutih laiin casual labour registration atangte pawhin, tin, Tribal-in kan la pek loh revenue stamp-te pawh kan pe tan dawn a. tin, kawng dang dangah te pawh la ngaihtuah mek a ni. Nichina kan member zahawm tak, Pu Lalthansanga'n a sawi income tax a tihte hi Mizorama sorkar hnathawkte hian kan pe lova, pe lo tura ngaihdam kan ni a, India ram sorkar ropui takin, amaherawhchu tribal ram kan awmna ram te, Meghalaya te, Nagaland-ah te kan awm loh chuan kan pe tho a ni.

Kum tawp ah hian min han chhut saka, accountant ten income tax kan pek tur kan ui hle a, a pek loh dan exemption chi hrang hrang kan zawng a. Chu chu wawiinah pawh India ram atanga lokal he rama hnathawk- te pawh hian then chawkin chawkin income tax hi an pe a ni. Amaherawhchu chu income tax awmkhawm chu a ni wawiinah hian kan ramte pawhin Budget kan lo siam ve theihna chu tihte hi kan hriat a tul hle awm e. Tin, helaia member puite, Minister leh MLA zawng zawng pawhin kan tuipui, kan mamawh MLA development fund hi a pung lo nachungin wawiinah hian kan bialte theuh hian nghakhlel takin an lo thlir a, he session zawh hi an lo nghakhlel viau a. A pung dawn tih phei chu hre ta sela, pung dawn ta phei sela chuan an lawm leh zual awm e, engpawh nise, tah chuan duhtawk ila. Tin, Lunglei lam chungchang thui tak sawi lovin tuna kan sawrkar Pu Lal Thanhawla kaihhruai hian ngaihtuahna tamtak uluk tak hmangin High Power Committee awm thin kha kawng tam takin malsawmna a pe a, chuvangin tunkumah pawh hian crore khatin a pung a, vaibelchhia 6 thin kha crore 7 alo ni hi a lawmawm a, Pu Joseph-a leh Lunglei unaute hi kan lawmpui a ni tih pawh kha ka sawi duh a ni.

Tin, nichina kan sawi tawh ang khan kan Budget hi intodelhna lam leh miretheite lam hawi anih avang khan mi tam tak mahni In sa hlei thei lo te kan la tam a he ramah hian, chuvangin LIC loan tur atante leh NABARD atang te NCDC atang ten loan tur a awm a, a vai hian crore 71 leh point 71 a ni a, hengte pawh hi Zoram mipuiten kan that pui ang a, insakna tur LIC loan-te pawh hi, Housing loan-te pawh hi kan indaih lo reng a ni mai a. Chuvang chuan kan Finance Minister zahawmtakin hetiang a rawn ngaihtuah chhuakte hi lawmawm ka ti a, a hnenah lawmthu ka sawi nawn leh a ni.

Tin, Law & Order lamah hian kan Home Minister zahawmtak Pu R.Lalzirliana ho hian kan sawrkarin sawrkarna a chan atang khan Law&Order hi ideal a ni ta hial lo maw chu le tih theih khawpin, he rama chen hi a nuam a ni. Amaherawh chu kan siam chhuah nilo tu ten emaw min rawn barhluih hi a awm ve thin a chungte chu, ABCI hotute pawh United Democratic Liberation, Barak Valley tih velte khan min han ruk sak a, amaherawhchu sum seng miah lovin kan Police uisathiam ten thiam takin an chhan chhuak a, thiam hle lo sela chuan kan Police-te pawh kha vanduai hmasa thei tur an ni tih a lang a ni. Chuvang chuan kan Police-te kan Home Minister zahawm tak hnuaiah hian zalen takin an thiam zawng zawng an theih zawng zawng hmangin he ram enkawl hian an awm mek a ni tih kan hria a, a lawm awm hle a ni. Nimin piah lawka Bairabi, sms kaltlangin bomb darh vek tur a ni tih pawh kha Bairabi ho an buai hle a ni. Amaherawhchu kan Police mithiamte bawkin kar lovah an han dap chhuak a, Remsiam tih khan sms hmangin khulaia an Sumo counter neitu pa hnenah khan alo zu thawn lek kha niin. Engpawhnise, an man chhuak nghal a, thlabar taka an awm pawh kha vawiinah chuan an thaw suai suai tawhin a rinawm a ni.

Tichuan, Sport lam kha kan uar a, kan sawi seng lovang. A sawi loh lammualah Astro Turf kan phah tawh nen, tin, Lungleiah Pu Thuamluaia mualah phah tur a ni bawk a. A ngaih na hria mai ni lovin chak taka kan Sports Minister zahawmtak leh kan Chief Minister chak takin sports lama thalaite riltamna leh tuihalna min hriatpui hi chu a lawmawm tak zetin ka hria a tih ka han sawi duh a. Tin pakhat pahnih pathum ten han sawi dawn ila a tam si a, a lar zualte ka'n sawi dawn ang a. Tunah Kolasib-ah khuan National Training Centre buatsaih mup mup a ni a. Tin tah khuan Football Academy a kal mek bawk a, a chhak lawkah Kawnpuiyah Boy's Hockey Academy din fel a ni tawh a, a kum 2-na a kal mek a. Hetah hian Astro Turf phah tum mek a ni bawk a, artificial grass kan tih kha chumi tur chuan tender-te kan Sport Minister zahawmtakin a buatsaih mek niin ka hria a, chu chu nghakhlel takin kan thlir mek a. Chu bakah Thenzawlah sawn kumin chhunga puitling ngei turin Astro Turf an phah dawn a ni tih kan hre bawk a. Nakum kumtira North-East sport kan thlen turah hian Thenzawl-ah te pheisaw chuan kan khel hman ngei ang tih a rinawm a ni. Tin ka sawi chak em em chu an rawn sawi nual tawh a, kan hotuten nasa taka sport lam an uar avangin vawiinah hian mi ramah pawh kan tlangvalte India chak zingah an tel ve avangin a lawmawm ka ti hle a ni. (SPEAKER : Aw, duh tawk mai rawh) Pu Speaker, engpawh nise khang kha ka sawi theih a ni a. Kan Finance Minister zahawmtakin huaisen tak leh tha taka he Budget hi a rawn siam chhuah avangin lawmawm ka ti a ka rawn support a ni e. Ka lawm e.

**Pu LALROBIAKA** : Pu Speaker, vawiinah kan Budget-te sawi thei tura hun min pek avangin lawmawm ka ti a. Hei kumin kan Budget han en hian a lawmawm dangdai bik em em a, han en thuak mai pawh hian miretheite thleng phak, kut hnathawkte thleng phak, thalaite ta ni bawk si a ni a, hei tak hi a ropuina tak a niin ka hria a. Hei kan Budget kal tawhte kan thlir chuan engemaw duh lai bik leh mirethei kut hnathawktute hrut phak lo deuh leh a hausate hrut phak zawnga han kal hi a awm thin a. Hei vawiinah chuan mirethei te te te kan House Leader leh kan Chief Minister zahawm takin alo tih thin angin kan VIP chu miretheite hi an ni e, a tih kha vawiinah hian kan Finance Minister zahawm takin Budget speech a rawn neihah hian Chiang takin a langin ka hria a, heng avangte hian lawmawm ka ti a, a figure neuh neuhte chu kan sawi hman lo turah ngai ila. Amaherawhchu, chutih rual chuan kan economy hrim hrim kan GSDP 9.57 a han thang chho turte leh thil chi hrang hrang ka hmuh hian lawmawm hlein ka hria a. Chutih rual chuan India ram independence kan neih atanga kan lo than chhoh dan hrang hrangte han thlirin India ram chhunga awm State Mizoramte pawh kan lo thang chho ve zel a, heng avangte hian a lawmawm ka ti a. Amaherawhchu, Pu Speaker, hetia kan sawi lai hian vanduaithlak kan ti dawn nge ni lungchhiathlak angreng tak chu primary sector an tih thin Agriculture sector-ah hian (kan decline) kan hniam chho tlat mai hi a vanduaithlak hlein ka hria a. India ram budget history-te kan chhiar a, kan en chuan India Independence a lo nih atang khan nasa takin an han tang ve tak nain Industry-te leh thil chi hrang hrang sector dangte beisei a awm lova, chutihrual chuan an inngahna chu Agriculture a ni. Tichuan, Agriculture a inngatin 1960-ah te, 1961 ahte chuan kan GSDP chu 3.9% te a lo ni chhova, tichuan zawi zawia kal chhovin harsatna te, indonate Bangladesh Independence han tithe, China-te leh Pakistan-te nena indonate avangin kan economy-te an tlachhe chho veleh a. Chutiangte chu a nih rualin a lo kal chho zel han thlir hian 1971–1979 ahte, khatiang zawng zawnga hmasawna an lo neih chu a bul tanna chu Agriculture a ni tlat a ni. Vawiinah hian kan Leader zahawm takin kuminah buh thar tam kum an puang a, chutih laiin growth rate an decline chho mai hi a vanduaithlak hlein ka hria a, khang avangte khan, tanna tur nasa tak kan nei a ni tih helai budget hian a rawn tilang hlein ka hria a ni. Amaherawhchu, heti taka tha lehlamah chuan kan hniamna laite, kan sanna lai te helai hian kan inhmuchhuak thei ang tih rilru pua kan budget hetiang zawnga han buatsaih hi a ropui ka ti a, hemi atang hian inhmuchhuahna tur tam tak kan nei thei ang tih ka ring a ni. Tichuan, Pu Speaker, kan mi retheite kan VIP te an ni ti a kan Chief Minister zahawm takin a sawi, kan budget-a rawn reflect Chiang tak chu Revenue expenditure-ah khan kan hmu a, salaries-ah khan i phalnain Pu Speaker, beside implementation of pay revision of regular employees of the State Government, minimum wages of various employees categories of Muster Roll employees currently enrolled under the State Government have also been raised at 30%. Vawinah hian hnathawktute MR kan han tihte leh hna hnuaihnuung thawkte, a chunglam chauh ngaihtuah lovin he sorkar chak tak hian nasa takin a ngaihtuah a. A chunglam chauh duhsak bikna ni lovin a hnuailam thleng pawhin duhsakna a neih avangin he thil hi a lo thleng a ni tih hi Chiang takin a lang a ni. Chu mai piah lamah chuan hetah hian kan hmu leh a, he sorkar hian miretheite, inhlawhfa chawpte tan, an thawh ve theihna tur ruahmanna a siam dante kan hmu leh a, 'Improvement of Labour Welfare' kan hmu leh a ni. Tichuan, helai hian BPL chhungkua te, casual labour te, chungho te an lo thawven ve theihna tur chuan chhiat an tawh te, engemaw harsatna an tawh chang

pawhin vui leh vaina an neih theihna tur leh a dawmkangtu tur siam han ni ta te hi a ropui ka ti a. ‘The Mizoram Building and Other Construction Workers Welfare Board’ tih te chu 2009-ah khan din lo ni tanin 2010-ah chianguang zawka kalin tunah hian nuai 38 lai mai hengho tan hian dah a ni leh ta hi a ropui kan ti lo thei lovang. Vawiinah hian hetiang zawnga Budget kal hi a vang hlein ka hria a, a ropui hlein ka hria a ni.

Tichuan, chu mai chu ni lovin, he Congress sorkar pawhin a lo dinchhuah atang leh a hma reng pawha a lo beisei tawh NLUP te chu vawiinah te hian a lo zi chhuak chho zel a. NLUP atang hian kuminah kan Annual Budget-ah chuan vaibelchhia 234 lai mai daha a han awm chhote hi a ropui ka ti a. Pu Speaker, han sawi zau ka’n duh chu, NLUP te hi nasa takin kan theih ang tawkin a sorkar a ni emaw, sorkar hnathawk a ni emaw a nih dan tur dik taka hmang turin mipuite kan ngen thin a. Tin, chu mai ni lovin he NLUP-ah hian Party policy ni tawh lovin sorkar policy a ni tawh avangin party mai ni lovin mi a nawlpui, a ti thei tur ang leh a mamawh leh a phu angte chu pek an ni zel a ni, tin, an la ni zel dawn bawk. Chutiang chu a nih avangin tihlawhtling ngei turte, tin, hetiang policy tha hi state dangah hmuh tur a awm lo mai ni lovin keini ram state-ah pawh hian hetiang tluka tha hi kan kum kal zelah hian kan nei thei angem aw tih hi ka rilruah a awm thin a. A first phase-ah khan family 45,139 lai mai beneficiaries kan nei a. Chu mai piah lamah chuan second phase te, third phase-te a lo chho zel dawn a ni a.

Tin, hemi chungchanga Department of Economics, Mizoram University-in thil an hmuhchhuah hrang hrangte helaiyah hian a rawn tarlang a. Heng atanga a lan dante, mipuiina an chhawr tangkai dan turte, a chinchhuakin kan sawi seng lo ang. Amaherawhchu BPL, BPL lo ni tawhlo mai turte, tin, he NLUP avanga kan eizawna lo pial tawh te, kan eizawna lo tlabal tawhte han inbuild lehna tur atana ruahhmanna tha tak mai lo awmte hi mipuite vanneihna, kan zavaia vanneihna a ni tih hi kan hriat a tha a, churangchuan a hmanna chungchangah pawh hian fimkhur tak leh sawrkarin a ti tura min ruat angte kan tih mai hi kan Christianna te, kan rinna nen te pawh hian a inhmeah a ni tihte pawh hi ka sawi duh a ni.

Tin, helaiyah hian miretheite dawmkanna kan tih mai piah lamah hian nichina ka sawi ang khan thalaite khawvel thar ka siamsak dawn a ni tiin kan aupui thin a, mitam tak chuan awih lovin, an ti thei lo ang tiin min ringhlel thin a ni. Amaherawh chu vawiinah hian a nachang hria, sports lamah te tin, thalai phur zawngte hrephak, a nachang hria Chief Minister chak takte kan han nei a, hei hian nasa takin sports lamah min han kalpui chho a, sports infrastructure ropui tak tak mai kan han nei chho zut zut mai te hi vawiinah ka hmaa sawituten an sawi ang khan, he ram, Mizoram, India ramah pawh a kil ber ni si, chung ramah chuan State dang, North East amite pawh hi lokal an chak tawh a ni. Vawiinah hian kan vannei a ni, kan thalai ten khawi kawng sirah emaw, bung hnuaiyah emaw engtin nge kan future hi kan build ve theih ang, kan dinchhuah ve theih ang tiin nasa takin an sawiho thin a, beiseina an nei thin a, amaherawhchu an beiseina chu beidawnnain an khat leh thin a ni. Amaherawhchu he sawrkar lo dingin, chu sawrkar chuan a tum ram, a tum a hrechiang a, chu mi avang chuan thla 6 sawrkar atangin Mualpui, Rajiv Gandhi Stadium sak tan a lo ni a, helai Budget speech-ah hian improvement of sports infrastructure-ah hian kan hmu a, kan sen tawh mai piah lamah tuna kan budget-ah hian vaibelchhia 15 lai mai dah belh a han ni leh te hi, vawiinah hian thalaite tan, thalaite khawvel thar tih hi chu a dik a ni tih hi vawiinah hian a hretute kan ni.

Tin, chumai nilovin A.R Lammual te, tin tunah hian gallery siam tum mekin Tender-te pawh chhuah a ni mek tih kan hria a, chumai niloin Thuamluaia mual Lunglei ah te 4 Crore man Astro turf phah turte, tin, ka hma lawka kan member zahawmtakin a rawn sawi ang khan hmun hrang hrangah Saidanah te, Kawnpuihah te, khatiang khan, Champhaiah te, kan sawi seng lo ang. Aizawlah ngei pawh Pitarte tlangah te, Keitumah te, kan sawi seng lo ang, khang zawng zawng mai kha vawiinah hian he sawrkarah hian thawh mekin alo awm a ni. Heng avangte hian a ropui ka ti a. Tin Land Use Policy han tih ang chi kher lovah pawh hian nasa taka tan lakna he kan Budget-ah hian alo lang a, chumai piah lamah chuan hmasawna atana pawimawh tak mai Kolodyne Multi Modal Transport Project han tihte. Tin, Strengthening of Taxation Department han tihte hemi atana sum ruahmante leh kalpui dan tur hrang hrangte han hmuh hian a lungawi thlakin ka hria a. Tin, kan sawi seng lovang hei MPSC examination hall a, minute 10-ah chuan kan khawp khamlo ang in ti a, minute 15 kan vaibelchhia 288.32 a sak tur tuna tih mek ang chite kan hmua lawmawm hlein ka hria a.

Tin, chumai piah lamah chuan chu aia pawimawh leh chu vawiinah hian kan budget-te pawh a lo pun theih nan leh kan than zelna tur atana pawimawh chu he sorkar hi ka ta a ni tihna rilru nei a sorkar hnathawk a ni emaw, Loneitu kan ni emaw kan zavai mai hian sorkara kan pek let leh tura leh kan tih tur hi kan tih mai hi a pawimawh a, chumi atan chuan hei kan budget speech-ah hian tax and non-tax proposal-te kan hmu a, tin, stamp & registration tihte khatiang khan chi hrang hrang kan hmu a ni. Heng zawng zawngah hian Pu Speaker, kan budget hi a tha tawka ka ti a, chutihruah chuan miretheite thleng phak budget, thalaite thleng phak budget hetiang anga pharha alo awm ta hi kan Finance Minister zahawm tak hi he budget-ah hian ka rawn support a ni tih kha ka sawi a ni e, ka lawm e.

**S P E A K E R** : Chair atangin ro ka'n nei deuh teh ang. Pu Lalduhoma emaw Dr. R. Lalthangliana emaw tu emaw zawk zawkin sawi hmasa sela, a dawta a sawilotu zawkin sawi leh sela, chumi hnuah chuan a changtu Minister-in wind-up ta mai sela, House Leader-in sawi duh a neih chuan kha kha House Leader-in nge sawi hmasa dawn a changtu Minister kha ka hre chiah lova, anmahni pahnih khan insiamrem mai sela. Chutiang deuh chuan ti ila, tichuan, dar 4:00 P.M. velah khian kan bang thei maiin ka ring deuhva.

Pu R. Selthuama tunah kan sawm anga, Pu K.Lalrinthanga te Pu K. Lianzuala te kha chu insum theihna thlarau han chang mai ta ulangin a lawmawm ang ka'n tia nih chu. Tunah Pu R. Selthuama ilo sawm ang.

**Pu R. SELTHUAMA** : Pu Speaker ka lawm e, hei Finance Minister thar zahawm tak maiin budget tha deuh mai a rawn pharh hi a lawmawm ka ti a, ka'n lawmpui hmasa duh a ni.

He budget hi inngahna fel tak mai neia siam a ni hi lawmawm ka ti a, Mizoram Fiscal Responsibility & Budget Management Act, 2006 in Fiscal Reform a phut angte leh 13<sup>th</sup> Finance Commission-in rawtna a siam ang zulzuia kal tur anih avangin tunhnu zelah pawh chutiang chuan a kalchho

dawn a, chuang chuan budget tha leh duhawm tak a ni. Tin, revenue surplus chhonzawm zel a han ni turte hi a ropui ka ti a ni. Kum pangngaiiah chuan Pu Speaker, i hriat angin Budget Session hi March thlaah neih a ni thin a, tichuan, April thla kumthar atangin kha pawisa pawh kha a hman theih thin a. Amaherawhchu, hei nikum leh kuminah chuan kan tlai ta hle a. Kan hriat angin hei kumthar pawh thla li naah pawh chawhnu lam a ni leh tawh a, tunah hian Budget Session kan han nei thei chauh va, hei hi duhthu chu a sam lova. Amaherawhchu, hei hi kan duhthua kan tih theih a ni lova, Planning Commission-te'n kan plan budget tur an tihfel hma chuan hei hi a tih theih si lova. Tunhma deuh khan ka hriatsual loh chuan October thla velah hian discussion neih a ni thin a, Chief Minister hova discussion an neih hi January-ah te a ni a. Chuti a nih chuan March thla hian Budget Session neih a ni thin a. Mahse kuminah chuan hetiang hi a ni ta lova, kum lo thar zelah chuan hetiang hi a nih theihna tur hian kan hotute pawh hian tan la thei sela a lawmawm ngawtin ka ring a. Amaherawhchu, tunah pawh hian a tlai tawh hle mai a, duhthusamin a hma tawhlo na a, thil lawmawm tak mai kan Finance Minister zahawmtak hian budget-ah tiang hian a ziaak a, Pu Speaker, i phalnain ka'n chhiar ang e. "However, utmost effort have been undertaken to ensure timely and quality utilization of public fund by way of simplifying the procedure of obtaining administrative approval and expenditure sanction", kan tlai tawh kan ti a. Hetah hian financial sanction-te nei tur hian thla hnih thla thumte a lo duh thin a tunhma khan. Amaherawhchu, khang kan tlai hriain khang a procedure-te kha awlsam zawka siama reilote chhunga sanction-te pawh nei nghal mai thei tura kan Finance Minister-in ruahmanna a siamte hi a lawmawm ka ti a, ropui ka ti khawp mai.

Tin, hemi hi kan department hotute hian chhawr tangkai ngei sela, tun thla chhunga budget kan pass chuan August thla chhung, a tlai berah September thla chhungte hi chuan financial sanction nei thei turin inbuatsaih sela a lawmawm ngawtin ka ring. Chutichuan kan hna hi a muang lovang, hna kan thawk tha thei ang tih ka beisei a ni.

Tichuan, budget tha tak a ni tih a lanna chu budget atana pawisa dah tam tak mai hi Sorkar hnathawkte hlawhah a kal dawn a, hemi hi a kal tamna chhan pawh kan hriat angin Sixth Pay anga kan Sorkar hnawthawkte hlawh pek a ni a, chung mai chu nilovin Muster Roll chi hrang hrang, chung mite tan pawh chuan an daily hlawhte pawh kha tihpun a ni a. Chuwangchuan, Sorkar tha, mahni hnuai mite pawh an awmdan ngaihtuah a, an thatna tur rela ngaihtuah fel thei Sorkar a ni tih a lanchian tirin ka hria a. A hnathawkte duhsak nachang Sorkar an awm hi Sorkar hnathawkte pawh hi an lawmin ka ring a ni.

Tin, hun ka ngah loh avangin ka sawi teuh lovang a. MLA LAD fund hi nikum ang bawkin Constituency khatah nuai 25 dah leh a ni a, hei hi a lawmawm khawp mai a. Amaherawhchu, kei ka duhthawh deuh a, hei aia tam hian a tih theih lawm ni aw ka ti a. Nagaland-in nuai 100 an nei a, Meghalaya-in nuai 100 an nei baw a, West Bengal khuan nuai 150 an nei baw a. MLA fund-a hna kan thawh hi kan thawk tha a, (Speaker : Anni chu an constituency khu a lian deuh hlek, keini constituency ai chuan) chu pawh nisela, a thawh tur ngah bik kha kan ni a, keini chu kan la in develop lo deuh a. Chuwang chuan, hei hi tam thei deuh sela, kei chu ka bial chhungah hian MLA fund kan tih dawn pawh hian veng tinah ka kal a, Village Council-te leh kan hruaitu hote sawmin hna thawh tur awm ang kha ka enpui a, chutah duh kan thlang ta a, thawh tur kha. Tichuan an thawh hnuah pawh hian tum

hnih tum thumte ka enpui leh thin a. Chuvang chuan MLA fund a kan hnathawh hi a tha a, tlemin han inchhuang deuh ila, tuna MLA hoah hian a thawk tha ber nih ka hauh a ni. Pakhatna ka nih loh pawhin pahnhna hi chu ka nih ka ring. Chuvang chuan MLA fund hi tun aia tam deuh hi han tih theih nisela, a lo berah nuai 50 tal te emaw hi chuan kum tharah hi chuan han pun theih nisela. Tichuan kan bial chhung atan phei chuan a tha ngawtin ka ring a. Nuai 100 te phei chuan min tihpun sak sela chuan bial chhungah hian a tlin reng theih mai ang ka ti a ni.

Tichuan, Pu Speaker, Chief Minister zahawmtak, a vanglai huna infiamna lam sport thei mi, Football-ah te, Hockey-ah te pawh State aiawh, District aiawh te a lo chhuak thin hetiang Chief Minister neih man hla zia hi sport lama kan hotute, kan thalaite hian an hria a ni. Tunah chuan Lammual-ah pawh Astro-turf an phah tawh a. Tichuan kumin kumtharah hian tun fund atang hian Lungleiah Thuamluaia Mualah Astro-turf phahna tur crore 4 dah a ni a. Chu chu an lawm aniang i phalnain helai chanchinbu hi ka'n chhiar lawk teh ang, Lungleia mite chu an lawm em em a ni, budget-a dah a ni tih an hriat khan. Lunglei District Football Association-te chuan thuchhuah siamin Lunglei thalaite rualawhnate hrethiam a Chief Minister Lal Thanhawla'n HPC Cup 2010 Thuamluaia Muala closing function a hmanpui tuma Lunglei Field-ah Astro-Turf (phul lem) phah anih tur thu a sawi chu amah ngeiin bawhzui sakin tunah hian a leina tur pawh chu budget- ah an khung sak ta chu lawmawm an tih thu an tarlang. Phul lem kan neih theihna tura kawng hrang hranga hma min laksak tu kan district chhunga MLA te, Pu Zodintluanga, Sport Minister, Pu P.C. Lalthanliana, LAD Minister, Pu S.Laldingliana, Parliamentary Secretary-te chungah lawmthu kan sawi bawk. Phul lem kan neih theihna tura kawng min hawsaktu High Power Committee for Lunglei District, Vice Chairman Pu Joseph Lalhimpuia chungah kan lawm em em bawk, an ti a ni. Chanchinbuah pawh an chhuah a ni. Ni hnih khat lek budget pharh a ni a, chutichung chuan lawmthu an sawi tawh a. Infiam mite tan chuan he sorkar, Pu Lal Thanhawla sorkar hi belh tlak tak tak a ni. A taka hnathawktu, a tiam tawh chu a taka hlen zel sorkar a ni tih an hria a, lawmthu sawina chang an hriate hi a lawmawm hlein ka hria a.

Tin, NLUP han sawi leh teh ang. NLUP hi i vei lama thute khan an han sawi buang bar thin tak na a, an lawm em em a. Amaherawh chu an duh thu ang chuan a kal bik lo a ni, kal thei tur chu a ni lo. Kan campaign lai khan keini kan sorkar leh chuan NLUP changtlung zawkin kan kalpui leh ang, tiin kan sawi thin a. Anni chuan, a theih lovang, cheng nuai 1 a sem hi engti zawng mahin a theih lovang ti thin tute kha an ni. Amaherawhchu, kan han sorkar a, Pu Lal Thanhawla sorkar chuan mirethei chhung tinte tan cheng nuai 1 an han dah ta a, tichuan an han sem tan leh a, chuta an sawisel leh chu a tlem lutuk, installment-in an pe, nuai khat an pe lo tihte kha a ni a. Tin, chubakah chuan anmahni pawl ringawt mai an induhsak tihte an sawi a ni. Chu chu waviinah hian sawichhuah ka duh chu, pawl ringawt mai hi kan duhsak a nilo tih hi ka sawi duh a ni. Ka bial, kan constituency-ah sawn chhungkua 689 thlan chhuah an ni a, chumi zinga chhungkua 200 chuang hi congress ni lo, party dang ami an ni a. Tichuan veng khatah phei chuan mi harsa ve deuh mai an awm a, an pa chu cancer-in a dam lo lehngal a, hei NLUP i dawng dawn a kan rawn pe dawn che ti a an zuk hrilh chuan a lawm khawp mai a, "e! ramhnuaiyah khan tunhma khan underground-in ka awm ve thin a, kan lo chhuah hnuah kum sawm kan sorkar a, chumi chhung chuan sorkar-ah tanpuina pakhatmah ka dawng lova. Nangni congress in han sorkar hnuah phei chuan NLUP te hi dawn ve ka beisei phak lo, amaherawhchu, party pawh thliar lova



hetia a mawmawhte min han pe hi chu kan dam chhungin in party-ah kan awm tawh ang”, a ti a. A thi ta nghe nghe a, a thih hmaa a nupui a chah chu congress-ah hian membership fee lo pe ula, in dam chhungin congress-ah hian lo awm rawh u, a ti nghe nghe a, chuvang chuan an rawn pe ta nghe nghe a ni membership fee pawh. Chuvang chuan party dang keimahni party chauh nilo party dangte hi kan pe a ni tihte hi hria se a thain ka hria.

Tin, chubakah hei a vawikhatnaah hian chhungkua 45139 tuam an ni a. Tichuan a phase hnihnaah phei chuan 45000 emaw vel bawk tuam leh tur a ni a, chuti chuan chhungkua 90000 a ni dawn a. Tichuan, survey neihah kha chuan chhungkua 120000 vel hi a dawng thei tur an ni a, chuti anih chuan a phase thumnaah phei chuan tuam vek tur a ni ta a ni. Congress hlir hi thlang ang pawh ti ila a daih lo reng reng, tihngaihna a awm lo. Chuvang chuan Mizo mipui zawng zawng a mamawhte hian an dawng dawn a ni. Mahse vawikhatah a sumin a daih loh avang chuan sem hmasak chu an awm a lawm. Engatinge sem hmasak hi an thik em em, an chan hun chu a thlang dawn a ni. Khawharinah kan kal a, YMA in thingpui an han sem pawh hian vawikhatah a daih vek lova, an va la leh a kan lo nghak mai thin a ni a. An hun lo thlen hun hi lungawi tak hian lo nghak se a lo thlang ve dawn a ni tih hi ka'n sawi duh a ni.

Pu Speaker, kuminah hian ₹ 234 NLUP dah leh a ni a, nikum lam khan i bialah te pawh a bik takin industry sector amite 1<sup>st</sup> installment la dawng kim lote pawh an awm a ni, chu chu engtizia nge an ti a, zawhnate pawh hi a lut tam hle mai a thingtlang lam atangte pawhin. Amaherawhchu, Industry Sector-ah khan a tirah chuan mi 3200 dawng tura ruahman an ni a, chumite tan chuan nuai sangkhat leh za dah a ni, mahse selection an han tih tak takah chuan chhungkua 10819 in an dawng ta si a, a let thum aia sangkhata tamin an dawng ta a, chuvang chuan a daih ta lo a ni. Chumi atan chuan kuminah hian Industry hnuai nilovin Agriculture Sector hnuai cheng nuai zakua leh sawmpakua leh singsarih leh sanghni (9019.72) hemi Industry Sector atan hian dah a ni a. Tunah he budget hi kan han pass a sanction an han lak hunah chuan i bialte leh Mizoram pumpuia industry sector ho khan an dawng dawn a, he House kaltlang hian Mizoram hmun tin ami Industry Sector thlangte kha an hun a lo thlen vek vekah chuan 1<sup>st</sup> installment, 2<sup>nd</sup> installment tih kha rang takin an dawng thei dawn a, a nui hnuhngah an tang dawn a, an vannei zaw phian dawn a ni tih hi ka'n sawichhuak duh a ni.

Tichuan, he sorkar miretheite hmangaihtu chuan NLUP an han tih nachhante hi mirethei tan a ni a. A dik tak chuan kan thingtlang miretheite hi an rethei em em tawh a. An mahnia vawk vulh tur leina neilote an ni, chuvang chuan mihausa hnenah vawkte min lei langin ka lo vulh hlawh ang e an ti a, kum khat chuang zet te an vulh hnuah chu an vawk vulh chu an talh a, a nghawngah an tan tawp a, a lu kha an chang a, abak zawng kha a zatvein an insem thin a ni. Chutiang khawpa khawngaihthlak chu an ni a, chungho tan chuan eizawna ngelnghet an neihna tura 1<sup>st</sup> instalment-a cheng sing 20,000/- an han dawngte hi chu a lawmawm takmeuh a sin.

Hmana NLUP sem hmasak anih pawh khan Ailawng khuaah khuan chhungkua harsa ve tak an awm a, leilet an thlang a, ₹ 10,000 vawikhatah khan an han dawng a, an nu chuan kan Inah hian ka dam chhungin vawikhatmah cheng singkhat hi

a la lut lova, chuvangin zanin chu ka mutpui dawn a ni a ti a ni. Chu cheng singkhat chu a mutpui tawp a ni. Chutiang hote tana cheng sing hnih 1<sup>st</sup> instalment-a kan han semte hi chu Pu Speaker, a ropui asin. Helai i veilam amite hian miretheite dinhmun hrechianglo hian an sawisel mai thin a, miretheite tan hi chuan a hlut zia hi cheng singhnih pawh chu 1<sup>st</sup> instalment chauh ala ni a, instalment dang nuaikhat tlinna turin cheng singriat hmuh tur an la nei nghe nghe a ni. Chutiang ang chu anih avangin a ropui hle mai a, hemi ringawt pawh hi sawi dawn ila, darkar khat sawi tur ka nei a. Amaherawh chu Pu Speaker, hun a chep hle naa vawikhatmah kum 2 leh a chanve chhung hian hun ka la dil belh ngailo che a, reilote chu vawinah hian ka dil belh che a ni.

Ka sawi leh duh chu, kan Sorkarin huaisen taka chhiahpunna tur ruahmanna a han siam hi a lawmawm ka ti. Kan hre theuh a, Sorkar hnathawk chuanin professional tax kan pe thin a. 1973 lai khan kei pawh professional tax khawntuah hian ka awm ve a ni. Chutih lai chuan a pe tam ber ₹ 250/- an pe a. Tunah hi chuan ₹ 2500/-an pe tawh a, mahse khatih hun lai chuan vawksa kha kg-ah ₹ 2/- a ni a, tunah chuan Kg-ah ₹ 200/- a ni tawh a ni. A let za vel chutiang anih kha chuan ₹ 250 let za kha chu ₹ 25,000/- vel a ni. Chuvang chuan hengte pawh hi tihpun a hun ve a, Constitution avanga englo anih pawhin kan hotute hian rangdeuhin a tih dan ngaihtuah sela, kum a tawp leh mai dawn a, sum hi kan mamawh si a heng sumte hi nichina kan sawi tak ang khan miretheite tante pawha han hman zel tur anih avangin. Hetiang sum te pawh hi tlema kan pek rualkhai theihna dan turte hi ngaihtuah theih nisela. Tui bill chungchangahte pawh hian tihpun a tha ka ti a, keima mimal ngaihnanin. A chhan chu tui kan neih loh hian karkhatah vawikhat a lo haw a, chu chu kan han nei lova, kan lei chuan ₹ 1500 in kan han lei a, chu pawh chu karkhat tla lek a ni. Thlakhat tla a ₹ 100 te ₹ 150 te chauh mai kan han chawi hi chu tihpun hi a manhla niin ka hria a. Tichuan a tawp ber atan Pu Speaker, hei kan Finance Minister-in budget tha deuh mai a rawn pharh hi ka support a, pass pawh hi pass-pui vek a, helaia lo kal zawng zawng chuan pass-pui vek turin ka ngen e. Ka lawm e.

**S P E A K E R** : Le, Pu Zualtea leh Pu K.Rinthanga i sawi kepah ngai tawh mai ang. Minute 5 nge minute 10 kan inpek ang kan ti a, minute 10-ah chuan kan khawp khamlo ang in ti a, minute 15 kan han ti a, minute 13-ah bell han tiri ila, minute 15 chu khum lo ila kan ti a, kan inthlah zalen viauin ka hria a. Amaherawhchu, politician-te hi chu darkar 3 pawh chhumlo chatlo a sawi thei vek kan ni a, kan tan chuan minute 15 pawh a lo chep viau a, mahse dar 4 thleng hunbi nei kan ni tih kha hrereng ilangin. Tunah Dr. R. Lalthangliana ilo ko ang.

**Dr. R. LALTHANGLIANA :** Pu Speaker, ka lawm e. A hmasaberin Economic & Statistics lehkhabu an rawn siam chhuah hi a tha viau mai a, helaiah hian thil pakhat ka rilrua lo awm kan hmuh mai chu Mizoram-ah hian mihring provisional figure, census chu a ni chiah lo mai a, ni 31 March, 2009 khan nuai 10 leh sing 9 leh sang 8 leh zariat sawmhnih pasarih niin chhungkaw 414705 awm angin a rawn tarlang a. Chumi awmzia chu chhungkaw pakhatah hian member 4 vel awm anga chawhrual theih turah ngai ta ila. Tahchuan, Pu Speaker, Mobile Phone hi subscriber awmzat kha a rawn tarlang a, 621417 in mobile kan nei a, chumi awmzia chu chhungkaw tinah hian mobile 2 hi chu a

awm hrim hrim tihna a ni a, nausen nen. Engemaw zawng chuan a changkang viau a, amaherawhchu, kawng lehlamah kan ram dinhmun en erawh chuan engemaw lungchhiat thlakna laite pawh a awmin ka hria a, chulai chu ka'n sawi lawk duh a.

Tichuan, a hmasaberin kan Finance Minister thar hi a chungah lawmthu ka'n sawi ve duh hrim hrim a, duhsakna ka'n hlan duh bawk a. Tin, chumi rual chuan a huaisen dawn viau te pawhin ka hre bawk a, June ni 14 a Romei chhuakah khan 'Mizoram sum dinhmun thalo, Finance Minister-in Sorkar tlakchhiat a hlau' tih kha a rawn tarlang a, tiang hian—'Finance Minister, Pu H. Liansailova chuan Mizoram sum dinhmun that tawh lohna leh sum lakluh a tlem thu sawiin tun ang renga Sorkar sum a heu chak a, sum lakluh dan kawng dang dap a nih loh chuan kum 4 velah Sorkar chu a tlakchhiat hial a hlauhawm a ti' a ti a. Kawng lehlamah chuan tlang deuh maia kan dinhmun a rawn sawi ngam hi lawmawm ka ti khawp mai a. Chuvang chuan, waviinah kan Finance Minister-in budget a rawn pharh kan sawiho mekah pawh hian lawmthu tam tak sawitur a awmlo a nih pawhin amah ngei hian kan dinhmun thatloh thu a lo sawi tawh avang khan kan hriatthiam sak kha a thain ka hria a. Chu chu kan dinhmun, ama ka ngei atanga ti mai ila, chanchinbu atanga lo chhuakte leh Press handout atanga lo chhuak kan hmuhte a ni a. Chuvang chuan, MLA Fund-te pawh kha kei tihpun kha ka duh khawp mai a, mahse kan tipung dawn lo hian ka hre deuh a, budget han en hian. Amaherawhchu, sum dinhmunte a la tha anih erawh kha chuan tihpun ngei kha chu ka support khawp mai, a hman pawh kan hmang tha tih kha chu a chiang.

Kumin March thla khan Pu Speaker, helaiiah hian Session kan nei a, Vote on Account kha a ni a, budget pumpui ang zawng khan thil kha kan sawi lova, amaherawhchu kan session lai mek khan kan sum neih dan tur, vaibelchhe 1700 kan neih tur thu kha chu kan hre lawk tawh a. Hei 2008-2009 MNF sorkar tawp khan vaibelchhe sangkhat plan kan tawh chhova a lawmawm viau a, 2009, tuna sorkar mek kan sorkar khan vaibelchhe 250 pungin 1250 a lo ni a, a hma aiin 25% in a pung a, 2010-2011 ah khan vaibelchhe 1500 niin 20% increace a lo ni leh a, kumin hi vaibelchhe 1700 ah kan thu a, tah chuan a punna percent hi kan han chhut hian 13.33% in a hniam ta dawrh mai a. Kum thum/li bawr vel atanga chhut kha chuan kan budget hi a chhuanawm loh ber kum a ni ve tlat mai a, a pawh khawp mai a, tumah indem thu a awm lova. Amaherawhchu, kan sang lo a ni tih chu a hriat a.

Tin, 1700 pawisa bawm pakhat hian NLUP vaibelchhe 234 bawr kha lakchhuah an ngai ve leh dawn a, khami han paih leh kha chuan waviinah hian engtham vak mah pawisa hman tur hi kan nei thei dawn lo niin ka hria a, chu chu ka'n sawi hmasa duh a.

Tin, tuntuma kan Plan Budget kan sawi lai mek hi nakum March ni 31, 2012 daih tur a lo ni a. Damtea Pathian zara kan awm a nih chuan Pu Speaker, kan hriat vek angin nakum March thla kan han thut leh hi chuan kan Budget helaiia kan pass leh thei a nih chuan March 31, 2013 inthlan kha a hawl dawn ta a, hetia han ngaihruat dan chuan, vawikhat full budget hi helaiiah hian sorkar mekte term chawhnu lam a lo nih tawh bawk si avang hian kan thu deuh chauh dawn mai niin a lang chauh a. Inthlan kumte hi chuan tu sorkar mah hian

hnathawhna tur pawisa hi a hman tak tak theih loh tih hi kan hriat tlan ka ring. Hei kan Demand for Grants-ah khan list kan han siamchhuak puat puat a, tahkhan Demand 40 atanga thil langchiang em em mai chu kan sorkar Department 20 te sum hman tur hi a hma kum ai hian a hniam ta vek mai a, hei hi a hniamna hret hret ho kha nizanah ka'n belh a. A sang Department chu a awm, mahse, a hniam Department hi 20 an ni a, nuai 3471.34 in a hniam a ni. Chu chu NLUP kan han tih viau lai khan Department 20 erawh hi chuanin hna hi engtinng e an thawh ang aw! tih hi a ngaihtuahawm ta hle a ni tih hi ka'n sawi duh a ni. Chumiin a nghawng tur hi sawi lawk theih chu a ni chiah lo na a, hei waviin angah te, nikum lamah te nghawng kha a nei tan viau tawhin ka hria a. Hei kan DIET, Mini DIET te, District tinah DIET kan nei tawh a, hlawh hi ka hriatsual loh chuan kumin February thla atang hian an la la lo a ni. Mizorama sorkar hnathawkah chuan hlawh la lo rei ber an niin ka hria a. Tin, hei Corporation-a kan hnathawkte pawh hi han zawt ta ila, tin, School Education Department leh Department thenkhatte a bik takin waviinah hian Plan-a hlawh la chi hian Pu Speaker, hlawh hi an la lo hnem em em a, hei hi Budget Session kan neih mek lai hian kan hriat ka duh a. Tin, Sorkar chu mipui tana ding kan ni a, mipui kan ngaihtuah a ngai a, Buhfai harsa ta lutuk te, Gas man sang ta lutuk te hi subsidized dante a awm lo'm ni aw, petrol-te pawh tianga kan kal chho zel anih chuan kum tawp lamah chuan 1litre pawh hi 100 a ni lovang tih pawh a sawi theih tawh lo a ni a. Diesel 1ltrs. 42 alo ni chhova chuvangin harsatna hian min tlakbuak chho hrim hrim mai a. Ka bial lamah chuan sorkar hmasa lama inhlawhna BPL kan tih ang chite pawh kha a awm lo ve lutuk ta a tun sorkarah hian, kan inenchian a ngai khawp mai a ni. Kan sorkar hi kan tan deuh tak tak chu avan tul em tih kha ka rilruah a lian khawp mai a. Ruling hian kan manifesto-ah khan kan tarlan pawimawh ber chu NLUP kha a ni a Pu Speaker. NLUP hnuaiiah khan eizawwna ngel- nghet nei tura kuthnathawktu chhung kaw pakhat tanpui nan sorkarin cheng nuai khat sen a inhuam dawn a, project hlawhtlin ngei tur tha bawk si ah chuan hei aia tam daih pawh sen a inhuam dawn tih kha a awm a, NLUP hi thalo kan ti reng reng lova, kan han sawi hian engemaw ti zawng lo ula pek ngei kha a tha a ni. Kan manifesto anga kal hi a hun tawh lawm ni, hun chawhnu lam pangte pawh a ni ve tawh a, hmun nga thena hmun khat chauh pek em em hi chu, hmannah kan ti ti ho naah pheih chuan NLUP hming hi thlak ila puitling scholarship ti mai ang an ti deuh choh a ni. Chuvangin hetiang anga kan kal chhoh chuan, sem a, pek chu a tha an hnathawhna tur atan tangkaiah hman theiha chhankhat lo zawnga sem hi chu ava tha em tih kha a dawng turte hma khaw ngaiin ka sawi ve mai a ni.

Tin, Youth Commission kha sorkar hmasa khan kan ngaipawimawh em em mai a, hmannah khan zawhna a awm deuh va, kan kalpui dan chu inenfiah hi a ngai hle maia tih kha ka sawi duh lawk a ni.

Tichuan, work schedule leh work performance budget tih ang chi kan beisei viau lai hian Department 20 te hi chuanin an work programme hi siam turin beisei mah ila a harsa viau mai awm mange ka ti a Pu S. Hiato enkawl Water supply pheih hi chu an pawimawh teh reng nen hian nikum budget ai khan cheng nuai 2805 in a hniam daih a ni, engtinng e tui hi kan pump chhuah ang tih hi, thalah hian ka ngaihtuah khawp mai. Tin, Public Works Department hi kum hmasa aiin a tlemna hi nuai 4944.75 a lo ni a. Power Department tlemna hi nuai 2833.42 a lo ni a. District Council pathumten kum dang

an phak lohna belhkhawm pathum hi nuai hlir nuai 735.22 a ni a. Environment & Forest Department-in nikum an phak lohna hi nuai 1879.69 a lo ni a. Information & Computer Technology-in nuai 234.9 in an pha lova, Industry- in nuai 1306 zetin an pha lova. Sericulture-in nuai 1053 in nikum an pha lova. Hetiang ang dinhmuna kan din hi chuan kan hmabak hi a thim viau mai awm mang e aw ka ti a. Chuvang chuan wawiinah hian ngun taka sorkar ang pawha ngaihtuahna kan hman hi a van ngai em tih hi ka'n sawi duh a ni.

A dang leha ka'n sawi duh chu, Pu Speaker, 13<sup>th</sup> Finance Commission chungchangah hian Grant-in-Aids for Maintenance of Roads tiin Central sorkar atangin pawisa engngemaw zat kan hmuh tur a rawn list chhuak a. Annexure I, Phek 5, phek 6 combine-ah hian India ram state 28 ten kan hmuh dan tur 2011 atanga 2015 thleng, kum 5 chhung kan hmuh tur hi a rawn tarlang a. Engatinge kumin hi kan vanduai riau te ka'n ti a. Tah hian a hmu sang ber tur hi Assam an ni a, Congress sorkar-te pawh an ni a. Kum 5 chhunga an earmark sak hi vaibelchhe 335.92 a ni. Pahnihna hi Arunachal an ni a, vaibelchhe 161.57 a ni a. Nagaland hi pathumna niin Congress nilo sorkar an ni, vaibelchhe 159.78 an ni a. Palina Tripura an ni a, vaibelchhe 122.4 an ni a. Pangana hi kan ni dawn tawh emaw ka ti a, mahse Meghalaya an la ni tlat mai a, vaibelchhe 100.42. Manipur hi a parukna, hmuh tam dan indawtin, vaibelchhe 99.1. Mizoram hi a hmu chhe ber dawttu, a pasarihna niin vaibelchhe 89.19 a ni a. Chuan a pariatna Sikkim hian vaibelchhe 67.16 an hmu dawn a ni. Hei chanchinbuah te kan lo chhiar vek tawhin ka ring a. Kan Public Works Department-te leh kan State Finance te, engngemaw thu inhmuh fuh vak loh te a awm tih kha kan hretlang vek tawhin ka ring a. Khang kha sawi hman hi ni vak tawhin ka hre lova. Kan kawng hi a chhe em em tawh mai a, hmuntin mai hi wawiinah hian harsatna kan tawk a, kal hleih theih loh dinhmunah kan ding tawh a.

Hnahthial lampanga kan hotuten min rawn phone a, Tarphe kawng a ping tih te, Lunglei Buarpui kawng tihte, Aibawk-Buarpui-Darlung kawng tihte, Lunglei, Tlabung, Aizawl, Serchhip Hnahthial kal tlanga Lunglei kawng chhiat zia te, tiang khan harsatna tam tak, Pu Speaker, kan tawh mek laite a lo ni a. Chuvang chuan Finance an ni emaw, Public Works Department an ni emaw, thiamthu sawi zawng khan tuman kan tan thianga lo. Amaherawhchu, hetia earmark fel tak Central sorkarin 13<sup>th</sup> Finance Commission atanga kan dawn tur min rawn tih tawh hi chuan guideline fel taka awm a ni tawh bawk a. A nih dan tur ang ang hi Public Works Department-ah hian kan pek mai a thain ka hria a. Hei, an Guideline-ah hian 50% matching share hi non-PMGSY road-ah a ni a, 10% hi PMGSY kawng bik maintain nan te a lo ni a. Chuta tan chuan 13.52 crore chauh mamawh kha a ni a. Hei hi Finance department pawhin pe mai sela, tin, hei hi kan pek loh pheih chuan a kum lokal zel tur atana kan tangka hmuh tur hi a su buai thei ang tih ka ring a. Chuvang chuan vaibelchhe 32.56 hi Public Works Department-ah hian kan peka hna an thawh char char loh hi chuan harsatna lian tak kan ramah hian kan tawk ang tih hi a chiangin ka hria a. Chuvang chuan hei hi ka han tarlang leh duh a ni. ( Speaker : Minute 3 hun ka pek belh ang che opposition Leader nih manah )

Pu Speaker, hei kan sorkar hnathawkte hi an lo thahnem ve viau ta mai a. Pu Nirupam Chakma zawhna Unstarred Question no 20 na leh ka Unstarred Question no 7 leh 18-naa kan zawhna hi a inan viau lai khan a chhanna a figure erawh hi chu a inmil lo deuh tlat mai a. Helaia Pu Nirupama zawhnaah hian Mizorama

Government employees-te leh khatiang contract basis te vek huam khan a zawt a, 58035 tih kha chhanna a ni a, chuta plan leh non plan-a senso awm zawng zawng belhkhawm chu kumkhat atan cheng 122001.16 a ni a, hetiang chi bawh hi Pu Speaker, ka zawhnaah erawh chuan sorkar hnathawk hi a regular leh regular lo ho kha 62377 tiin min chhang sia, chuta sum senso tur pawh chu a inang thei ta miah lo maia, helai hi a fello ka ti khawp mai a.

A pawisa senso zat tur kum khat atana an hlawh bika sen turah pawh hian nuai singkhat leh sang thum leh zathum leh 88.24 in a inthlau ta daih maia. Tin, a hnathawk zat pawh hi Pu Speaker, 4342 in a inthlau dawrh mai a ni. (Speaker : Chhangtu department kha a inang chiah a maw ?) Aw le, engpawh nisela, session hma emaw koh tantirh atanga uluk taka kan zawh a ni a, an rawn chhang uluk ve bawkin ka hre si a, hei hi a fello deuh hlekin ka hria a.

Nakin zelah hi chuan tlema accurate deuh hlekin kan zawhna hi chu min tihsak sela ka duh khawp mai. Tin, Public Works Department a nimina ka zawhna lo chhuak unstarred-ah pawh khan Division zawng zawnga kum 3 kalta atanga vawiin thlenga an sum kan pek kha ka zawt a, Aizawl North leh Aizawl South Division chiah khan min chhang a, khatiang kha chu a diklo deuhin ka hria a. Engpawh nisela, khang chhanna kan han hmuh pawh khan kum 3 kalta leh vawiina pawisa row maintain nan hian a tlem chho ta zar zar te pawh hi a fello khawp mai. Chuvang chuan kan Finance Minister hi a taima a, uluk takin thil a rawn buatsaih tih chu kan chiangin ka ring a, amaherawhchu he kan budget chhung atang erawh hi chuan ropui taka ram mipui tana beiseina ang a thlen dawn lovin ka hria a, paw ka ti khawp mai a.

Engpawh nisela, mipui te pawh hian kan tih ve tur sum lampang keimahniin tax ang zawnga kan pek ve ang chite kan tih tur ang ang erawh hi chu kan tih ve a ngai a ni ti a kan inzirtir tam pawh a tul a, a pawng a puin vei lampanga thu kan nihnaah hian ( Speaker : Road division i zawta tiraw ? Road and building-in then fel tawh Road Division chauh an rawn chhang che a ni mai lo maw aw). A Lungleiah te pawh sawn Road Division te, Building Division-te a hrangin a awm leh vek mai a, tanah chuan an inthen felna kha a rei tawh a.

A Road bik, kawng bik Division kha a ni a. Division hmun hrang hrang atanga Khawzawl te leh khawi khawi emaw Division-a pawisa allocation an neih dan ka zawhna a ni. Kha kha nia, nakin zelah chuan ka ngaipawimawh ve deuh hlek a. Tin, Pu Speaker, NLUP chungchanga convergens tum dan hi ka hrethiam lo khawp mai a, IWDP tih te, NREGS tih te nen pawh engtin nge an convert dan tur hi guideline fel tak, Government of India atanga awm, an strict em em maina karah hian a converse dan tur kha a buai thlak khawp mai a. Hei Saiha Project Director DRDA phei chuan nimin deuh maiah khan Village Council zawng zawng Saiha District ami a kokhawm a, NREGS hi kuminah chuan ni za inhlawhna a awm dawn tawh lo tihte a puang ni awm tak a ni a kan lo hriat danin. Khang vel kha a ni a, a khawih hi a turu angreng khawp mai a, ngaihtuah ngun chu a ngai khawpin ka hria a.

A tawp berah chuan Pu Speaker, NIT chungchangah hian, nimin Vanglaini chhuakah te khan helai Lengpui JAC te khan ramte chu a thlawnin kan pe thei a lawm, Chief Minister-te pawh kan hmu a lekhate pawh kan thehluta tihte a awm a, helai House-a chhanna kan han hmuhah khan hetiang kawng lo deuh khan kan inchhang bawh si a, mipuite hian thudik kan hriat chu a va tul em tih kha ka sawi duh

a ni. Engpawhnisela Pu Speaker, he kan Budget hi a pawng atakin kan sawisel lo, amaherawhchu, heta tang hian ram ropui tak kan thleng lovang tih erawh chu ka hlauthawng khawp mai a, uluk taka sum kan hman, a nih dan tur dik taka heng kan sumte hi a thlen erawh hi chu kan duh hle a ni tih ka'n tarlang duh a ni, ka lawm e.

**Pu LALDUHOMA** : Pu Speaker, hei i kaihhruaina hnuaiiah regular Budget session vawi thum kan lo thleng ta der mai a, nakumah a vawi li-na dam tein kan hmang leh ang a, a bak chu inthlan kum kha a ni tawh mai a, a lunglen thlak tan tawh maiin ka hria.

Tunhma lampang khan Budget siamna kawngah hian kan zalen lutuka kan budget-in a tuar thin a, tunah erawh hi chuan guiding principle tha tak pahnih hnuaiiah fimkhur taka kan kal a lo ngai ta a. Pakhat chu Mizoram Fiscal Responsibility and Budget Management Act, 2006 kha a ni a, a dang leh chu Fiscal Consolidation atana 13<sup>th</sup> Finance Commission in Road Map min siam sakte hi a ni a. Hemi hnuaiia controll kan han nih atang chuan kan Budget hian awmzia a nei mumal sawt hle a, a lawm awm ka ti a.

Hei Economic Survey 2011 alo chhuak a, chutah chuan kum khat chhunga Mizoramin kan sum dehchhuah zat, kan GSDP 2008 atanga 2009 kum kha kan han hre thei a, a hnu lampang hi chu chiang taka hriat theih a ni lova, 2009 atanga 2010 hi Quick Estimate chauh a la ni a, 2010-2011- hi Advance Estimate a ni a, 2011-12 tuna kan awmna lai mek hi Projected chauh a ni a.

Financial Year a lo tawp hi chuan kan GSDP hi hriat mai enge a har viauna te ka ti a, ka hre thiam ve lova, engpawh nise kan budget hi kan GSDP atanga teh deuh vek a ni a, kan tehfunga kan hman ber GSDP hi a chian siloh chuan kan figure tam tak mai hi a chiang lo fai vek thei mai awm mang e aw tih kha ka rilruah a lo lut deuhva. Tin kan per capita income, mimal tinin kan lakluh hi kumkhatah cheng 5021/- a lo ni a, National Level chu kan phak lova, chutih lai chuan kan GSDP pun dan hi kuminah hian estimate chu 9.57% a ni a, chu chu national level aiin a sang leh daih mai. GSDP-a kan thanna lamin all India kan khum lai a, per capita income-a kan han pha leh si lo laite hi kan figure hi a dik vek lo thei angem tihte ka ngaihtuah a. Engpawh nise, khang kha chu kan hrethiam ve tak tak lova. Tin sum kan bat min phalsak zat kan Fiscal Deficit hi GSDP atanga tehin kuminah hian 6.4% tur a ni a, chu chu tuna kan estimate- ah hian 2.4% kan ni der tawh mai a, tun atanga kum 4 lai lo la kal tur 2014 leh 2015 ah khian 3% a tlahniam turin min bituk chauh a ni a, chu kum li hnua kan dinhmun tur chu kuminah hian kan tlak fel der tawh, a aia nasain kan tlak tawhte a lo ni ta a, hengte hi tak tak a nih chuan ava lawmawm awm ve ka ti a, tak tak alo nilo palh ang tihte ka hlauthawng a. Chutih laiin GSDP atanga teha za zela 85.7 hi min bat tir phal zat a ni a, bat kan tum zat chu za zela 49.62 a ni a, min phal sak aia tlem daih kan ba dawn niin a lang a, chutiangte a nih tak tak dawn chuan a lawmawmah kan ngai a, kan achieve der tawhah ka ngai a.

Amaherawhchu, chutih rual chuan Pu Speaker, inflation hi kan sawi ve ngai lova, thil man to hi, tunah hian za zelah 25.80 nikum December- ah khan kan ni daih tawh mai a ni. Khami hun vek kum hmasaah kha chuan za zelah 7.83 lek kan ni a, kum khat chhunga a let thum aia tama thil man

tona inflation a lo sang ta hi tumahin kan vei lo hi a mak ka ti hle a. Hei hi Sorkar hnathawkte hlawh a lo san tak thut vangte alo ni ang a, chutih ruala dinhmun sang ve ta lo mipui tam zawkte khawsak harsat zia tur hi kan ngaihtuah thleng em? Chung mite tan chuan kan Budget hian kawng a sial em tihte pawh hi ngaihtuah a ngai hlein ka hria a.

Tin kan Sectoral Contribution han en hian kan GSDP pum puiah hian agriculture-a eizawng hi zaa 60 vel mihring kan awm lain kan thawhchhuah chu zaa 18 vel lek a ni. Chuti a nih chuan kan Budget hian mipui tam berte, dinhmun chhiaa awm mekte hi engtingge kan tih ang tih hi thupui berah rawn neiin, chutiang khatieng chuan, heti zat, zaah heti zat zel hian kumin chhung hian dawmkan kan tum a ni tihte hi rawn lan awm tak a ni a, a lang hauh lo mai hi a lungchhiat thlak ka ti viau a. Tin nikumah khan revenue expenditure kha kan Sorkar khan a chhut sual nasa em em mai a, Budget Estimate leh Revise Estimate kha a inthlau lu lai a. Tunah chuan nikumah Revenue Expenditure-a kan hman zat kan hre tawh a, chumi hmang chuan kumina kan hman leh zat tur kan han duang a, nikuma kan hman zat pawh zat lo kha tunah hian Budget Estimate-ah an rawn dah leh ta a, hei hi a realistic loin ka hria a, hei aia tam hi kan hman leh ngei ngei ka ring a. Helaiia ngunthluk taka sawihona awm silo a, loh theih loha Revised Estimate-a helaiia inpass tir a, inbarh luih kha a thleng leh mai dawnin ka hria a. Nikuma kan senso zat kan hriat tawh si chuan engah nge chu em pawh zat lo saa kan induan tihte hi ka lo thlir ve dan a ni a.

Tin, kan Finance Minister zahawmtak thusawiah khan Administrative approval leh Expenditure sanction lak dan tura kawng awlsam zawk simplify a ni dawn a ni a ti a, chu chu keini pawhin kan vei, kei pawhin vawi tam tak helai hmunah hian ka lo aupui ve tawh a ni a, kan thiam ang tawk tawkin thurawnte pawh kan lo pe ve tawh thin a. Amaherawhchu, hemi simplification hi engtia tih tur nge anih tih sawi a awm miah lo mai a, hei hi a windup-naah min rawn hrilh chiang sela engtiang takin nge tunhma aia awlsamin heng sanction-te leh administrative approval-te hi kan neih dawn tih kha hriat a chakawmin ka hria a.

Awle, Pu Speaker, vawiinah hian i dinglama mite hianin budget-ah miretheite chanpual kan dah a, ZNP policy kan tihlawhtling a ni, an ti a, a lawmawm ka ti a. Budget-ah miretheite, kut hnathawkte ta dah tur kan tih laia Budget-ah chutianga dah theih loh ti thin tuten kan dah ve ta e, an ti ta hi hmasawna ropui tak a niin ka hria. Amaherawhchu, keini tum dan nen chuan a la inhlal hle a ni, vawiina NLUP a sum an dawn zat tur dah rikngawt hi a bul tanna lek a ni. Miin thil a ching dawn anih chuan a hrallh ngei dawn a ni, a hrallhna rate a hre tur a ni, a market a chiang tur a ni kan ti a ni. Miin vawk vulh engatinge an thlan kan tih chuan vawksa kg khat man an hria a, a market an hrechiang a ni. Chuti ni lova heng NLUP a kan thil tih zawng zawng hi a market pawh awm silo leh a rate chhe lutuk anih chuan a thar tam apiangin an ti tawih tam leh tho vang. Chuvangin, keini policy-te nena rawn khaikhin mai kha chu kan lai a na deuh hlek a, an pawla lut tura min han sawm pheikha chu anni zawk hi lo lut dawn se, kan training tir phawt loh pheikha chuan kan pawm mai thei dawn emaw ni chu aw ka ti zawk a ni. Nau chu a paituin a vei a ngai a, a paitu leh a veitu lo



chuan a hring thei lo, chuvangin, miretheite chhanchhuahna tak tak hi chu ni chhuah huna lo thleng tur a la ni reng a ni.

Tin, Pu Speaker, vawiinah hian he kan budget hi technical deuhva kan thlir kha chu tawk sela. Mipuite min rawn thlir sak dan atang hian han sawi ka duh. He budget kan pass tur kan hman leh turah hian change a awm dawn em, kihhnawk then a ni dawn em, corruption pho ro a ni dawn em, rorelna dik lui angin a luang dawn em, cheng khat tin kan hman chhohnaah hian tih hi mipuiten kan budget an lo thlir thiam ve dan a ni. Chumi dungzui chuan vawiin hian han sawi ka duh a.

Kan ngaithla tawh a, Public Works Department sum Engineer-in-Chief-in Press Conference-a a sawidan, chanchinbua kan lo hriat danah chuan vaibelchhe 32 lai atangin vaibelchhe 26 lai divert sak a ni a, kawng laih nana an neih chu vaibelchhe 4 awrh chauh a ni a, hma pawh kan sawn thei lovang a, a chhia pawh kan siam thei lovang a ti thlawt kha a ni a. Mizoram mipui tan chuan kawng tha neih kha a lungngaihthlak a, a huphurhawm ta lutuk a ni, Heng hi a dik leh dik loh kan hre ve lo. Amaherawhchu, helaiah ngaihtuahna sengso va kan debate a, kan pass, i hova kan tih uluk ve em em, tuten emaw heta kan pass dan ang nilova an lo divert kual leh mai mai dawn anih chuan rilru a na duh khawp ang. Tuna kan pass leh turte pawh hi khatianga tih leh mai mai theiha a kal dawn anih chuan a pawh khawp ang, a tam leh a tlem lamah ka buai lo, a implementation hi a pawimawh a ni tih hi kan hriat a ngai a. Tunah hian kan kawngte a chhia a, a repair-na leh maintain-na a chau em em a, hei hi kan buaipui ber a ni a, hengte pawh hi kan Budget-ah hian beiseina thar a rawn lang chuang lo a.

Tin, miin tui connection an la dawn a, road cutting a lo ngai a, a man chu a connection neitu turin sawrkarah a chhung vek a, chuti chung chuan kan department-te hian khawiah tak tak mah hian min repair sak lo a ni. Aizawl khawpui chhung veng tinah hian kal rawh u, connection kan lakna tura road cutting kan tih hi kan chhilh mai mai a department in a hma angin a siam leh tur a ni a, a siam na tur sum pawh kan pe, mahse tih loh in hei hi a awm hnem em em a, hman kumah pawh hei hi kan sawi tawh, heng te hi a thalo ka ti a.

Tin, MultiNodal Transport Project-te hi MNF sawrkar lai khan India Look East Policy hmang hian hma ila ang kan ti a, PAC kan zin a, khitah Singapore-ah te, Bangkok-ah te an market-ah te kan kal a, inkalpawhna tha chu nei ila, changel hnah ringawt pawh hi hlawk takin a export theih a ni tih kan han hmu a ni, Video nen kan rawn la thlap a ni. Kan rawn hawnah pawh Assembly-ah hian Press conference kan ko a ni, chawlh pawh chawl hahdam phal lovin, sawmi kawngpui ramri thlenga kal tur saw i va tlawh nghal ang kan ti a, kan Lawng chawlhna tur Hruitezawlte pawh kan va tlawh nghal a, kan hmanhmawh a ni, hei hi top priority-a neih turah kan ngai a ni. Mahse Tender koh chhung, compensate tih leh engemaw neuh neuhah hian kum hi a kal ral hnem lutuk tawh, hengte pawh hi kan hmasawna hnuk tak tak tur a nih avangin heng aia chak hian kal thei sela a lawmawm hlein ka ring a. Chuvangin Budget uluk taka kan Pass, Delhi-a officer pakhat tuin emaw a duh ang anga ama mimal hamthat nana a hui vak vakte leh uchuak lutuka pawisa siam nana a hman angte a hman leh tur atan chuan tuna kan Pass tur hi ka phal lo a ni. Khatiang kha a nih leh chuan awmzia kan neilo ang.

Tin, chanchinbu-ah kan Chief Minister thusawi kan lo ngaithla a, Mizoram officer lianten an zin dawnin pawisa tham an ching, tih thu kan lo hmu a, (SPEAKER : Minute 5 neiah la in ngai rawh) Hetianga kan officer lianten thil thalo an chin, kan Chief Minister zahawm takin a puang ngam hi lawmawm ka ti a, amaherawhchu chutiang tih ching an awm a nih chuan, an ching tih ringawt a tawp hi a dik dawn em ni? Tute nge an nih? Eng action nge an lak tih hi mipuiin kan beisei a, kan phut a ni. Khatianga anga tham mai mai tur atan khan vawiinah hian Pass leh hi kan duh lo.

Tin, Vanglainiah te pawh alo chhuak leh a, kan Health Minister zahawmtakin Nursing College sakna tur MNF hunah cheng nuai 150 an ti bo a ti a. An tibo tih a hrechiang em em a, chuti a nih chuan engtin nge an tih? A bo tih thu chauh hi min hrilh lovin, vawiinah hian an la let leh tawh em? Tu te nge mawhpur, action eng nge an lak tih hi min hrilh se ka duh. Chuti a nih loh chuan hetiang Budget Session-a kan sum ruahman sa, khati mai maia, pilbo ang chi a nih kha chuan a paw em em dawn a ni.

Tin, NRHM atanga Tele-medicine atan hman tur nuai 25 Central atangin kan dawnga, kan dawnna cheque no pawh hetah hian a copy ka nei reng a ni. RTI hmanga zawh a ni a. “Hetianga kan dawng reng renglo” tiin an chhang si a ni. Chu nuai 25, chiang taka an dawnna chu Tele- Medicine atana an dawn chu khawiah nge a awm? Hengte pawh hi vawiinah hian fiah a tha ka ti a.

Tin, he sawrkar, an sawrkar tirhah khan MNF sawrkarin MIP sum a hman ban nuai 73, NLUP hmahruai anga Aizawl khawpui chhunga vawkvulh tanpui nana sem a nih thu helaiyah hian ka sawi chhuak a, Congress worker-ten an lachhuaka, an duh angin an sem a, an sem kimlo lehngal tih zawng zawng ka sawi a, chungte pawh chu kan House Leader ngeiin ‘E a zahthlak, kan chhui anga, Pu Duhoma hi chinchang kan hrilh leh ang’ min ti thlap a. MNF kihhnawk a ni lo hei hi chu, tuna sorkar kihhnawk a ni. A reh vang vang mai, lungpui chung a nghavawk theihngilh an sawi ang maiin a reh tlawk tlawk mai a ni.

Tin, CAG report thar ber kha in lo thlir anga, khatah khan kan hmuh chu ZIDCO hian March, 2008 ah khan cheng vaibelchhe hnih leh point ruk Financial Institution-ah an lo invest a, tin, nuai hnih leh point sawmpahnih Kisan Vikash Patra-ah an invest bawk a. Tin, LIC-ah anmahni employee-te hmingin cheng vaibelchhe khat leh point pariat March leh September 2007 inkarah an lo dah bawk a, kum nga hnua mature tur a ni a, nakum khi a lak theih hun tur a nih chu. Tin, nuai sawmsarih hi Bajaj Allianz Life Insurance Company-ah hemi hun vek bawkah hian anmahni thawktute hming bawkin an lo dah a, chu chu kum sawma mature tur a ni a, kum 2017 tur a ni. Hei hian RBI Dan leh anmahni ngei article of association a kalh a ni tihte an rawn ziak a, mimal te hian Affidavit ziak mahsela Company te’n an pawm ve siloh chuan awmzia a nei lo tihte an rawn ziak a. Tin, Silchar-a LIC Branch atangin group gratuity scheme atan cheng nuai sawmli pariat leh point pakua bial an lei tihte a ni a. Heng zawng zawng hi BOD leh Govt. of Mizoram approval la lova an tih vek a ni. Hengte hi kan sorkar hi engatinge a ngawih reng, mimal hminga sorkar sum an lo dahpun, an lo chiahpuam kha hmana Health Care Scheme-a kan sawi ang chiah kha a ni a, heng mimal hming neitute lo hi chuan a draw chhuah

theih dawn loh reng reng a, chu chu kum 2017 ah te hian a lo puitling dawn a, tahchuan ZIDCO ah an pelet ngei angem, anmahni nge chang dawn ZIDCO in tih hi vawiina kan sorkar chuan a ngaihtuahin a tichiang tur a ni, hengte hi sum riralna a ni.

Tin, ration card chungchang kha nimin lamah te kan sawi tawh a, hei ka'n belchiang leh a, kan ration card neih zawng zawng hi 316884 a lo ni a, chhungkua hi 214705 kan ni a, tunah hian ration card diklo kan neih zat chu 102179 a ni daih. Change a awm em ? Sorkar hmasain a lo tihdik lohte kan ti a, heti zozai nuai chuang ration card diklote kan tireh thei lo anih chuan eng change mah hi a awm lo reng reng. Corruption phoro kan tum kan ti a, PMGSY hnuai MNF hunlaia kawng an laih, kum 2006 ami kha SOSA hovin High Court-ah PIL an thehlut a, High Court chuan CBI-in investigate rawh se a ti a, investigation an tan ta a ni. Tuna kan sorkar ngei hian Supreme Court-ah Special Leave Petition thehlutin chu thil diklo chhuichhuahna tur chu Stay Order an pe ta a, tun ni 21-ah hian Hearing a awm leh dawn a ni. Phoro tur kan ang em ? Sorkar hmasa thil tihdik loh hi chhuichhuah tul pawh kan ti lo keini chuan. Mahse an ti vek vek tawh a nih a hetiang case-te a awm anih rau rau chuan, chhui chhuah ahneka a humhim tur zawnga sam inphiar zawmin, engatinge an lo inthural leh tak mai si ? Khatiang anih chuan corruption hi kan chhuichhuak miah lovang. Khatiang anih chuan rorelna dik hi lui angin a luang lovang a, tuihawk angin a tling ang.

Civil Hospital chhawngkhat a bo tiin in au in au a, wavi hnih he session-ah hian zawhna a lut tawh a, ACB kan chhui tir, ACB report chu PWD-in a bawhzui tih hi chhanna kan dawn tawh a ni, a hlamzuih thak, engmah result kan hre lo. Mobile Unit a hlui a thar tihah inhnialna a chhuak nasa em em a, Question vawihnih he House-ah hian a lut tawh a, ACB-in an chhui tiin a zuih ral leh bawh a. Suangpuilawn kidnap case-te pawh a zuihral, Rev.Chanchinmawia thih te pawh hei a zuih ral. Engvangin nge CBI kan koh, State Sorkar-in a Police te diklo taka a control ni a hriat avang chauh a CBI hi koh ngai thin an ni. Sorkar tha a din chuan CBI hi kan mamawh lo, re-investigate tir theih a ni a. Helaiyah evidence an lo tichhia anih pawhin a tichhetute lam khan man vek mai tur a lawm. Khatiang a thil nasa tak taka kan lo aupui thin awmze neilova hetia a thamral zel dawn anih chuan confidence neih hi a harsa khawp ang.

A tawpna berah chuan Pu Speaker, NEC-ah project 53 June ni 1-ah khan Planning hian a thehlut a. Tichuan, hmanni khan June ni 7 khan chumi DPR 53 chu thehluh turin an keng thla a, a keng thlatuten Zanlawn an thleng hman chiah a, an kolet a ni. Kha kha engvangin nge koh let a nih ? A hlawhtling turte an thlang dawn nge, an duhsak an mal fek fek dawn ? chumi avang chuan an kolet em ni ? An thawn let leh tawh em? Hetiang programme pawimawh leh project pawimawhte hetiang hrim hrima a kal dawn anih chuan awmzia hi a neilovin ka hria a.

Chuvangin, heng budget kan pass tur zawng zawng hi a pawimawh berah chuan a hmanna a dik a ngai a. Rorelna dik hi a awm a ngai a ni. Chumi anih loh chuan kan ram kan moral tichhetu, kan thlarau tinatu tur a ni leh tho tho dawn tih hi a chiang em em a. Chuvangin, he budget hi kan pass tur a ni a, amaherawhchu, a

hmanna lamah fimkhur taka theihtawp rawn chhuah turin ka duh a. Chumi kawngah chuan keini pawhin theihtawp kan chhuahpui peih reng a ni tih ka sawi duh a ni e. Ka lawm e.

**S P E A K E R** : Awle, tunah chuan kan lo wind-dup tawh anga. Minister kan lo ko anga, react tur awm ang ang pawh han react sela, han wind-up sela.

**Pu H. LIANSILOVA, MINISTER** : Pu Speaker, ka lawm e. Hei vawiina kan budget kan present tawpna kan lo thleng ta a. Kan Member zahawmtakten thahnemngai tak leh zirchianga ngun taka lo ngaihtuahin, thu an ngaihpaawimawh leh infinchhuahna thilte tam tak an sawi a. Tin, kan budget, tun tuma kan han pass hi hei keimahah pheih chuan ka tih vawikhatna a ni a, ka thiam lo hle chungin Member ten....

**S P E A K E R** : ..Han pharh hi tih awmah kan ti m mai mawle.

**Pu H.LIANSILOVA, MINISTER** : A budget ka rawn present tawh a, kha kha a nia ka sawi chu. Ka rawn present hi document nimina Member-ten an han sawiah khan, budget document hrang hrang 13 lai kha a lo tel a. Tin, hei hi kum danga kan han neih thin lohte pawh a awm a. Tin, kan Member-te han duhthawhna lai pawh kha a awm bawk na a. Amaherawh chu a buatsaihna kawngah te hautak tak a ni a. Chuvang chuan hetiang budget present ruala document pawimawh tak tak kan han nei thei hi thil thar, 'change' kan tihah te pawh tel ve thei turah ka ngai a, a lawmawm hle a. Amaherawh chu, heng zawng zawng hi kan ngaihthlak tawh ang khan kan Chief Minister-in Finance kum 2 zet alo enkawl tawh a. Chumia a hmalakna leh sulhnu vek a ni a, a kaihruaina hnuaiah, kan Finance Secretary-te, kan Department Senior Officer-te leh staff-ten rim takin, uluk takin, tihsual awl tak mai a ni a. Chutianga an han ti chung chuan hetiang Budget document han present theih kan han nei hi an chhuanawm pawh ka ti khawp a. Keimah pheih chuan engmah credit han lakna tur chhan ka nei miah lova, an hnathawh leh an lo thawhrim tawhah ka lo dingchhuak ve mai a ni tih ka sawi hmasa duh a ni.

Tin, kan hriat theuh angin kan budget sawiah hian, sawi nawn pawh ngai lovin kan State finance dinhmun hi chu a that loh leh kan harsat zia kan hretlang theuh a, in hrihnawn pawh a ngai lova. Amaherawh chu, hei kan budget document-te ngun taka han zir a, kan han en chuan, hetiang finance dinhmun harsa tak leh khirh tak nimahsela, a positive side hmuh tur a awm a ni tih kan Member-te han sawi atang khan a hmuh theih nghal mai a. Revenue surplus kan la nei zel thei a, hei hi thil lawmawm tak a nihna lai a awm a. Tin, Revenue Surplus kan ngah chuan Capital Expenditure lamah pawisa hman tur kan nei tam thei dawn tihna a ni a. Chuvang chuan kan tan sauh sauh thung erawh chu a ngai thung dawn a ni. Tin, chuloah pawh chuan Revenue Deficit kan tihah pawh kan la nuaibo thei mai lo na a, kan Financial Responsibility leh kan Budget Management dawna min duh dan leh kan Budget buatsaihna atana nichina a buatsaihna atana kan ngaihthlak tak ang khan Finance Commission-in min kaihruaina huang chhungah kan la kal zel thei hi a lawmawmin ka hria a. Tin, chutianga anga hetiang ang khawpa Finance lamah

kan harsa chungin kan GSDP-ah hmasawna langsar tak a awm chho ve zel a, memberten in hmuh ang leh a bua record-a dah ang kha kan dinhmun a ni a.

Tin, kan state leiba pawh hi tuna kan record leh kan Financial document-a kan han tarlan ang khan kan GSDP percentage atanga chhutin a la tha chho zel a. Tin, nichina kan sawi tak ang khan kan Fiscal Correction Path (FCP) pawh kha kan la zawh thei hram hram hi a lawmawm a. 2009-2010 ah pheih kha chuan kan liability kha 90 crore dawn laiin a tlahniam nghe nghe a ni. Hetiang anga kan kal zel theih chuan kan Financial management, kan fiscal management hi a la tha chho viau ang tih hi ka beisei a, heng zawng zawng kan lo thlen theihna chhan hi kan Chief Minister hi experience ngah takin, kan Finance Department kum engnge maw chhung abul min tan sakin a han enkawl a. Tin, chutih rual chuan kan Finance lama kan officer hote, kan Finance Secretary-te, kan Additional Secretary-te leh kan officer dangte, Financing leh state financing an Competen-te ve tawh tih a lang em emin ka hria a, chawimawi pawh an phu a, tin, an inpekna pawh chhuanawm ka ti a ni.

Pu Speaker, vawiina kan Budget chungchang sawihonaah hian thil tam tak sawi tur awm mahse sawi tam vak lo pawh ni ilangin kan member-ten chipchiar takin document-te an lo en tawh a, tin, ngaihpawimawhte pawh an rawn sawichhuak ta bawh a, churang chuan hun rei tak hman lohte pawh a that ka ring a. Amaherawhchu thil tlangpui deuh erawh chu han sawilan leh thain ka ring a. Kan member zahawm takten in thahnemngaihna in han sawi chhuah leh han tarlan thenkhatte kha han react ngai deuhthe pawh awmin ka hria a, chubakah sawi lan tam tak kha chu demand sawi hunah, a Minister concerned-ten an lo chhinchhiah a, an la rawn clarify tur nite pawhin ka hria a, churang chuan ka rawn react vek lo mai ange. Pu Liantlinga kan Member zahawmtakin Vote on Account-a kal a ni lova. Tin, sectoral allocation hi uluk takin Finance-te pawhin lo enin tun tuma kan budget pharh ang hi duhthu sam deuhin a tih theih lom ni a han tih kha a ni a. Theihtawp chhuahin kan han ti ve a, tun hi kan han thlen chin chu a ni a. Kan Officer hote an hah hle a, mit an tlunlohna lai te pawh a awm ang tih kan ring a. Chuti chung erawh chuan theihtawp chhuah a tun hun hi budget pangngai taka kan rawn pharh chhuah theihna tur atan a lo thlen chin chu a ni.

Tin Performance budget tih lai tak kha tuna kan rawn dah chhuah kha Performance budget ni lovin, Performance Report a ni a, Performance budget tia a han sawi kha, chu chu tuna kan rawn dahchhuah kha Performance budget tia lo sawi anih pawhin, Performance Report-in kan rawn dah chhuak a ni. Tin, Department zawng zawng hetah hian kan huamtir lo deuh thin niin ka hria a, a chhan chu development department bik an awm a, khang ho kha kan beisei deuh thin a ni a, tun tumah hian Performance report kha department 42 dawn laiin an rawn pe thei zawk a, hei pawh hi Chief Minister atanga kaihhruai zui leh kan department Secretary-te tanlakna a ni a. Tin, Horticulture Department khanin an lo pelut lo kha an Director-ten pawh kan sawi a, thil inhriathai palh a awm niin a lang. Tin rang taka rawn buatsaih a, tun Assembly chhunga tih hman anih loh pawhin a ranglama rawn tih ve theih kan tum a ni. Tin, Work Programme an tih pawh kha abik takin Development Programme-ah hian nei turin kan inbeisei ber thin a, chutiang rilru pu chuan tuntumah pawh khan buatsaih a ni a. Tin, Department la pe lote pawh an la awm thei a, amaherawhchu hei aia phuisui zawk leh changkang zawka

kan la kalna turin kuminah hian a bul kan lo tan tawh hi duhthu ala sam lo deuh pawh a ni maithei a, tan lo lak zel kan tum dawn a ni.

Tin, Member thenkhat ten Sorkar sum, Plan-a kan sumte a ni ber a, hei hi Annual Plan hnuaiia kan pawisa Sanction Progress danah hian kan Member zahawmtakte pawhin kan ngaimawh thu kan lo sawichhuak tawh thin a, dawhkan 60 atanga 100 te a kalkual a ngai tih thin kha a ni a. Hei pawh hi kan Chief Minister-in Finance min enkawl sak lai khan a ngaimawh a, ruahmanna siam turin tih pawh a ni a, chutiang chu tunah hmalak zel niin, tunah hian a final stage kan lut mai tawh turah ka ngai a. Tin, hetianga work schedule emaw work programme Annual Plan hnuaiia Department-in an han neih thliah thliah angte hi tun aia fel leh ultuk zawka tiin, Planning Department-tena en hova, approved tawh anih chuan an approved tawh work plan-ah hrim hrim kha chuan anni hnena kal kual pawh ngai lova, a Administrative Department-ten Finance-ah sanction an lak mai theih tura buatsaih turin kan Chief Minister pawh hian Planning lam leh Finance lama kan hotu pawimawhte pawh min sawipui tawh a. Chuvang chuan, chutiang chu hmalakna atan chhawp tum a niin, tunah hian Delegation of Financial Power Rules pawh siamthat tum mek a ni a, chu chu wawiina ka chhan theih dan ni mai sela.

Tin, Member zahawmtak Pu B Lalhlengliana'n Finance Commission-in Rajiv Gandhi Stadium atana vaibelchhe 15 lai mai a pe si a, tuna kan Fund atanga lo pek leh hi engeni a tulna tih ang deuh khan a sawi a. 12<sup>th</sup> Finance Commission-in a pek kha a ni a, 13<sup>th</sup> Finance Commission-ah hian pek a awmlo niin a lang a. Kan thalaite infiamna lamah an tuihalna leh an potential tihhmasawna atan a pawimawh a, kan ram asset tling tak tak, thalaite tan a nih avangin Plan Fund atang hian asset create-na turin pawisa hi pek a ni. Tin, hemi Revenue related document registration tih kha Indian Registration Act hi kan hman tawh a, chuvang chuan kan document-te hi Indian Registration Act zulzua registration tih zel, a neite tan taka pawimawh tur a ni a. Tin, chu chu keini State tan Revenue hmuhna a lo ni tel thei dawn a, chutiang chuan a land holder-te tana valid document, valid tak tak, eng Court-ah pawh hman theih tur a lo nih leh pawimawhna nen hetianga Compulsory Registration han tih pawh hi ngaih pawimawh a ni bawka ni. Tin, chhanna dang kha chu nichina ka sawi ang khan Department changtu kan Minister ten Demand chhan hunah an la rawn chhang fiah ang a, Consolidated Shinking Fund (CSF) kha member zahawmtak Pu Ramhluna khan a'n sawi chhuak a, hei hi sorkar leiba a rulhna tur atana sum lo khawl khawmna a ni ber mai a. Tin, Reserve fund-a pawisa dah, leh a dang, dan hnuaiia dah The Mizoram Ceiling Quarantee Bill kan tih atanga khang hote kha Reserve Bank-in min kawl sak a. Tin, chu chu annin min lo kawl pun sak a, tichuan tuna awmsaah pawh hian engemaw zat a lo pung ve tawh a. Nakinah a lo pun tam hunah kan leiba leh engemaw khirh zuala kan hman theihna atan reserve fund anga awm a ni.

Tin, chu lo chu Pu Zothangliana'n Pay chungchang a han sawi Salary head-a pawisate hi engemawtia kawng danga pawhpen theih anga sawi kha, Office expenditure (OE) lamte a nih loh chuan heng hi khap a ni a, chuvang chuan henga savings awm reng reng chu re-appropriation phal loh anih avang hian tangkai zawka hman anih theihna turin sum bang hlawh lamah khan saving a lo awm anih pawhin chutiang anga ruahman thin chu a ni a. (Pu Lalduhoma :-

planning-in emaw sum an neih reng si an lo phalsak loh vang anih ka ring a, hman lohva kum tawpa kha ti zat awm, thil dang lei nan hman ang chi kha a awm a, khang laite kha chinfel a va tha em) Pu Speaker, hei hi kan finance pumpui dinhmun atanga thlir a ngai thin a. Vawiina Unstarred Question-a zawhna leh chhanna leh Government servant ho list Employment DATA atanga kan rawn tihlan ang khan sorkar hnathawk hi mi sing ruk deuhthaw kan sorkar hnuaiah hian a awm a. Kan population ngaihtuahin a tam hle a ni. Tin, kan thlakhat hlawh hi budget speech-ah khan tarlan a ni a, pension nen thlatin vbc 160 chuang a ni maithei, chutiang chu kan pe thei a ni. Kan revenue receipt-a han en chuan hlawh atana kan hman kha a sang tawh lutuk a ni. Chuvang chuan a tlahniam zawnga kalpui kan finance dinhmun hian mi a phut tawh a. Chuvangin tuna post la fill-up loh tih pawh kha a theih hram hram chuan kan finance dinhmun en hian kan inhrek rih zel a. Tin, downsizing hi kan kalna tur niin kan expert-te pawhin min kawhhmuh leh central sorkar-ah ngei pawh chutiang anih avang hian post thar siam lohte pawh hi kan tih zui zel leh chutiang anga kan kal chu a ngai a ni. Hlawh bakah khan Administrative Cost sang tak a la awm bawka. Chuvangin revenue receipt-a kan han sawi atanga mipui hmasawna thawhna tur aiin sorkar hnathawk hlawh leh inenkawlna pawimawh danga kan hman hi a sang em em a ni a. Keimahni sorkar hnathawk leh office inenkawl velna atan hian kan sum hi a kal tam em em mai a. Chuvangin kan in restrict deuh reng hi a tulin downsizing zawnga kan kal zel hi chu a la tul telh telh tur a nih ka ring a. Le, thil dang kha chu ka'n um zui lutuk tawh lo mai ang a. Dr. R.Lalthangliana, member zahawmtakin Mini Diet chungchang, harsatna a han sawi kha, CSS hnuaia mi an la ni a, Central lam atangin kum 2010-12 a an hlawh tur hi an la rawn release loh avangin harsatna engngemaw a awm rih mai a ni a. Chuti chung chuan Advance Allocation thla thum atan ruahman a, pekchhuah tur a ni e.

Tin, Pu Lalduhoma'n GSDP chungchang a rawn sawi kha, hei hi kan state atanga tih mai pawh a ni bik lova, Central Statistic Organization atanga an rawn tih thin a ni a. Helam atangin data erawh chu kan mi leh sa ten an kaihhruai leh duh danin an zuk feed thin a. Chuvang chuan tuna an final GSDP chu 2004-2005 hi niin ka hria a. A hnu lam hi chu provisional-te, tin, Estimated-te, Project-te, chutiang chuan a la kal a. Amaherawhchu, a tak tak an final hunah pawh a dang vak chuang lo thin an ti a. Kei pawh hmannah ka doubt deuh avangin kan mithiamte ka lo rawn a, chutiang chu kan dinhmun a ni e.

Tichuan thil tam tak sawi ngai tawh pawhin ka hre lova. Kan Budget Speech leh documents-ah te khan theih ang anga chiang thei turin han tarlan tawh a ni a. Ka'n sawi duh hlek erawh chu, pawisa kan hmuhna lam tur atana tan lak a ngaih nasat thu leh member-ten awm min tihpui a, min han sawipui leh min han finchhuahte kha a lawmawm hlein ka hria a. Tin, tunah hian a department changtuten lo bawhzui mek leh a thente pheih chu lo kalpui mekte kan nei a. Tin, heng piah lamah pawh hian hmalakna tur pawimawh tak a la awm chho zel dawn a. Pu Lalthansanga'n Income Tax Office Mizorama hawn tih kha chu kan State purview a ni chiah lova. Tin, rawn hawng pawh nise, anni hnena sum lut kha chu hetah Central Tax Devolution lam atanga kan lo dawn leh daih tur emaw a ni ang a. Tin, tunah rih hi chuan Tribal kan nih avang hian Income Tax chawi lova awm hram hram hi kan la duh tlang niin ka hria a. Kha kha sorkar hian ngaihtuahna kan la hmang lova, an hawn lohna tur lam zawk kan ngaihtuaha, chutih rual erawh chuan (Pu Lalthansanga : Pu Speaker, hei hi kan sawi nachhan chu hemi non-Mizo ang atangte hian a bill hrang

hrang atangte hian 2 % te lain Assam-ah khuan hei hi anmahni tax collect atang hian public account-a lutin kha kha an reflect thin e an tihna eng atangin ka rawn sawina deuh a ni.) A nih tak chu, nia non-Mizo hetiang sorkar hnathawkte pawhin an pe vek a, PNA an nei veka, chuang chuan khang an hmuh kha an awmna state-ah a lut mai nghal lova, Central pool fund-ah income tax pool-ah khan a lut vek a. Chuta tanga lo let leh thin chu a ni awm e. Tin, hetih rual hian keimahniah professional tax hi tribal hovin income tax chawi lova an chawi tura Constitution-in min lo ruat sak ve leh tunah pawh kan la pek kal zel a ni. Amaherawhchu Constitution an siam tantirh lai ami maximum amount kha kan la ring ta ngar ngar a, chu chu ₹ 2500 a ni. Tribal, keimahni ho zingah a hlawh tam ber pawhin professional tax ₹ 2500 kha a maximum a nih miao avangin hetiang chauh hi a ni a.

Chuang chuan hei kan sumhmuh (revenue receipt) lamte tihpunna kawng dap that a tul tak em avang hian leh keimahni dinhmun lamah pawh heng hi chu revise a hun tawh hlea hriat, vawiina kan member zahawmtak takten in han sawi ang khan, kan Chief Minister-in Delhi-ah Plan discussion-ah pawh a sawichhuak nghe nghe a. Tin, Plan discussion-a lokal Finance lamte leh a Planning Commission lama mite pawhin awm an ti khawp a.

Amaherawhchu Constitution amendment ngai anih avangin kan State-in hei hi min thlak sak rawh u, tih ngawt theih a ni lova, hei hi bawhzui zel tum chu a ni a. Chutih mek lai erawh chuan keimahniah hian kawngte a awm theih chuan kan sorkar hnathawkte leh tlema sorkar zar han zo thei deuhtawh chinah hi chuan employment Cess emaw surcharge ti ang zawngten emaw Revenue lak dan a awm emaw tih ngaihtuahna a awm a. Tin, hei kan officer thenkhat kan sawi puite leh a pawl ho angte pawhin awm min tihpui khawp a, kan sorkar-in awm min tihpui khawp a kan sorkar hnathawkte hian, he lamah hian an inhawng viau mai a, chuang chuan helaiah hian eng kawng emaw chu kan la dap chhuah a ngaiin, chutianga kan dapchhuah theih chuan kan revenue atan pawh hian a nihna takah chuan capacity-to-pay atanga teh pawhin a pe thei ber ber leh capacity neite chu sorkar hnathawkt leh sumdawng hausate hi an nih bawkt avangin helai hi kan sorkar lam atang pawhin kan Chief Minister kaihrainain hma lo lak tawhna hi umzuia a kawng zawn zel tum a ni a. Chutih rual erawh chuan tuna pay han revised thar takah hian khami a maximum ₹ 2500 hnuai lam pek dan turah khan tunhmaa kan pay mila han siam a, kan pay thar nena inmil turin han revised a ni a, phunchiarna engemaw deuh a awm hlek a ni maithei e. Mahsela hei hi kan tihphung pangngai a ni a. Hlawh kha a slap, a then pek zat tur theuh siam anga pek thin chu a ni a, tihdanglam a awm hranpa lova ni tih ka sawi duh bawkt a ni.

Tin, chu loah chuan, tunhnaia thil issue deuh vawiin-ah pawh kan member-ten in han tarlan kha thil inhriat fuh loh palh thilte pawh niin ka hria a, chu chu Finance Commission atanga kawng repair-na atana Public Works Department-a pawisa pek chungchang kha a ni a. Kan Public Works Department-te hian kawng enkawl tur an nei thui hle mai a, tin keimahni resource atang hi chuan sum kan neih tam sak thei lova, chuang chuan kan kawng pawh hi a chhe viau reng a ni a. Ka hriatsual loh chuan hetiang kawng an enkawl hi kan State chhungah hian Kilometre 4000 dawn niin ka hria a. Tin tunah hian heng kan kawngpui kan lo neih thin Aizawl atanga Serchhip kaltlang Lunglei kawngte, Lawngtlai thlengte, Champhai te, Champhai atanga Farkawn te, tin



khawchhak lam kawngte, tin, Aizawl to Silchar kawngte pawh hi Ministry of Transport atanga pawisa rawn sanction tawh contractor pawh (Interruption)

**S P E A K E R** : Pu Liansailova lo chawl lawk rawh. Kan hun a tawp a, kan la chhonzawm tir zel dawn em ni kan Minister chu. Chhonzawm zel phawt mai rawh se aw.

**Pu H. LIANSILOVA, MINISTER** : Pu Speaker, an rawn appoint tawh chutiang hnuai awm zawk chu anih avang chuan kan kawngte hi lehlamah chuan Public Works Department mawhphurhna anih rualin a contractor-te mawhphurhna a ni zawk mah mah a, kan House Leader hian hei hi a sawilang fova, tuntumah pawh hian tha a tih chuan a rawn sawifiah theih zawk ka ring a. Chutih rual erawh chuan tuntuma kan PWD Engineer-in-Chief ten an harsatna thu Press Conference meuhva an han kalpui kha a vanduai thlak viauvin ka hria a. Sorkar hnathawkte hian a tul leh pawimawh anih chuan Press chu hmuh ngai a ni a, amaherawhchu, Sorkar leh Sorkar inkar emaw department leh department inkar thu anga thu chhia a Press lam ten an lo chhuah theih tur ang chi a thil kal palh a awm hian a vanduai thlak a. Tunah hian a dinhmun dik takah chuan Finance lamin an han inenchiang ve a, 2010-11 ah khan 13<sup>th</sup> Finance Commission hian hmanna an han sawi ang khan Finance Commission-in allocation a pe lova. Amaherawhchu, 2010-11 ah hian pek dan a nei a, chu chu a pek zingah khan Non Plan Revenue expenditure-a projection an tihdan hmang kha an lo hriatchian loh vang niin a lang a, chuvang chuan, hmanna thil an han sawi pawh kha thil inhriat fuh tawn loh ang mai niin a lang a, 2010-11 ah hian vaibelchhe 44.83 lai dah a ni a. Amaherawhchu, Minor works atan khan vaibelchhe 4 leh nuai 50 chauh a awm a, a dang kha chu thawktute hlawh atan te, Medical treatment-ah te, domestic travels leh office expenses-ahte, tin, in luah man atan te, professional service atan te, motor leh vehicle te, machinery leh equipment atan te chutianga hman tura ear-marked-na Budget head-a duhsak an ni a. Minor works-ah khan 4.5 crore chauh kha an nei thei a ni a. Tin, 2011-12 ah pawh hian chutiang deuh bawkin Minor works-ah hian 9.5 repair han thawh theihna tur a ni ang, chutiang chu an neih kha a ni zawk a. Tin, han inbiak chiannaah chuan anni pawhin hei hi (Public Works Department) lam pawhin hei hi tuna harsatna kan han sawichhuah mai pawh a ni lo a, kawng maintain-naa, harsatna an tawh thin leh tin, mipui lam atanga induthawhnate lo awm bawk nen, heng vanga an mangan thu an rawn sawi chhuahna mai a ni a. Tin 13<sup>th</sup> Finance Commission emaw, Finance Commission dang atanga pawisa kan lo hmuh thinah hian tuna thil harsatna an tawh ang hi tunhnaia thil thleng mai pawh a ni chuang lo a, kum 10 hmalam atanga he harsatna hi an lo tawh thin leh indaihlohna hi an lo neih reng thin a ni a. Chuvangchuan, hetiang thil a awm tak avanga zeldin thubawla khawilai emaw tute emaw hlawh atana an pawtpeng a tih emaw, tin, a chhe zawng takin thenkhat phei chuan NLUP atan sum an pawtpeng a niang tia eng emaw zeldin thu lo vahpui vak vak emaw, lo tidarh te pawh kan awm a ni awm a; a pawi hle a, chutiang chu thudik lo a ni.

Tin chulovah chuan kan Budget-ah hian hlawh atan pawisa kan mamawh tur zat theuh department-ten an han chhut kha, Department tinin an pekluh kha kan Budget-ah hian kan dah a, kan tarlan tawh ang khan tuntumah pawh

vaibelchhe 1440 zet kha dah a ni a. Tin, pension atan vaibelchhe 270 ang vel a ni. Chuvangchuan, tuten emaw hlawh lama harsatna an han tawh, nichina Central Sponsor scheme emaw, eng scheme emaw an hlawh lakna lo thlen khaihlahk emaw a awm thin a. A nih loh pawhin Corporation pawhin an mahni Fund-in a daihloh leh khaihlahk laia hlawh an lak theih loh avanga NLUP atan pawisa an pawtpeng a, chuvang alawm han tihte hi chu, thudiklo mipui tihchiaina leh sawrkar lam tihmualpho tumna hrim hrimte pawh niin a lang a. Chuvangchuan, vawiinah hian kan Budget kan han Present takah pawh hian hlawh turte, NLUP tur te, an mahni awmna hmun theuhah, an Head theuha khatiang khan han dah chhuak a, kan sawi hovin, kan la Pass dawn a ni a. Tin, 2010 – 2011 ah pawh chutiang tho chu a nih avangin, heng thilah hian tu tu ten emaw, engemaw tia hmanlai politics, thil thalo kalsan kan tih tawh, dawt belhchian dawlo hmanga mi tihbuai leh hmang, mi tihbuai leh inbeih hi awm tawh lo se a thain ka hria a. A ringhlel tan chuan kan Budget bu hi en mai sela a thain ka ring a, chu chu ka sawilang duh tel a ni.

Le, a tawp berna atan chuan Pu Speaker, heng kan Budget kan present chungchanga kan thu han sawi leh tarlante, sawrkar lam atanga hmalakna Tlem azawng tarlante, kan harsatna kan han sawi ang angte kan member zahawm tak ten ngaihtuahna tha tak leh rilru zau tak, ram tana thahnemngaihna rilru tak tak hmangin min sawipuia lawmawm ka ti a, chuvang chuan kan budget document kan han dah chhuah te hi ngaihtuah leh sawiho kha min lo pawmsak ka'n beiseia, ka'n dil nghal a nie. Ka lawm e.

**Pu LAL THANHAWLA, CHIEF MINISTER** : Pu Speaker ka lawm e. Sawitur nei vak lo pawh ni ila nichinah khan ding turah ka hming kha i sawi lawk tawh hrim hrim a, chuvangin din ve a ngai hrim hrimin ka hria a, ka eng thawl huai tawh zawka. Pu Speaker, a lawmawm khawp mai, kan Finance Minister-in Budget speech a bua min rawn sem thliah thliah kha ngun takin kan member-ten an chhiar hlawm tih a hriat a, a lawmawm ka ti a, a famkim hle mai a, a sei tha a, a detail tha a, chuvangin a chhiar chiangkuangte tan chuan kan Fiscal position kha a hriatfiah theih viau a ni, a lawmawm ka ti a, kan Finance Minister bakah a tawiawmtu zawng zawng chungah lawmthu kan sawi hmasa duh a.

Tin, chumi rualin member zahawm tak takten reaction, in rawn sawinaah khan engemaw a pawtawh zawng leh a tha lo awm miah lovin budget speech-a appreciate chungin duhthawhna laite infuihna lai te, in rawn sawi chhuaka a lawmawm ka ti Pu Speaker. Tin, a bik takin Pu Lalduhoma, Member zahawmtak leh Dr R.Lalthanglianate rawn sawi phei kha chu challenge tha tak tak a ni a, keini pawhin kan lo pawm a, kan bawhzui tur thil tam tak awmin ka hria a, lawmawm ka ti tak zet a ni. Nia, kan Budget, regular Budget session hi a tlaina chhan chu kan hre vek a, keimahni thuneihna piahlam anih avangin a pawh kan ti a, a hun taka Budget session neih theih loh hi a tak takah phei chuan sawrkar tan tak hian a tha lova, working season-te a tlem phaha chuvangin duh angin a kal theih loh, ta a, a pawh tak zet thin a ni. Engpawh nisela, member-te reaction-ah khan a lawmawm ka ti a. Amaherawhchu, kan Finance Minister-in a rawn sawi chiangkuang hle tawh na a han belh ve zawk duh tlemte ka nei a. A hmasa berah chuan kan Finance Department lam ten Mizoram Fiscal Responsibility & Budget Management Act, 2006 leh 13<sup>th</sup> Finance Commission-in Fiscal consolidation atana ruahmanna min siamsak ang chi a nihdan tur anga dik taka an rawn bawhzui a, an rawn chhuichhuak

chhova, khatiang zawnga fiscal management siam a, tun ang hun min thlen chhoh sakín kan deficit-te leh revenue surplus a nih tur ang aia tha mah mah an ni chho zel theite hi a lawmawm ka ti a.

Tin, Gross Domestic Product (GDP) kan tih te pawh kha State-in helaia keimahní local economy atanga zuk determine mai nilova, khulam atang-te pawh-a rawn tihpuiin, khatiang determine kha a ni thin a, chuvangin rinawm tur thawkhatah ngai ila. Tin, helampangah hian a theory ang zawka kan kal an duh anih ka ring. Tezpur-ah Indian Statistical Institution tun zirtawpni hian Prime Minister-in a hawng dawn a, amaherawhchu, amah tak chuan a thulh leh tain Finance Minister-in a hawng dawn tho niawm tak a ni. Heng angte pawh hi helaiah statistical data dik tak kan neih theihna tur atana training-te conduct zeuh zeuh tura tih a ni a, chuvangin plan tha tak kan neih dawn chuan statistical data tha tak kan neih a ngaih avangin helampang kawngah pawh kan department-te figure hi a rintlak ang tih hi ring ila. Chuvangin tuna kan Budget speech, Finance Minister-in a rawn putlul hi a lawmawm ka ti a, khatiang zawnga financial prudence awm theihna tur atana 13<sup>th</sup> Finance Commission-in min recommendation dungthula keimahní act ngei pawh department-en an rawn hmang tha viau a. Revenue surplus leh kan deficit-te pawh tihlem a ni theite hi thil lawmawm tak a ni a, an chungah lawmthu ka sawi duh bawka.

Tin, member-ten a pawtawka zawng nilova a tha zawnga thahnemngai taka an thusawite theih ang ang kan lo note a, a lawmawm ka ti a lawmthu ka sawi duh a ni.

MIP (Mizoram Intodelh Project) sum banga vawkte lei thil diklo kha helaiah khan keimah ngei pawh khan Pu Speaker, kan chhui ang ka ti a, an chhui ta niin ka hria a, an thutlukna ka lo ngaihsak zui lova. Engpawhnisela, kan sorkar tan emaw, party tan emawa tha lo a nih pawhin a rawn sawichhuaktu Member zahawm tak kha a hre tur niin ka hria a, bawhzui dan ka lo ngaihtuah ang, chu chu copy kha kan pek a ngai a ni.

Tin, Pu Speaker, kan kawng chhe lutuk hi mipui leh a hmangtuten an vei aiin Sorkar tan hian a veiawm zawka a. Zah pawh a zahthlak khawp mai, pawka ti a. Amaherawhchu, kawng kan han tih ber chu he mi National Highway 54 hi a ni a. Silchar atanga rawn kalchhovin sawtah Tuipanga tawp hi a ni. Hei hi kan hmuh hma deuh khan Sorkar hmáin BRTF kut atanga lak hi an lo dil a ni. Kan hun lai kha chuan BRTF hoin an kawng zawh tawh pawh min hlan an tum hian a maintenance-ah hian sum kan neih loh em avangin kan tang tang tang thin kha a ni a. Amaherawhchu, Sorkar hmasaah khan chutiang lo deuh chuan an lo dil a, chumi chu an hriatchhuahin BRTF pathum an lo leng a, hei hi min sawi sak la kan kutah hian awm rih se kan duh e an ti a. Defence Minister, A.K. Anthony kan phone a, mahsela, ani chuan an DG berin a remti tlat a, engemaw tia zawi zawia in withdraw an tum avangin kan lo tiful der tawh a, a tlai hret a ni, a ti a. Chutiang chuan keini kha a transition period-ah khan kan lut ta a ni. Sum kha a rawn kal thuai lova hemi a Maintenance-na tur hi, a rawn kal chuan tunah hian tender-te an han chhuah a, amaherawhchu, an chhan san lutuk avangin tunah hian central lamah engemaw a tul avangin khua a tlai chho zo ta a, tunah hian an ti tan

chho dawn ta niin ka hria a. Hei hi a pawl khawp a, kei chuan PWD enkawltu ka nihna angin ka duhlo a ni, hemi kawng lak hi. A chhan chu heng PWD kawng lak hi kan la phaklo hrim hrim a, kan khawl neihte hian a la zolo hrim hrim a, kan expertist hian a la zo lo hrim hrim a. Tin, a labour chungchangah pawh kan harsa. Tunah hian Serchhip atanga Zawlpui inkar hi PWD hian sum an pe a. An thawk muang em em mai tih ka lo hria a, Executive Engineer ka han zawt a, Executive Engineer chuan labour kan hmu zo lo a ti. NREGS hi kan hmuh that hi chuan labour hi kan hmu zolo reng reng a. Tunah phei chuan NLUP kan sem lehngal a, kan hmu miah lo. Chuvangin, kan mangang a, khutah Dumka-te kan intir a, chuti chung pawhin lo kal duh kan hmu lova, an ti a ni. Chutih lai chuan BRTF te hian lo enkawl zel chu nise tun ai hian a that ka ring a. Hei Seling atanga Champhai kawng hi an la enkawl a. Tuna keini Highway 54 ai hi chuan a tha deuhin ka ring a, tunhnaiah hian ka kal lo nangin. A chhan chu ka zin hnuhnun ber pawhin anni chuan a kawng sirah camp an nei a, tichuan labour-te pawhin an thawk reng a ni. Keini PWD hian chutiangan camp neiin an riahchilh ve hun tur hi engtikah nge ni ang aw tih hi a hminga Minister mah ni ilangin ka ngaihtuah a ni. Chutiang chu a ni a, chuvangin kan kawng chhia hi a vanduai thlak khawpin ka hria a, amaherawh chu theihpatawp an chhuah zel a. Tin, a tender-te khu off-load an ni lehngal phei khu chuan Mizoram awmna khawilai nge hrelo te hian an han chhang a, a mangan thlak khawp mai a. Chuvangin, hemi Kolodyne Multi Modal Transport Project-te pawh hi a buaithlak viau ang tih kha ka ring a.

Hei National Highway 44 A heta tanga Agartala chhun tur pawh hi kum khat kal ta deuhthawah khan Road Transport Ministry-in tender an float a. Mizoram pawh a awmna hre thathum manglo khan a chhang a, 25% below in. Hralhna a zawng a, a hmu zo lova. Local contractor-te a rawn zawrh a, tumah lei duh an awm mang si lova, tunah hian kum khat deuhthaw a ral tawh a. Chu chu Prime Minister hnenah lehkha na tak ka ziak a. Tunah hian a chhanna dik tak ka la hmulo na in hmanni a NEC Meeting-a Guwahati-a kan kal kha chuan khatianga in tih avang khan North Eastern State-te hian anmahni State-ah tender an float ve tawh tur a ni, tih a awm niin kan hria an ti a, mahse lehkha chu ka la hmulo a ni. Chutiang chu kan harsatna hi a ni a Pu Speaker, a transition period-ah kan lut a, a sum maintenance-na tur pawh kha alo thleng har si a. A lo thlen a, tender an han koh khan, tlema an han chhan deuh takah khan, khulamte nena negotiate kha a ngai leh si a, chumi avanga harsa ta chu a ni a, a pawl khawp mai. Hei hi a kawngpui ber a ni a, hemi hian a dang zawng zawng kha a hrek ve phakna kha a awm a ni tih hi ka sawifiah duh a. A chhan ber chu kan zawh loh nghawngkawp bat turin kan lo intiam a, kan zo ta lo a ni. Tin, sum pawh awm sela kan zawh viau hi ka ring vak chuang lo a ni.

Tin, thil dang sawi eng eng emaw a awm a, corruption phoro hi kan duh nasa khawp a, mahse, a har khawp mai a ni, tunah hian keipawh hi ka beidawng deuh rum rum a, a chhan chu kan legal system hi India ramah hian a tha lutuk a, a harsa a, tin, chubakah helaiah tualchhungah eng eng emaw an han ti leh a, chungah te pawh chuan harsatna kan han nei a. Tin, CBI te tak pawh hi kan rin tehreng nen an muang angreng khawp mai a, ka tawng an hriat leh tawh suhah, hei Tuirial compensation dik lo kan tihte pawh kha an chhui a ni a, an chhui zo tawh an tihna kha a rei tawh a, mahse a reh ta vang vang rih chu a ni, lipuia thlak ang vang vang a ni a, a rawn chhuah hunah hian a rawn phul hlut dawnte anih chuan thu dang ni sela. Chutiang

chuan Department hrang hranga corruption-te, Vety-ah a ni emaw, Power & Electricity Department-ah a ni emaw heng zawng zawng hi kan ACB te pawn an han chhui ve bawk a, a conclusion hi rin aain a muang a, tin, court-ah te an han kal a, anticipatory bail-te an han la a, tin, khatiang ang khan Prima facie case an nei nawn a ni tih kan han hre ru zel thei bawk si a. Khatiang anga kan hre ru tih an han hriat ve leh khan Doctor certificate an han la a, Doctor certificate an han lak tawh kha chuan bail loh theih loh kha an han ni a, chutiang case-te pawh chu tam tak a awm a ni, tunah hian. chuvangin, Pu Speaker, hetiang kawngah hian kan zawi miah lova, amaherawhchu thil harsa tak a ni a. Entirnan, Police Modernization chungchangahte khan High Court direction-in ACB in a chhui a, tichuan High Court-ah te an kal thla a, eng tin tin emaw tunah hian enge anih tak tiin Chief Secretary-te nena inzawh inzawh hi a ngai a ni. Chutiang ang khawp chuan thil hi a kal zawi a, a buaithlak khawp mai, engpawhnisela theihpatawp kan chhuah zel a. Thubuai neite pawh an awm mek a, engemawtia action han lakte pawh an awm mek a, a zawng a za-in kan sawi hlei thei lova. Tin, keini MLA 32 hi chu engtikawng zawng mahin department atang hian pawisa thamlo turin kan inti a, kan tham pawh ka ring hranpa lova, tin, kei hian Pathian khawngaihna zarah Chief Minister hei leh chen ka nih hian department atang hian pawisa sen khat pawh ka la la lova, a nuam khawp mai a, nuam an tih ve pawh ka rin avangin ka thiante pawh hi ka experience pawh ka hrilh a ni. Sorkar pawisa anih lai hian hmuh hi ka hlau em em a, hmuh ka tum miah lo. Chuvangin hetiang kawngah hian a diklo chu chhuia hrem thei tura kan fihlim a tul avangin tiang chuan kan kal a ni. Amaherawhchu, kan legal system bawk hi a that lutuk avangin a har khawp mai. Tin, department-ah Officer-ten pawisa an tham thin ka ti lova, tham ching tlemte an awm ka ti a, chungte pawh chu tunah hian a ruk takin ka enfiah mek a ni, kan man chuan kan hrem ang, Court a kal kher lo pawhin hrem dan a awm a. Tin, chutianga hrem hi kan nei nual tawh bawk a ni.

Corruption dona kawngah hian kan kal zuih miah lova, duh angin a kal chak theih loh hi ka manganna ber a ni. Kan ACB-te pawh kan trained-a, an tha ve tawh khawp mai Gajiabad-ah CBI Academy-ah te an zu train a, khuta an trainer-te kan ko chho bawka, an instructor-te, tiang chuan an train a, an tha ve tawh khawp mai. Mahse an mahni zingah pawh hian an mahni leh an mahni pawh inrinhlehna lian tak an nei niin ka hria a, chungte pawh chu kan Home Minister-in a la endik mek zel a ni. Chutiang chuan harsatna a awm a ni.

Tin Pu Chanchinmawia thah chungchang hi kan hotute thinsungah a thi mai lova, CBI Director pawh hi wawi duailo hmuh tawh a ni. Anmahni lam atang hian phur viauna a awm lova, anmahniin khatia an lo conclave tawh anih avang khan, chuvang chuan engtia tihur nge ni ang tih hi ngaihtuah a ni reng a, a kawng hre tha riaute an awm phei chuan chungte chuan kan Sorkar hotute advise se a lawmawm khawp ang, chutiang chuan kan la kal mek zel a ni. Tin, a prosecution lampang pawh tihchak dante awma chutianga min advise theih chuan a lawmawm khawp ang, mimal tak pawhin. Mi a pawng a puia hrem lampang nilovin, thil diklo hailana, tihdik hi ka phurna zawng tak a ni.

Tin, Pu Speaker, NIT kha kan hotuten tuntumah khan an rawn sawi a, helai hi hun leh hunlo ka hre lova, amaherawhchu an sawi chhuah avangin han sawi tulin ka hria a. Ka lawmna riau chu, NIT chungchangah hian mi tamtak an phur a, a lawmawm a, thalaite tan khawvel thar kan siam ang, kan

buatsaih ang tih kal zel kha a ni. Chumi building-ah chuan a 2<sup>nd</sup> Floor a bo ta tih lampang anilo pawh hi ka lawm hrim hrim bawk a, chulai khalaiah chuan pawisa sang tamtak bona ram a ni tih lampang nilova thahnemngaihna lampang aw hliir a ni a, a lawmawm hle a ni. NIT kan neih dawn hian kan hriat angin Nagpur-in min hmui rih a, tichuan tunah hian Central Sorkar leh anmahni Nagpur-te ngei pawhin nei ve tawh turin min ti a ni. Mi thahnemngaiten a tir atanga changtlung taka neih an duh hi a lawmawm ka ti a, keipawh ka duhtusam chiah a ni. Tun thla Ni 21-ah kan tan dawn a, ni 21 atang hian changtlung em em mai nise kan duhdan theuh a ni a, mahse bul tan reng reng hi a changtlung nghal vek thei lova, Mizoram thil reng reng hi a changtlung vek thei lova, Mizoram University an neih laite pawh a changtlung sa lova, kum engemaw zat kan neih hnuhah a changtlung dawn mek a ni a, changtlun lampang kawng a la pan chho mek a ni. Chuvangin, changtlung sa thlapa neih duh ho thahnemngaihna hi a lawmawm rualin a theih loh a ni tih hi chu an hriat ve ka ring.

Tin, a hmun chungchangah Board of Directors an awm a, chung ho chu mi 7 lai an lo zin a, chung ho chuan ram lo offer tawhte an enkual a ni. Chutia an enkual hnu chuan Thenzawl hi an thlang niin ka lo hria a. Tin, khatia an kal kual vek hnu khan an zavaiin kan inah thingpui in in an lo leng a, chuvang pawh chuan Thenzawl kha an duh a ni tih a ni. Tin, quidelines an nei lova, an duhtusam erawhchu Airport atanga 2 Hours ni sela tin, facilities engkim Damdawi Inte, School-te, chutiang, khatiang, Banking facilities thlengin awm sela an ti a, mahse, chuti chungin Thenzawl kha an thlang a ni. Tichuan, engtik tum emawa ka zin haw khan Lengpui khawtlang hruaitu intite NGO hruaitu inti ten min lo hmu a, e khulaiah ram zau tak an neih thu min lo hrilh a, mahse, tunah chuan Thenzawl hi an thlang fel tawh niin ka lo hria a. Amaherawhchu, Mass Communication-te, Management Institute-te kan la nei dawn chauh a ni a. Agriculture prodise thlengin, chung hunah chuan man miah lo, free Land anih chuan tiin ka lo hrilh a ni. Nizanah khan talk show an nei a, ka dawhkanah khan T.V. en lovin ka ngaitthla ve mai a, ka lehkha chhiar pahin. Chuta an sawi thenkhatah chuan House-ah, House Leader, Chief Minister-in Pu Speaker, ‘Lengpui chu man tam tak pek ngai a ni’ a ti, an ti a. kha kha a dik lo a ni. Ka sawi kha a hretu i ni a, kan Speaker zahawm tak pawh hian Lengpuiah ram zau tak nei chhungte a nei a, amaherawhchu man nei anih avangin chu lampang chu tin zawn chi a ni lo tiin ka sawi a ni a. Chutiang chuan a sum sen lampang kha an in huam lova, Mizoram sorkar pawh kan in huam bawk hek lo. Chuvangin a thlangtuten an thlan kha keini chuan kan pawm mai a, chulamah an tih leh kan pawm zel turah kan inngai a ni. Tin, Lengpui pawh an en tih kha ka’n zawt chianga Nagpura an Director Gokhale chu a kal pahin an hrilh a kha, a tha khawp ang chu ti awm takin a sawi niin ka lo hria a, a dik leh dik lo chu ka hre lo a ni. Tichuan “Lengpuiah pawh a awm theih chuan a tha khawp ang chu”, a ti e, an ti a, chu chu kan hriat a ni a, a team chuan an visit lo niin ka lo hria a ni. Engpawhnisela ni 21 ah kan tan dawn a, changtlung sa chuan kan tlin lova, mahse zirtirtute pawh mi thenkhat chuan a thar lak tur an ni dawn a, an ti a, lak thar vek, a hnuah a hlui an lo ni mai thin a ni. Chutiang chu a kalphung tur a ni, kan NIT hi.

Naupang zu zirte kha an huaisen tan tan viau va, an hnungah khan back-up tu tha tak tak an awm a nih ka ring a, an sawi loh tur tam tak zirlai nisiin an sawi kha pawh ka ti khawp mai a, tun hnuah chuan khatiang

kha awm tawh lo se ka ti khawp mai. Sorkar hian an thatna turin a ngaihtuah a ni. Nagpur-a zu kal ve phak lo te, Mizoramah engngemaw zat tling ve si an awm ang tih kan ring. Chungte chuan keimahni khaw bu zawl ngeia an zir kha kan hotuten an duhsak a. Chuvangin kan hotuten khatiang khan an ruahman sak a ni tih pawh an lo hriat ka duh a ni.

Tin, Professional Tax kha kan Finance Minister zahawmtak khan a sawi tawh nain hei chhiah tihpun chung chang a lo ri ah te helai member zahawmtak kalkhawm zawng zawng hian Mizote hi sorkarah kan innghat nasa a. Kan engkim hi sorkarin min tihsak se, ti deuthaw tawh hian kan awmin a lang a. Hei, member zahawm tak, Pu John Siamkunga hi a bial a fannaah an Community Hall kawngkhar a chhiat thu leh sorkarin min rawn siam sak se an lo ti a. Ani hian ‘e, ngawi rawh, ka zuk en ang e’, a ti a. A zuk en a. ‘Ka lo kal leh hunah thingphel pakhat leh tuboh leh perek ka rawn keng ang a, keiman ka siam tha ang e,’ a ti a. Chutiang chuan mahniin kan tih ve theih awlai te pawh hi sorkar pun ching kan ni a. Amaherawhchu, member zahawmtakin a sawi ang khan kan sorkara kan thawh ve a tlem zia chu hretute vek kan ni a. Chuvangin, thawh tam ve tura rilru kan put a ngai a. Kan member zahawm tak tak ten chhiahte pawh a tulna lai laiah chuan reasonable taka tihpunte tha an ti hi lawmawm ka ti khawp mai a. Hei hi ram hmangaihna leh sorkar kan neih ve chuan mahni a din kan tum ve ngei tur a ni ti a ngaihtuahna a ni a, chu chu ngaihtuahna hrisel tak a ni. Chuvangin member zahawmtakte chungah, hemi chhiah pun chungchanga ngaihtuahna leh ngaihdan an nei hi lawmawm ka ti a, lawmthu ka’n sawi duh a ni.

Tin, NLUP hi ni e, a sawi hnawm duh tan chuan sawi hnawmna tur a awm a. Tin, ringhlel duh tan chuan rinhlel tur pawh a awm anga. Amaherawhchu MIP kan tihte pawh kha lo kal chho se chuan NLUP te nen hian a kalphung leh a tum chu a inang tlangpui chhova. A pawimawh ber zawk chu a dawngtuten rinawmna, dikna, taimakna leh Pathian tihna nena an dawn a ni tih hi an hriat a pawimawh bera. Chutiang ti thei tur chuan keini heta awm ho hi chuan kan mipuite hi kan fuih tur leh kan tanpui tur zawkah ka ngai a.

Hemi hi lo hlawhchham leh ta sela mipui nawlpui leirem rah tira, khaw eng hmuh tirna tur programme hi a awm leh har tawh viau ang tihte pawh hi a hlauhawm a ni. Chuvangin member zahawm tak ten keimahni ta ang theuha kan neiha, kan mipuite theuh ta tur a nihna ang hian a hlawhtlinna tur kawngah pawh hian mipuite tanpui zawngin, a deusawh zawng leh khatiang zawnga kan ti, ka tihna lam kha ni lovin, chutiang ti an lo awm anih pawhin kan kut hnathawktute khaichhuahna turte leh hmeithaite, pachhiate khaichhuahna tur remchang tak programme awm chhun a ni tih hria a kan kal hi a tul a ni.

Tin, kan budget lo ei hek pawh nisela, a ei hektute hi kut hnathawktute, an telloa kan awm theih miah lohte an nih avangin, tute mahin han thik turah pawh kei ka ngai hranpa lo a ni. Tin, convergence tih hi helai keiniin kan phuah a ni mai lova, hetiang centrally sponsored schemes tam tak NLUP nena inmil chi ang hi chu an mahni Planning Commission lam pang zawk hian, “convergence hian kal ta ilangin a in supplement tawn anga a tha khawp ang chu mawle”, an ti a, keini pawhin thaa an rin kan hotute, kan mithiam zawkten an lo amen a ni. Chutiang chuan kawng hrang hrangah theih ang tawkah chuan ram leh a felna zawng hmasa a, chutianga kalpui chu anih avangin hei aia tha leh changlung zawka han

ngaihtuahna mai tur chu kan hotute hian an hre hranpa lova, chuvangin, tuna kan kalpui ang hi kan thiam chin tawk a la ni rih mai a. Chutiang chu anih avangin, kan Member zahawm takte pawh hian Sorkar mi vek kan nihna angin Sorkar Flagship programme hi a hlawhtlin theihna tur atana thahnemngai taka min beihpui turin ka sawm duh a. Tin, kan zavaia ta a ni a, a mipui pawh hi thliar bik theih a ni lova, Mizote hi inthliar hrang thei kan ni bik lo a ni, tihte pawh hi kan hriat a pawimawh a, chuvangin, kan NLUP programme hi ka sawi tak ang khan hmeithaite, pachhiate leh kut hnathawk mi, an tellova kan awm theih miah loh leh kan khawsak theih miah lohte khaichhuahna tur atan anih avangin a hlawhtlin ngei theihna tur atana kan thawh hi kan zavaia mawh a ni tih ka sawi duh a ni.

Awle, Pu Speaker, chu chu ka sawi duh chin ni mai sela, a bak awm te kha chu nakinah demand-ahte hun kan la nei dawn a, engpawh nise, a tlangpui thuin vawiina kan Finance Minister zahawmtak Budget speech kan han sawihona boruak hi a nuam ka ti a, tha ka ti a. Opposition leh Ruling pawhin kan sawi dan hi a inang deuh vek a, tlema mi thenkhat zuk zir zau zawk tena an duhthawhna leh chona tam takte kha a lawmawm ta hlei hlei zawk a, chuvangin, kan Finance Minister hnenah Budget speech tha tak, changtlung, tak kim tak, a rawn present piah lamah a lo dawngsawngtute chungah pawh lawmthu ka sawi a ni. Ka lawm e.

**S P E A K E R** : Mizo fate hi rilru chi thum hian kan kal deuh thin a, Kohhran-ah hi chuan thawhtu thinlung kan pua giver thinlung, YMA lamah hian mite tanpuitu thinlung helper thinlung kan pu a, Sorkar lamah hi chuan kutdawh thinlung beggar thinlung kan puin ka hria, heti lai hi kan ngaihtuahna hi chhut tham a awmin ka hria. Budget 2011-12 General Discussion chu kan zo ta a, kan discussion-na bengvar thlak tak leh wind-up-na leh kan House Leader-in thil tha tak tak bengvar thlak leh kan chhinchhiah reng tur a rawn sawite kha kan duhtawh mai ang a. Vawiin atan chuan kan chawl tawh ang a, naktuk lamah chuan demand lamah kan kal tawh ang a, naktuk ni 20.7.2011 (Nilaini) dar 10:30-ah kan thukhawm leh dawn nia.

Sitting is adjourned at 4 : 38 P.M.